

Mande

Rit Namba 1 (Yia B na C)

Ais 2:1-5

Hettok: Bikpela bai i bungim olgeta lain manmeri insait long kingdom bilong heven.

Rit i kam long buk bilong profet Aisaia

Long ol samting olsem driman, Bikpela i bin givim tok bilong em long Aisaia, pikinini bilong Emos, bilong em i ken autim long ol manmeri bilong Juda na Jerusalem. Dispela tok i olsem.

Wanpela taim bai i kamap bihain na dispela maunten, haus bilong Bikpela i sanap long en, em bai i stap antap tru na i winim olgeta arapela maunten.

Na olgeta lain manmeri bai i kam bung long en.

Ol lain manmeri bilong olgeta hap bai i tok olsem,

"Kam, yumi go long maunten Saion, em maunten bilong Bikpela.

Yumi go long haus bilong God bilong Israel, bilong em i ken skulim yumi long ol pasin em i

laik yumi mekim, na bai yumi ken wokabaut long rot em yet i makim."

Ol bai i tok olsem, long wanem, Jerusalem bai i stap ples bilong Bikpela i skulim ol manmeri na autim tok bilong em long ol.

Bikpela bai i stretim tok bilong olgeta lain manmeri na bai ol i sindaun gut wantaim.

Na bai ol i paitim ol bainat bilong ol i kamap olsem ol ain bilong brukim graun, na bai ol i paitim ol spia bilong ol i kamap olsem ol naip.

Na olgeta lain manmeri bai i no ken pait moa, na bai ol i no skul moa long pait.

Kam, yupela ol tumbuna bilong Jekop, yumi wokabaut long lait Bikpela i givim long yumi.

Dispela em i tok bilong God

Rit Namba 1 (Yia A)

Ais 4:2-6

Hettok: Ol manmeri God i oraitim ol bai i amamas tru.

Rit i kam long buk bilong profet Aisaia

Wanpela taim bai i kamap bihain na Bikpela bai i mekim ol han bilong diwai i kamapim nupela kru.

Na graun bai i kamapim gutpela gutpela kaikai.

Na ol manmeri bilong Israel i no bin bagarap na i stap yet, ol bai i lukim dispela ol samting i naispela tru na bai ol i amamas moa yet.

Ol dispela manmeri i stap yet long Jerusalem, Bikpela i bin makim ol pinis bilong i stap gut, na em i raitim nem bilong ol long buk bilong en.

Na nau em bai i kolim ol, ol manmeri bilong em stret.

Bikpela i gat strongpela tingting long mekim save long Jerusalem na mekim Jerusalem i kamap gutpela na klinpela ples gen.

Long bikpela strong bilong en, em bai i wasim Jerusalem na rausim olgeta doti i pas long taun.

Em bai i rausim olgeta pasin nogut ol meri i bin mekim, na olgeta pasin nogut ol man i bin mekim bilong bagarapim ol arapela man.

Taim Jerusalem i kamap klin pinis, orait Bikpela bai i mekim wanpela klaut i kamap na i stap antap long maunten Saion na antap long ol manmeri i bung i stap bilong lotu.

Long san Bikpela bai i mekim dispela klaut i stap, na long nait bai em i

mekim smok wantaim bikpela lait bilong paia i stap.

Dispela klaut na smok wantaim paia bilong Bikpela bai i hangamap na i stap olsem haus sel antap long dispela maunten bilong en na antap long olgeta gutpela samting bilong en.

Dispela samting olsem haus sel bai i karamapim Jerusalem na pasim hat bilong strongpela san, na tu em bai i mekim Jerusalem i stap gut long taim bilong bikpela ren.

Dispela em i tok bilong God

Song bilong Bekim

Song 122:1-2.4-5.6-7.8-9

Bekim: Yumi amamas na yumi go long haus bilong Bikpela.

Mi amamas taim ol i tokim mi olsem,
"Goan, yumi go long haus bilong God."

Nau lek bilong yumi i sanap pinis insait long banis bilong Jerusalem.

Bekim:

Jerusalem em i bikpela siti, i gat planti haus insait long en.
Ol lain manmeri i kam long Jerusalem, ol i lain bilong Bikpela.

Bekim:

Lo bilong Israel i tok, ol lain manmeri i mas kam long Jerusalem bilong givim tenkyu long Bikpela.
Long Jerusalem king bilong lain bilong Devit
i save harim kot na stretim tok.

Bekim:

Yupela mas pre,
bai gutpela taim i ken i stap long Jerusalem,
"Bai pasin sekan i ken i stap long ol famili.
Na gutpela taim i ken i stap long olgeta hap bilong siti,
Na bel isi i ken i stap wantaim ol lain manmeri i stap long haus king."

Bekim:

Mi tingim ol wanblut na pren bilong mi na mi tok long Jerusalem olsem,
"Taim bilong sekan i ken i stap oltaim wantaim yu."
Na mi tingim haus bilong God na mi tok,
"Gutpela taim i ken i stap oltaim wantaim yu."

Bekim: Yumi amamas na yumi go long haus bilong Bikpela.

Welkamim Gutnius:

Aleluya, Aleluya

Bikpela, yu God bilong mipela, bringim mipela i kam bek long yu.

Mekim pes bilong yu i lait long mipela na mipela i ken i stap gut.

Aleluya

Gutnius**Mt 8:5-11**

Hettok: Planti manmeri bai i lusim ol kantri i stap long hap sankamap na hap san i go daun, na ol bai i kam sindaun long kingdom bilong heven.

Harim Gutnius bilong Jisas Krai Matyu i raitim

Jisas i go insait long taun Kaperneam, na wanpela kepten bilong 100 soldia bilong ol Rom em i kam na askim Jisas strong olsem,

"Bikpela, wokboi bilong mi em i sik na i slip i stap long haus. Bun bilong en i dai olgeta, na em i gat bikpela pen moa."

Orait Jisas i tokim em, "Bai mi go mekim em i kamap orait."

Tasol kepten i bekim tok bilong em olsem,

"Bikpela, mi no gutpela man inap long yu kam insait long haus bilong mi. Yu tok tasol, na wokboi bilong mi bai i orait gen.

Mi tok olsem, long wanem, mi tu mi stap aninit long ol man i gat namba bilong bosim mi.

Na mi yet mi gat ol soldia i stap aninit long mi. Na sapos mi tokim wanpela, 'Yu go,' orait em i save go.

Na sapos mi tokim narapela, 'Yu kam,' orait em i save kam.

Na taim mi tokim wokboi bilong mi, 'Yu mekim dispela wok,' orait em i save mekim."

Jisas i harim dispela tok na em i kirap nogut.

Na em i tokim ol manmeri i bihainim em olsem,

"Mi tok tru long yupela, mi no bin lukim wanpela man namel long ol lain Israel i gat kain bilip olsem bilong dispela man.

"Na mi tokim yupela, planti manmeri bai i lusim ol kantri i stap long hap sankamap na hap san i go daun, na ol bai i kam sindaun long kaikai wantaim Abraham na Aisak na Jekop insait long kingdom bilong heven."

Em tasol Gutnius bilong Jisas Krai**Tunde****Rit Namba 1****Ais 11:1-10**

Hettok: Spirit bilong Bikpela bai i kam i stap long em.

Rit i kam long buk bilong profet Aisaia

Lain bilong Jesi i stap olsem as bilong diwai ol i katim pinis.

Tasol nupela kru bai i kamap long dispela as bilong diwai.

Spirit bilong Bikpela bai i kam i stap long em na givim em gutpela save na tingting, na bai em i stap strongpela king na i gat gutpela tingting na save bilong lukautim ol manmeri bilong en.

Em bai i save long tingting bilong Bikpela.

Oltaim em bai i stap aninit long Bikpela, na dispela pasin bai i mekim em i amamas moa yet.

Long taim em i harim kot, em i no inap skelim man o meri long ol toktok em i harim na long ol samting em i lukim long ai tasol. Nogat.

Long stretpela pasin bilong skelim kot, em bai i harim wari bilong ol manmeri i stap rabis na em bai i helpim ol tarangu, ol arapela i daunim ol na mekim nogut long ol.

Em i tok, na ol manmeri i gat asua bai i karim pen, na ol manmeri nogut bilong bikhet bai i dai.

Long stretpela pasin olsem, em bai i skelim ol manmeri bilong en.

Em bai i stap strong na mekim gut wok bilong en oltaim.

Ol wel dok na ol pikinini sipsip bai i stap gut wantaim, na ol lepat bai i slip wantaim ol pikinini meme.

Ol pikinini bulmakau wantaim ol yangpela laion bai i raun na kaikai wantaim, na ol liklik manki bai i was long ol.

Ol bulmakau na ol bea bai i kaikai wantaim, na ol pikinini bilong ol bai i slip wantaim.

Na ol laion bai i kaikai gras olsem ol bulmakau.

Ol liklik pikinini i dring susu yet, ol bai i pilai klostu long ol hul bilong ol snek nogut.

Long olgeta ples antap long maunten bilong Bikpela, olgeta samting bai i stap gut wantaim.

Bai i no gat wanpela i mekim nogut long narapela, long wanem, olgeta samting long graun bai i save tru long Bikpela.

Dispela save bai inapim olgeta hap graun olsem solwara i inapim mak bilong en olgeta.

Long dispela taim Bikpela i makim, nupela king bilong lain bilong Jesi bai i stap olsem mak bilong bungim olgeta lain manmeri.

Ol bai i kam long em, na taun bilong en bai i gat biknem.

Dispela em i tok bilong God

Song bilong Bekim

Song 72:1-2.7-8.12-13.17

Bekim: Long olgeta de bilong em bai gutpela taim na stretpela pasin i stap.

God, givim gutpela tingting long king,
na helpim em long skelim gut ol manmeri,
bai em i ken bosim gut ol manmeri bilong yu
na mekim stretpela pasin long ol tarangu.

Bekim:

Long olgeta de bilong em bai gutpela taim na stretpela pasin i stap,
inap lait bilong mun i pinis olgeta.

Em bai i bosim graun i stap namel long tupela solwara,
stat long Bikpela Riva i go inap long arere bilong graun.

Bekim:

Long wanem, em i save helpim ol tarangu i krai long em
na ol manmeri i sot long ol samting.
Em i save marimari long ol manmeri i no gat strong,
na em i save lukautim laip bilong ol tarangu i nogat samting.

Bekim:

Nem bilong king i ken win inap oltaim
na i ken i stap inap long de san i pinis.
Na olgeta lain manmeri bai i amamas
long stap aninit long em na olgeta kantri bai i askim God i blesim em.

Bekim:**Welkamim Gutnius:**

Aleluya, Aleluya
Harim. Bikpela bilong yumi bai i kam wantaim bikpela strong.
Em bai i givim lait long ai bilong ol wokmanmeri bilong em.
Aleluya

Gutnius**Lu 10:21-24**

Hettok: Holi Spirit i mekim bel bilong Jisas i amamas.

Harim Gutnius bilong Jisas Krai Luk i raitim

Holi Spirit i mekim bel bilong Jisas i amamas, na Jisas i tok olsem,
"Papa, yu Bikpela bilong heven na graun, mi tenkyu long yu, long wanem, yu bin haitim ol dispela samting long ol manmeri i gat gutpela save na tingting, na yu bin soim long ol manmeri i stap olsem ol liklik pikinini tasol.
Yes, Papa, yu bihainim laik bilong yu tasol na yu mekim olsem."
"Papa bilong mi em i putim pinis olgeta samting long han bilong mi.
Na i no gat wanpela man o meri i save long Pikinini.
Papa wanpela tasol i save long em.

Na i no gat wanpela man o meri i save long Papa.
Pikinini tasol wantaim ol manmeri Pikinini i soim Papa long ol, ol tasol i save long Papa."
Ol disaipel tasol i stap wantaim Jisas, na em i tanim na lukim ol, na em i tok olsem,
"Ol manmeri i lukim ol samting yupela i save lukim, ol i ken amamas. Mi tokim yupela, bipo planti profet na planti king ol i laik lukim ol samting nau yupela i lukim, tasol ol i no bin lukim.
Na ol i laik harim dispela ol tok yupela i save harim, tasol ol i no bin harim."

Em tasol Gutnius bilong Jisas Krai

Trinde**Rit Namba 1****Ais 25:6-10**

Hettok: God i singautim yumi long amamas wantaim em. Na em bai i pinisim krai bilong olgeta manmeri na mekim drai wara bilong ai bilong ol.

Rit i kam long buk bilong profet Aisaia

Long maunten Saion, Bikpela I Gat Olgeta Strong bai i redim bikpela kaikai tru.

Bai i gat planti gutpela gutpela abus na nambawan wain tru bilong dring.

Na ol manmeri bilong olgeta kantri bai i kam bung long dispela kaikai.

Nau olgeta lain manmeri i gat bel hevi na ol i stap olsem ol man i sori long man i dai pinis, na dispela hevi bilong ol i olsem klos bilong sori ol i putim.

Tasol long maunten Saion Bikpela bai i pinisim tru sori na hevi bilong ol.

Em bai i pinisim dai tru na bai dai i no kamap moa long ol.

God, Bikpela bai i pinisim krai bilong ol na mekim drai wara bilong ai bilong olgeta manmeri.

Na em bai i pinisim sem i stap long ol manmeri bilong en long olgeta hap bilong graun.

Bikpela i tok pinis long mekim olsem.

Taim ol dispela samting i kamap, ol manmeri bai i tok olsem,

"Bikpela, em i God bilong yumi.

Yumi bin bilip na wet long em wanpela bai i kisim bek yumi.

Em tasol i Bikpela, na em i bin helpim yumi.

Olsem na yumi amamas moa yet, long wanem, em i kisim bek yumi pinis."

Han bilong Bikpela bai i stap antap long maunten Saion.

Dispela em i tok bilong God**Song bilong Bekim****Song 23:1-3.3-4.5.6**

Bekim: Mi laik stap long haus bilong Bikpela olgeta de mi stap laip.

Bikpela em i wasman bilong mi na mi sipsip bilong em.

Olsem na mi no save sot long wanpela samting.

Em i mekim mi slip long hap i gat gutpela gras.

Em i bringim mi long hap i gat wara, na mi dring na mi malolo.

Em i givim nupela strong long mi.

Bekim:

Em i stiaim mi long gutpela rot, olsem em i bin promis.

Maski mi wokabaut long ples i tudak olgeta,

mi no ken pret long ol samting nogut.

Long wanem, Bikpela, yu save stap wantaim mi.

Mi lukim yu holim stik bilong wasman,

olsem na bel bilong mi i stap isi.

Bekim:

Yu redim bikpela kaikai bilong mi long ples klia
 we ol birua i ken lukim mi.
 Yu welim het bilong mi long pasin welkam.
 Yu pulapim tru kap wain bilong mi na wain i kapsait.

Bekim:

Tru tumas, Bikpela, bai yu lukautim mi,
 na yu belgut long mi olgeta de mi stap laip.
 Na bai mi stap long haus bilong yu inap mi dai.

Bekim:**Welkamim Gutnius:**

Aleluya, Aleluya
 Bikpela i kam bilong oraitim ol manmeri bilong em.
 Amamas ol manmeri i redi bilong bungim em.
 Aleluya

Gutnius**Mt 15:29-37**

Hettok: Jisas i bin oraitim planti manmeri na em i givim kaikai long 4000 man.

Harim Gutnius bilong Jisas Kraus Matyu i raitim

Jisas i wokabaut i go long arere
 bilong raunwara Galili.
 Na em i go antap long maunten na i
 sindaun.
 Na planti lain manmeri i kam long
 em.
 Na ol i bringim ol lek nogut na ol
 aipas na ol bun krungut na ol
 mauspas na planti arapela
 sikmanmeri tu, na ol i putim klostu
 long lek bilong Jisas.
 Na em i mekim ol i kamap orait.
 Na ol manmeri i lukim ol mauspas i
 toktok na ol bun krungut i kamap
 orait na ol lek nogut i wokabaut na ol
 aipas i lukluk, na ol i tingting planti.
 Na ol i litimapim nem bilong God
 bilong Israel.
 Jisas i singautim ol disaipel bilong en
 i kam, na em i tokim ol olsem,
 "Mi sori long dispela ol manmeri.
 Ol i stap wantaim mi inap tripela de
 pinis na ol i no gat kaikai.

Mi no laik bai ol i stap hangre na mi
 salim ol i go.
 Nogut ai bilong ol i raun na ol i
 pundaun long rot."
 Na ol disaipel i tokim em,
 "Dispela hap i no gat man.
 Bai yumi kisim planti bret we na
 givim kaikai long kain bikpela lain
 olsem?"
 Na Jisas i askim ol, "Yupela i gat
 hamas bret i stap?"
 Na ol i tok, "Mipela i gat 7-pela bret
 na ol wan wan liklik pis."
 Orait na Jisas i tokim ol manmeri na
 ol i sindaun long graun.
 Na em i kisim dispela 7-pela bret na
 ol pis, na em i tenkyu long God, na
 em i brukim na givim long ol
 disaipel.
 Na ol disaipel i givim long ol
 manmeri.
 Na olgeta i kaikai na i pulap.

Na ol i bungim ol liklik hap kaikai | i stap yet na pulapim 7-pela basket.

Em tasol Gutnius bilong Jisas Kraus

Fonde

Rit Namba 1

Ais 26:1-6

Hettok: Yupela ol stretpela lain manmeri na yupela ol manmeri bilong tok i tru, yupela i kam insait.

Rit i kam long buk bilong profet Aisaia

Wanpela taim bai i kamap bihain, na ol manmeri i stap long graun bilong Juda ol bai i singim dispela song. Taun bilong mipela i strongpela tru. God yet em i stap strongpela banis bilong mipela. Em i kisim bek mipela pinis na mekim mipela i win. Opim ol bikpela dua bilong taun, bai ol stretpela manmeri i ken i kam insait. Oltaim ol dispela lain i save aninit long Bikpela. Bikpela, ol i stap aninit long yu na tingting bilong ol i stap strong long yu tasol. Olsem na yu save mekim pasin bel isi i pulap tru long ol.

Bikpela em i strongpela ples hait bilong yumi. Na em bai i stap olsem oltaim. Olsem na yumi mas bilip tru long em na aninit long em oltaim. Bikpela i save daunim ol manmeri i gat biknem. Na em i save brukim ol strongpela taun, na ol i pundaun olgeta long graun. Ol dispela manmeri i bin mekim nogut long ol rabismanmeri na long ol tarangu i sot tru long ol samting. Tasol nau ol rabismanmeri i krungutim na wokabaut antap long ol hip pipia bilong ol taun i bagarap pinis.

Dispela em i tok bilong God

Song bilong Bekim

Song 118:1.8-9.19-21.25-27

Bekim: Litimapim nem bilong em i kam long nem bilong Bikpela.

Yumi mas tenkyu long Bikpela, long wanem, em i mekim gut long yumi; na em i laikim yumi oltaim. Maski long bilip long ol manmeri! Mobeta yupela i pas long Bikpela. Maski long bilip long ol king na hetman bilong graun. Mobeta yupela i pas long Bikpela.

Bekim:

Opim ol dua bilong tempel; mi laik go insait na givim tenkyu long Bikpela.

Dispela em i dua bilong Bikpela;
 ol stretpela manmeri tasol i ken i go insait.
 Mi litimapim nem bilong yu, Bikpela,
 long wanem, yu bin harim pre bilong mi
 na yu bin kisim bek mi.

Bekim:

Bikpela, mipela i askim yu long kisim bek mipela.
 Bikpela, mekim ol wok bilong mipela i kamap gutpela.
 Mipela i pre bai God i ken blesim dispela man i kam long nem bilong Bikpela.
 Mipela i litimapim nem bilong em long haus bilong Bikpela.
 Bikpela em i God na em i lukautim yumi gut.
 Yumi wokabaut na yumi karim ol han bilong diwai i go long alta.

Bekim:**Welkamim Gutnius:**

Aleluya, Aleluya
 Nau Bikpela i stap klostu long yupela na i wetim yupela, olsem na nau em i taim
 bilong yupela i mas beten long em na i go klostu long em.
 Aleluya

Gutnius**Mt 7:21.24-27**

*Hettok: Ol manmeri i bihainim laik bilong Papa bilong mi i stap long heven, ol
 tasol bai i go insait long kingdom.*

Harim Gutnius bilong Jisas Krai Matyu i raitim

Jisas i tokim ol disaipel olsem,
 "Yupela i no ken ting, olgeta
 manmeri i save kolim mi, 'Bikpela,
 Bikpela,' ol bai i go insait long
 kingdom bilong heven. Nogat.
 Ol manmeri i bihainim laik bilong
 Papa bilong mi i stap long heven, ol
 tasol bai i go insait long kingdom.
 "Orait man i harim dispela tok bilong
 mi na i bihainim, em i olsem wanpela
 man i gat gutpela tingting, na em i
 wokim haus bilong en antap long ples
 ston.
 Na ren i kam daun, na tait bilong
 wara i kamap, na win i kirap strong,

na ol dispela samting i sakim dispela
 haus.

Tasol em i no pundaun, long wanem,
 simen bilong dispela haus em i pas
 strong tru long bikpela bikpela ston
 insait long graun.

Tasol man i harim dispela tok bilong
 mi na i no bihainim, em i olsem
 wanpela longlong man i sanapim
 haus bilong en antap long wesana
 tasol.

Na ren i kam daun, na tait bilong
 wara i kamap, na win i kirap strong.
 Na ol dispela samting i sakim dispela
 haus, na em i pundaun.

Yes, em i pundaun nogut tru."

Em tasol Gutnius bilong Jisas Krai

Fraide**Rit Namba 1****Ais 29:17-24**

Hettok: Long dispela taim, ol aipas, nau ol i stap long bikpela tudak, bai ol i lukluk gen.

Rit i kam long buk bilong profet Aisaia

Bikpela i tok olsem,
 „Liklik taim nau na olgeta samting bai i senis.
 Bikbus bilong Lebanon bai i kamap gutpela graun bilong wokim gaden.
 Na ol gutpela gaden bai i kamap bikbus.
 Long dispela taim, ol yaupas bai ol inap long harim toktok bilong buk ol man i ritim.
 Na ol aipas, nau ol i stap long bikpela tudak, bai ol i lukluk gen.
 Na ol manmeri i save daunim ol yet, ol bai i amamas moa yet long Bikpela.
 Na ol manmeri i sot long ol samting, ol tu bai i amamas long God bilong Israel, em God bilong mekim gutpela na stretpela pasin olgeta.
 Tasol ol bikman nogut, na ol lain i ting tok bilong God i samting nating, na ol manmeri i laikim tumas long mekim ol pasin nogut, olgeta bai i bagarap na lus olgeta.
 Na bai wankain bagarap tasol i kamap tu long ol manmeri i save

giaman na kotim nating ol arapela na mekim ol giaman tok bilong helpim ol manmeri i gat rong, bai ol i ken paulim kot na ol stretpela manmeri i no inap winim kot.
 Olsem na Bikpela, em dispela God bipo i bin kisim bek Abraham long taim nogut, em i tok olsem long yupela manmeri bilong Israel,
 "Yupela ol lain tumbuna bilong Jekop, yupela bai i no sem moa na pes bilong yupela bai i no luk tudak moa.
 Taim yupela i lukim ol wok mi mekim namel long yupela, orait yupela bai i save tru olsem, mi God bilong Israel, mi God bilong mekim gutpela na stretpela pasin olgeta.
 Na yupela bai i litimapim nem bilong mi na stap aninit long mi.
 Na ol manmeri nau tingting bilong ol i paul, ol bai i kisim gutpela tingting.
 Na ol manmeri bilong toktok planti na sakim tok, ol bai i amamas tasol long harim ol skul bilong mi."

Dispela em i tok bilong God**Song bilong Bekim****Song 27:1.4.13-14*****Bekim: Bikpela em i lait bilong mi na em i helpim bilong mi.***

Bikpela em i lait bilong mi na em i helpim bilong mi.

Bai mi pret long husat?

Bikpela em i stronpela banis bilong mi.

Bai mi surik long husat?

Bekim:

Mi bin askim Bikpela long wanpela samting tasol.
 Dispela samting mi laikim tumas,
 bai mi ken i stap long haus holi bilong Bikpela
 olgeta de bilong laip bilong mi.
 Bai mi ken amamas long lukim haus holi bilong em
 na amamas long kisim gutpela skul bilong em.

Bekim:

Mi bilip tru, bai mi lukim ol gutpela samting bilong God
 long taim mi stap laip yet long dispela graun.
 Wetim Bikpela i kam helpim yu!
 Yu no ken bel hevi!
 Yu sanap strong na wetim Bikpela i kam helpim yu!

Bekim:**Welkamim Gutnius:**

Aleluya, Aleluya
 Harim. Bikpela bilong yumi bai i kam wantaim bikpela strong.
 Em bai i givim lait long ai bilong ol wokmanmeri bilong em.
 Aleluya

Gutnius**Mt 9:27-31**

Hettok: Tupela man aipas i bilip long Jisas na ai bilong tupela i kamap orait gen.

Harim Gutnius bilong Jisas Krai Matyu i raitim

Jisas i lusim taun Kaperneam na i wokabaut i go.
 Na tupela man aipas i bihainim em na i singaut olsem, "Yu Pikinini Bilong Devit, yu mas sori long mitupela."
 Em i go insait long haus, na dispela tupela aipas i kam long em.
 Na Jisas i askim tupela olsem,
 "Yutupela i bilip olsem mi inap mekim dispela samting, o nogat?"
 Na tupela i tokim em, "Yes, Bikpela. Mipela i bilip."
 Orait na em i putim han long ai bilong tupela na i tok olsem,

"Yutupela i bilip long mi. Olsem tasol dispela samting i ken kamap long yutupela."
 Na ai bilong tupela i op.
 Na Jisas i givim strongpela tok long tupela olsem,
 "Yutupela i no ken tru larim wanpela man i save long dispela samting i bin kamap long yutupela."
 Tasol tupela i go na tokim ol manmeri long olgeta hap bilong dispela distrik long ol gutpela wok Jisas i save mekim.

Em tasol Gutnius bilong Jisas Krai

Sarere**Rit Namba 1****Ais 30:19-21.23-26**

Hettok: Bikpela i stap redi tasol long marimari long yupela na mekim gut long yupela.

Rit i kam long buk bilong profet Aisaia

Bikpela i tok olsem,

„Yupela ol manmeri nau i stap long Jerusalem, yupela bai i no moa sori na krai.

Nau Bikpela i stap redi tasol long marimari long yupela na mekim gut long yupela.

Taim yupela i singaut na beten long em, wantu tasol em bai i harim singaut bilong yupela na helpim yupela.

I tru Bikpela bai i mekim yupela i karim bikpela hevi, na yupela bai i stap nogut tru olsem man i sot tru long kaikai na dring.

Tasol em yet bai i stap wantaim yupela na skulim yupela.

Na bai yupela i no inap painim em moa. Nogat.

Bai yupela i lukim em long ai bilong yupela yet.

Na taim yupela i wokabaut na yupela i paul long wanem rot yupela i mas bihainim, rot bilong han sut o rot bilong han kais, orait em bai i stap baksait long yupela na em bai i tokim yupela long rot yupela i mas bihainim.

Bikpela bai i salim ren i kam daun bilong givim wara long ol pikinini kaikai yupela i planim na bai ol i kamap gut tru.

Na bai yupela i gat planti kaikai.

Long dispela taim ol bulmakau bilong yupela bai i gat planti gras bilong kaikai. Na bai yupela i kisim tu ol kaikai i kam long gaden bilong yupela na redim gut tru na givim long ol bulmakau na ol donki i save mekim wok bilong brukim graun bilong yupela.

Long taim Bikpela i makim pinis, taim nogut tru bai i kamap long ol birua bilong yupela na bai ol i dai nabaut, na olgeta strongpela banis bilong ol bai i bagarap olgeta.

Na long dispela taim ol wara bai i kamap long ol maunten na ran i kam daun na bai yupela i no sot moa long wara.

Long dispela taim mun bai i lait strong olsem san.

Na san bai i lait strong moa yet na lait bilong en bai i kamap bikpela tru i winim lait oltaim em i save givim.

I olsem yu bungim lait bilong san bilong 7-pela de wantaim na mekim em i lait long wanpela de tasol.

Dispela ol samting bai i kamap long taim Bikpela i mekim gut gen long ol manmeri bilong en na pinisim ol hevi na pen em i bin givim ol.“

Dispela em i tok bilong God

Song bilong Bekim**Song 147:1-2.3-4.5-6**

Bekim: *Ol manmeri i bilip long Bikpela na i wetim em i helpim ol,
ol i ken amamas.*

Yumi mas singim song bilong litimapim nem bilong God bilong yumi,
long wanem, em i mekim gut long yumi.
Singsing amamas long God, em i save laikim yumi.
Yumi litimapim nem bilong em.
Bikpela i sanapim bek Jerusalem.
Em i bungim wantaim olgeta lain Israel i bin stap kalabus.

Bekim:

Em i oraitim ol manmeri, bel bilong ol i hevi na em i pasim ol sua bilong ol.
Em i makim namba bilong olgeta sta
na i kolim wan wan long nem bilong em stret.

Bekim:

Bikpela bilong yumi i gat biknem na i gat olgeta strong.
Yumi no inap skelim save bilong em.
Bikpela i save litimapim ol manmeri i nogat nem,
tasol em i daunim ol hambak manmeri.

Bekim: *Ol manmeri i bilip long Bikpela na i wetim em i helpim ol,
ol i ken amamas.*

Welkamim Gutnius:

Aleluya, Aleluya
Bikpela yet bai i stap king bilong yumi na em yet bai i givim ol lo long yumi na
lukautim yumi.
Aleluya

Gutnius**Mt 9:35-10:1.6-8**

Hettok: Jisas i lukim ol bikpela lain manmeri, na em i sori tru long ol.

Harim Gutnius bilong Jisas Krai Matyu i raitim

Jisas i go raun long olgeta taun na
ples. Em i skulim ol manmeri insait
long ol haus lotu bilong ol.
Em i autim gutnius bilong kingdom
bilong God, na em i mekim orait
olgeta kain sik i stap long bodi bilong
ol.
Em i lukim ol bikpela lain manmeri,
na em i sori tru long ol, long wanem,
tingting bilong ol i paul nabaut, na ol
i stap nogut tru, olsem ol sipsip i no
gat wasman.

Olsem na em i tokim ol disaipel
bilong en olsem,
"Planti kaikai tumas i mau pinis long
gaden, tasol i no gat planti wokman i
stap bilong kisim.
Olsem na yupela i mas beten long
Papa bilong gaden, bai em i salim ol
wokman i go bungim kaikai bilong
en."
Jisas i singautim ol 12-pela disaipel
bilong en i kam, na em i givim strong
long ol bilong rausim ol spirit nogut i

stap long ol manmeri, na bilong mekim orait olgeta kain sik bilong ol manmeri.

Na Jisas i givim toktok long ol olsem, „Yupela i mas i go long ol sipsip bilong lain Israel, ol i lus pinis.

Yupela go na autim tok olsem, ‘Kingdom bilong heven em i kam klostu pinis.’

Yupela go mekim orait ol manmeri i gat sik, na kirapim ol manmeri i dai

pinis, na mekim ol manmeri i gat sik lepra i kamap klin, na rausim ol spirit nogut i stap long ol manmeri.

Samting yupela i bin kisim, em yupela i kisim nating, na i no gat pe bilong en.

Olsem na yupela i mas givim nating long ol manmeri.

Yupela i no ken kisim pe long en.“

Em tasol Gutnius bilong Jisas Kraus

Mande

Rit Namba 1

Ais 35:1-10

Hettok: God bai i kam na kisim bek yupela.

Rit i kam long buk bilong profet Aisaia

Ples wesan nating wantaim ples drai bai ol i amamas tru, long wanem, ol naispela plaua bai i kamap na karamapim ol dispela hap.

Na ples drai bai i luk nais tru, na em bai i singaut wantaim bikpela amamas.

Planti naispela samting tru bai i kamap, na ples bai i luk nais moa yet olsem bikbus bilong Lebanon na olsem ples daun bilong Saron.

Na ol manmeri bai i lukim strong na biknem na gutpela bilas bilong God, Bikpela bilong yumi.

Yupela i mas strongim ol manmeri i no gat strong na strongim tu bel bilong ol manmeri i pret na guria.

Tokim ol manmeri bel na tingting bilong ol i no strong olsem,

"Yupela i mas sanap strong na i no ken pret. God bai i kam na kisim bek yupela na mekim save tru long ol birua bilong yupela."

Orait na ol aipas bai ol i lukluk, na ol yaupas bai ol i harim toktok.

Na ol lek nogut bai ol i kalap olsem ol dia, na ol mauspas bai ol i singaut na amamas.

Na ol wara bai i kamap long ples wesan nating na ran i go long olgeta hap.

Na ples wesan nating bai i kamap olsem raunwara.

Na wara bai i kamap tu long aninit bilong graun i drai pinis.

Na planti gras na ol pitpit samting bai i kamap long ol ples bipo i drai tru na ol weldok tasol i bin i stap long ol.

Na bai i gat wanpela bikrot long dispela hap.

Bai ol i kolim dispela bikrot olsem, "Bikrot Bilong God Yet."

Na ol manmeri i no klin long ai bilong God, ol bai i no inap wokabaut long dispela rot. Nogat tru.

Em bai i stap rot bilong ol manmeri bilong God tasol.

Na ol longlong manmeri bilong mekim pasin nogut, ol bai i no inap i go klostu long en.

Bai i no gat ol laion na ol animal nogut i bihainim dispela rot na wokabaut. Nogat.

Ol manmeri God i kisim bek pinis, ol tasol bai i wokabaut long dispela rot.

Na ol manmeri Bikpela i kisim bek pinis, ol bai i amamas na kam bek long Jerusalem, na ol bai i singim song na bikmaus i kam long dispela rot.

Na bai ol i gat gutpela sindaun tru na ol i amamas moa yet, na dispela amamas bilong ol bai i no inap pinis.

Na pen na bel hevi bai i no inap i stap wantaim ol moa.

Dispela em i tok bilong God

Song bilong Bekim

Song 85:9-10.11-12.13-14

Bekim: God bilong mipela bai i kam na kisim bek mipela.

Bai mi harim ol tok Bikpela i autim.

Em i tok long givim bel isi na gutpela taim long ol pipel na ol pren bilong em, na long ol manmeri i tanim bel na i bihainim lo bilong em.

Em i save sambai long ol manmeri i lotu long em, na strong na biknem bilong em bai i stap long kantri bilong mipela.

Bekim:

Marimari na promis bilong God i kamap tru, na stretpela pasin na bel isi bai i bung wantaim.

Gutpela pasin i kamap olsem kru i kamap long graun, na stretpela pasin bilong Bikpela bai i kamap ples klia long skai.

Bekim:

Bikpela bai i mekim mipela i win, na graun bilong mipela bai i karim planti kaikai.

Pasin holi bai i go pas long Bikpela, na pasin bel isi i bihainim em.

Bekim:

Welkamim Gutnius:

Aleluya, Aleluya

Harim. King bai i kam. Em i Bikpela bilong olgeta hap bilong graun.

Em bai i kam na em i mekim yumi i kamap fri.

Aleluya

Gutnius

Lu 5:17-26

Hettok: Nau yumi lukim ol narakain samting tru i kamap.

Harim Gutnius bilong Jisas Krais Luk i raitim

Wanpela de Jisas i skulim ol manmeri i stap, na ol Farisi na ol tisa bilong lo ol i sindaun i stap.

Ol i bin lusim taun Jerusalem na olgeta ples bilong distrik Galili na Judia na ol i kam.

Na strong bilong Bikpela em i stap long Jisas na em i wok long mekim orait ol sikmanmeri.

Na sampela man i karim wanpela man i kam.

Ol bun bilong dispela man i dai olgeta, na em i slip i stap long wanpela bet.

Ol i laik karim em i go insait long haus na putim em klostu long Jisas, tasol planti manmeri i stap na ples i pas, na i no gat rot bilong karim sikman i go insait.

Olsem na ol i go antap long rup bilong dispela haus Jisas i stap long en.

Na ol i rausim hap bilong rup, na ol i slekim bet dispela man i slip long en i go daun namel long ol manmeri, na ol i putim em i stap long pes bilong Jisas.

Jisas i lukim olsem ol i bilip tru, na em i tok, "Pren, mi lusim pinis ol sin bilong yu."

Ol saveman bilong lo na ol Farisi i harim dispela tok, orait ol i toktok planti olsem,

"Dispela man em i husat na em i laik kisim ples bilong God na i mekim dispela tok?

I no gat wanpela man em inap long lusim sin.

Em i wok bilong God wanpela tasol."

Jisas i save pinis long tingting bilong ol, na em i bekim tok olsem long ol,

"Bilong wanem yupela i gat dispela kain tingting long bel bilong yupela?

Wanem tok em i isi long mi mekim?

Em i isi long mi tok, 'Mi lusim ol sin bilong yu,' o em i isi long mi tok, 'Yu kirap na wokabaut'?

Tasol mi laik bai yupela i save olsem, Pikinini Bilong Man em i gat strong long dispela graun, na em inap long lusim ol sin."

Orait na Jisas i lukluk i go long dispela man bun bilong en i dai olgeta na i tokim em olsem, "Mi tokim yu, yu kirap na kisim bet bilong yu, na yu go long haus bilong yu."

Na wantu tasol dispela man i kirap long ai bilong ol dispela manmeri, na em i kisim bet em i bin slip long en.

Na em i wok long litimapim nem bilong God na i wokabaut i go long haus bilong en.

Na olgeta manmeri i kirap nogut tru long lukim dispela samting.

Bel bilong ol i kirap long lukim bikpela strong bilong God na ol i litimapim nem bilong God na tok olsem, "Nau yumi lukim ol narakain samting tru i kamap."

Em tasol Gutnius bilong Jisas Kraus

Tunde

Rit Namba 1

Ais 40:1-11

Hettok: God i strongim bel bilong ol manmeri bilong en, na mekim bel bilong ol i stap isi.

Rit i kam long buk bilong profet Aisaia

God bilong yupela i tok,
 "Strongim bel bilong ol manmeri
 bilong mi, na mekim bel bilong ol i
 stap isi.

Givim dispela gutpela tok long ol
 manmeri bilong Jerusalem.

Tokim ol olsem, taim bilong ol long i
 stap kalabus, em i pinis.

Mi Bikipela, mi bin mekim save tru
 long ol bilong bekim asua bilong ol
 rong ol i bin mekim, na nau mi lusim
 pinis olgeta sin bilong ol."

Wanpela maus i singaut olsem,

"Stretim rot bilong Bikipela long
 ples i no gat man.

Redim bikipela rot bilong God
 bilong yumi.

Pulapim olgeta ples daun, na
 brukim olgeta maunten i go
 daun.

Olgeta rot i krungut, ol i mas
 wokim i kamap stret.

Na olgeta rot i no gutpela, ol i
 mas stretim gut.

Na bikipela lait na strong bilong
 Bikipela bai i kamap ples klia, na
 olgeta manmeri bilong graun bai
 i lukim.

Dispela tok i kam long maus
 bilong Bikipela yet."

Wanpela maus i singaut olsem,
 "Autim tok."

Na narapela i tok, "Wanem tok bai mi
 autim?"

Na em i bekim tok olsem,

"Olgeta manmeri i no save stap
 longpela taim long graun.

Ol i save pinis hariap olsem gras na
 biknem bilong ol i save pundaun
 olsem ol plaua nabaut.

Gras i save drai na ol plaua i save
 pundaun long taim Bikipela i salim
 hatpela win i kam long ol.

Tru tumas, ol manmeri i save pinis
 hariap olsem gras.

Gras i save drai, na ol plaua i save
 pundaun. Tasol tok bilong God
 bilong yumi i save stap oltaim
 oltaim."

Jerusalem, yu go antap long bikipela
 maunten, na autim gutnius.

Saion, yu mas singaut strong na autim
 dispela gutnius.

Yu mas tokaut, na yu no ken pret.

Yu mas tokim ol taun bilong Juda
 olsem, "Lukim, God bilong yupela i
 kam nau."

Lukim. God, Bikipela i kam wantaim
 bikipela strong bilong en.

Em i daunim pinis ol birua na em i
 bringim ol manmeri bilong en i kam
 olsem ol gutpela samting em i bin
 winim long pait.

Em i save was gut long ol lain
 manmeri bilong en, olsem wasman
 bilong sipsip i save lukautim ol sipsip
 bilong en.

Wasman i save putim ol pikinini
 sipsip long bros na karim wokabaut.

Na em i save wokabaut isi na soim
 rot long ol sipsip i gat liklik pikinini.

Dispela em i tok bilong God

Song bilong Bekim

Song 96:1-2.3.10.11-12.13

Bekim: God i kam wantaim bikipela strong bilong en.

Singim nupela song bilong litimapim nem bilong Bikipela.

Olgeta hap bilong graun i mas singim song long Bikipela.

Opim maus na singsing amamas long nem bilong em.

Long olgeta de telimautim dispela gutpela nius,

Bikpela i bin kisim bek yumi.

Bekim:

Autim stori bilong biknem bilong em long olgeta kantri,
na tokaut long ol bikpela wok bilong em namel long olgeta lain manmeri.
Yupela i mas tokaut olsem, "Bikpela em wanpela i king."
Em yet i sanapim graun na graun i no inap surik liklik.
Em bai i skelim ol manmeri long stretpela pasin.

Bekim: God i kam wantaim bikpela strong bilong en.

Skai na graun, yupela i mas amamas.
Biksolwara wantaim ol samting i stap insait long solwara,
yupela i mas pairap na singsing amamas.
Ol gaden wantaim ol kaikai i stap long gaden,
yupela i mas amamas tru.
Olgeta diwai bilong bus, yupela i mas belgut na singsing.

Bekim:

Long wanem, Bikpela i kam nau.
Em i kam bilong bosim graun.
Em bai i bosim olgeta kantri long stretpela pasin,
na skelim ol manmeri long tok tru.

Bekim:

Welkamim Gutnius:

Aleluya, Aleluya
De bilong Bikpela i stap klostu.
Em i kam bilong oraitim yumi.
Aleluya

Gutnius

Mt 18:12-14

Hettok: God no laik bai wanpela bilong ol dispela liklik pikinini i lus.

Harim Gutnius bilong Jisas Krai Matyu i raitim

Jisas i tokim ol disaipel olsem,
"Yupela i ting wanem?
Sapos wanpela man i gat 100 sipsip,
na sapos wanpela sipsip i lus, ating
bai em i no wok long painim, a?
Nogat. Bai em i lusim ol 99 sipsip i
stap long maunten, na bai em i go
painim dispela wanpela sipsip i lus.

Mi tok tru long yupela, sapos em i
kisim sipsip pinis, orait bai em i
amamas moa yet.

Em i save amamas long ol 99 sipsip i
no bin lus, tasol taim em i kisim bek
dispela wanpela sipsip i bin lus,
amamas bilong en bai i moa moa yet.
Olsem tasol Papa bilong yupela i stap
long heven em i no laik bai wanpela
bilong ol dispela liklik pikinini i lus."

Em tasol Gutnius bilong Jisas Krai

Trinde

Rit Namba 1

Ais 40:25-31

Hettok: Ol manmeri i bilip long Bikpela na i wetim em i helpim ol, ol bai i stap strong oltaim.

Rit i kam long buk bilong profet Aisaia

Mi Bikpela, mi God bilong mekim gutpela na stretpela pasin olgeta, na husat tru i olsem mi?

I gat wanpela man i stap i save mekim wankain pasin olsem mi, a?

Yupela lukluk i go antap long skai na lukim ol sta samting i stap antap.

Husat tru i bin wokim ol?

Em Bikpela tasol.

Ol dispela samting i olsem lain ami bilong Bikpela.

Em i save long namba bilong ol, na em i save long nem bilong wan wan bilong ol, na em i save kolim ol long nem bilong ol.

Em i gat olgeta strong, olsem na i no gat wanpela bilong ol dispela samting inap lus.

Yupela Israel, yupela ol lain bilong Jekop, bilong wanem yupela i save toktok planti olsem,

"Bikpela bilong mipela i no save lukim hevi bilong mipela. Mipela i

bungim taim nogut, tasol em i no laik helpim mipela."

Ating yupela i no save, a?

Ating yupela i no harim, a?

Bikpela em i God bilong i stap oltaim oltaim. Em i mekim kamap olgeta samting long olgeta hap bilong graun. Na i no gat man inap long save long olgeta tingting bilong em.

Strong bilong en i no save slek na pinis.

Bikpela i save strongim ol manmeri i no gat strong, na taim bun bilong ol i slek pinis, em i save mekim ol i stap strong.

Strong bilong ol strongpela yangpela manmeri i save slek na pinis.

Tasol ol manmeri i bilip long Bikpela na i wetim em i helpim ol, ol bai i stap strong oltaim.

Na bai ol i flai olsem ol tarangau.

Bai ol i ran na ol i no inap sotwin, na bai ol i wokabaut na ol i no inap les.

Dispela em i tok bilong God

Song bilong Bekim

Song 103:1-2.3-4.8.10

Bekim: Spirit bilong mi, yu mas litimapim nem bilong Bikpela.

Spirit bilong mi, yu mas litimapim nem bilong Bikpela.

Lewa bilong mi, yu mas litimapim nem holi bilong em.

Spirit bilong mi, yu mas givim tenkyu long Bikpela, na yu no ken lus tinting long olgeta blesim bilong em.

Bekim:

Em yet i pogivim olgeta sin bilong mi, na i oraitim olgeta sik bilong mi.

Em yet i helpim mi long abrusim indai;
em i laikim mi tru na em i marimari oltaim.

Bekim: Spirit bilong mi, yu mas litimapim nem bilong Bikpela.

Bikpela i save sori na marimari.

Em i no save belhat kwik.

Em i no mekim save long yumi inap long skel

bilong ol rong bilong yumi,

na em i no bekim bek long mak bilong ol sin bilong yumi.

Bekim:

Welkamim Gutnius:

Aleluya, Aleluya

Bikpela bai i kam bilong kisim bek ol manmeri bilong en.

Amamas ol manmeri i redi bilong bungim em.

Aleluya

Gutnius

Mt 11:28-30

Hettok: Yupela ol manmeri i save hatwok tru na i karim ol bikpela hevi, yupela olgeta kam long mi.

Harim Gutnius bilong Jisas Krai Matyu i raitim

Jisas i tokim ol manmeri olsem,

"Yupela ol manmeri i save hatwok tru na i karim ol bikpela hevi, yupela olgeta kam long mi na bai mi givim malolo long yupela.

Yupela kisim save long mi na aninit long tok bilong mi, olsem yupela i kisim plang ol i save putim long nek bilong ol bulmakau bilong ol i ken pulim ol samting.

Yupela kisim save long mi, long wanem, mi save mekim pasin isi long ol manmeri na mi save daunim mi yet.

Na bai ol samting i no ken givim hevi long yupela na bai yupela i kisim malolo.

Dispela plang mi putim long nek bilong yupela, em i isi long karim, na samting mi givim yupela bilong karim, em i no hevi."

Em tasol Gutnius bilong Jisas Krai

Fonde

Rit Namba 1

Ais 41:13-20

Hettok: Mi God bilong yupela Israel, mi God bilong mekim gutpela na stretpela pasin olgeta, bai mi kisim bek yupela.

Rit i kam long buk bilong profet Aisaia

Mi God, Bikpela bilong yupela.
Mi save sambai long yupela na mi
tokim yupela olsem, yupela i no ken
pret. Bai mi helpim yupela.

"Maski yupela Israel i liklik lain, na
yupela i no gat strong, mi kisim bek
yupela, na bai mi sambai long yupela
na helpim yupela.

Mi God bilong yupela Israel, mi God
bilong mekim gutpela na stretpela
pasin olgeta, bai mi kisim bek yupela.
Bai mi mekim yupela i kamap olsem
nupela plang bilong krungutim wit na
bai yupela inap daunim ol samting i
pasim rot bilong yupela na i givim
hevi long yupela.

I olsem yupela i gat strong bilong
brukim ol maunten na mekim ol i
kamap olsem das.

Yupela bai i tromoi ol dispela hevi
olsem man i tromoi das i go antap na
win i karim i go olgeta.

Orait na bai yupela i amamas long
mi, Bikpela.

Na bai yupela i litimapim nem bilong
mi, God bilong Israel, mi God bilong

mekim gutpela na stretpela pasin
olgeta.

Taim ol tarangu manmeri bilong mi i
sot long wara na nek bilong ol i drai
tru long dring wara, na ol i singaut
long mi, orait mi Bikpela bai mi
harim pre bilong ol.

Mi God bilong Israel, bai mi no inap
lusim tingting long ol.

Bai mi mekim ol wara i kamap long
ol maunten i drai pinis, na ol hul wara
i kamap long ol ples daun.

Na bai mi mekim ol raunwara i
kamap long ples drai.

Na ol ples i no gat wara, ol bai i gat
planti wara.

Bai mi mekim ol diwai sida na ol
diwai pain na diwai oliv na diwai
saipres na ol arapela kain diwai i
kamap long ples wesana nating.

Na ol manmeri bai i lukim na ol bai i
save olsem, mi God, Bikpela bilong
Israel, mi God bilong mekim gutpela
na stretpela pasin olgeta, mi yet mi
mekim ol dispela samting i kamap.

Dispela em i tok bilong God**Song bilong Bekim****Song 145:1.9.10-11.12-13**

***Bekim: Bikpela em i gutpela tru na em i pulap long marimari.
Em i no save kros hariap.***

Bai mi litimapim nem bilong yu, God na King bilong mi.
Bai mi tok tenkyu long yu oltaim oltaim.
Bikpela i save mekim gut long olgeta manmeri
na em i save sori long olgeta samting em i bin wokim.

***Bekim: Bikpela em i gutpela tru na em i pulap long marimari.
Em i no save kros hariap.***

Bikpela, olgeta samting yu wokim pinis i mas tok amamas long yu.
Olgeta manmeri bilong yu bai i tok tenkyu long yu.
Ol bai i tok long biknem na pawa bilong yu,
na ol i stori long strong bilong yu.

Bekim:

Olgeta manmeri i ken save long ol bikpela wok bilong yu,
na ol i ken lukim, yu stap strongpela king, na nem bilong yu i bikpela tru.
Yu stap king inap oltaim na ol lo bilong yu bai i no inap pinis.

Bekim:**Welkamim Gutnius:**

Aleluya, Aleluya

Yu skai, na yupela ol klaut, yupela salim dispela stretpela Man i kam daun olsem ren i pundaun long graun.

Olsem na graun i ken kamapim dispela stretpela Man bilong kisim bek mipela.
Aleluya

Gutnius**Mt 11:11-15**

Hettok: Jon Bilong Baptais i winim olgeta manmeri i bin kamap long graun.

Harim Gutnius bilong Jisas Krai Matyu i raitim

Jisas i tokim ol manmeri olsem,
„Mi tok tru long yupela, Jon Bilong Baptais em i winim olgeta manmeri i bin kamap long graun.

Tasol man o meri i stap liklik tru long kingdom bilong heven, em i winim Jon.

"Stat long taim Jon Bilong Baptais i autim tok na i kam inap nau, ol strongpela manmeri bilong pait i bin wok strong long kisim kingdom bilong heven, na ol i bin mekim

olkain pasin bilong pait na givim planti hevi long en.

Olgeta profet, na buk bilong lo tu, ol i bin autim tok bilong God inap long taim Jon i kamap.

Na sapos yupela i laik harim, orait harim.

Buk bilong God i tok olsem profet Elaija i mas i kam, em i tok long Jon tasol.

Man o meri i gat yau em i mas harim dispela tok.“

Em tasol Gutnius bilong Jisas Krai

Fraide**Rit Namba 1****Ais 48:17-19**

Hettok: Yupela i mas harim tok bilong mi na bihainim.

Rit i kam long buk bilong profet Aisaia

God, Bikpela bilong Israel, em God bilong mekim gutpela na stretpela pasin olgeta, na em Man bilong sambai long yupela na helpim yupela, em i tok olsem,

"Mi God, Bikpela bilong yupela.

Oltaim mi save skulim yupela na soim yupela long ol stretpela pasin yupela i mas bihainim na bai yupela i stap gut.

Sapos yupela i bin harim tok bilong mi, orait nau yupela inap i stap gut na oltaim laip bilong yupela bai i pulap long amamas, olsem wara i ran oltaim na i no save pinis.

Na stretpela pasin bilong yupela bai i kamap strong oltaim olsem solwara i save bruk long nambis.

Na ol pikinini bilong yupela inap kamap planti tumas olsem wesan bilong nambis.

Na mi inap was gut long ol na nem bilong ol i no pinis olgeta long dispela graun."

Dispela em i tok bilong God

Song bilong Bekim

Song 1:1-2.3.4.6

Bekim: Ol manmeri i save bihainim Bikpela, ol bai i no inap wokabaut long tudak. Nogat. Ol bai i gat lait bilong laip.

Ol dispela kain manmeri i ken amamas tru,
ol i no save bihainim tok gris bilong ol manmeri nogut,
na i no save wokabaut long rot bilong ol sinmanmeri,
na i no save sindaun toktok wantaim ol manmeri i givim baksait long God.
Ol i laikim lo bilong God moa
na i save tingting long dispela lo long san na long nait.

Bekim:

Ol dispela manmeri i olsem ol diwai ol i bin planim
klostu long wara i save ran oltaim.
Ol i save karim kaikai long taim bilong en.
Na lip bilong ol i no save drai.
Olgeta samting ol dispela manmeri i mekim, i save kamap gutpela tru.

Bekim:

Tasol ol manmeri nogut ol i no olsem. Nogat.
Ol i olsem lip bilong diwai, win bai rausim ol i go.
Bikpela i save stiaim wokabaut bilong ol stretpela manmeri.
Tasol ol manmeri nogut bai ol i lus olgeta.

Bekim: Ol manmeri i save bihainim Bikpela, ol bai i no inap wokabaut long tudak. Nogat. Ol bai i gat lait bilong laip.

Welkamim Gutnius:

Aleluya, Aleluya
Bikpela bai i kam, orait yupela i go bungim em.
Em i king i bringim gutpela taim i kam.
Aleluya

*Hettok: Ol i no putim yau long tok bilong Jon
na long tok bilong Pikinini Bilong Man.*

Harim Gutnius bilong Jisas Krai Matyu i raitim

Jisas i tokim ol manmeri olsem,
"Sapos mi laik tokaut long pasin
bilong ol manmeri bilong dispela
taim, bai mi mekim wanem kain tok
piksa?"

Ol i olsem ol pikinini i sindaun i stap
long ol ples bung na i singaut long ol
arapela pikinini olsem,

'Mipela i winim mambu bilong
yupela i ken singsing, tasol yupela i
no laik singsing. Na mipela i mekim
singsing sori, tasol yupela i no laik
sori na krai.' "

Na Jisas i tok moa olsem,

"Jon i kam, na em i no save kaikai
planti na em i no save dring wain.

Na ol i tok, 'Spirit nogut i stap long
en.'

Na Pikinini Bilong Man i kam, na em
i kaikai na i dring, na ol i tok,

'Lukim, em i man bilong kaikai planti
tumas, na em i man bilong dring
planti wain tumas. Em i pren bilong
ol man bilong kisim takis na bilong ol
manmeri bilong mekim sin.'

Ol i save tok olsem, tasol ol wok
bilong God i soim olsem save bilong
en em i samting tru."

Em tasol Gutnius bilong Jisas Krai

Sarere

Rit Namba 1

Sir 48:1-4.9-11

Hettok: Elaija bai i kam bek gen.

Rit i kam long buk bilong Jisas Sirak

Long dispela taim profet Elaija i
kamap. Em i hatpela man, na ol
toktok bilong en i olsem paia.

Em i kamapim taim bilong hangre,
olsem na long wok bilong em, planti
manmeri i dai.

Em i pre strong long Bikipela na ren i
no pundaun.

Na tripela taim em i singautim paia i
pundaun.

Elaija, yu nambawan tru, long
wanem, yu bin wokim ol bikipela
mirakel.

I no gat wanpela man i winim yu.

Taim yu go long heven, wanpela
karis wantaim hos i lait olsem paia i

kisim yu, na wanpela raunwin i pulim
dispela karis i go antap.

Buk bilong God i tok, bai yu kam bek
long taim Bikipela i makim.

Bai yu mekim kol belhat bilong
Bikipela, nogut kros bilong en i pairap
olgeta.

Na bai yu mekim papa i wanbel gen
wantaim pikinini bilong em, na bai yu
bringim bek ol lain bilong Jekop.

Ol manmeri i lukim yu pinis, ol i ken
amamas, na ol manmeri yu bin
helpim, ol i ken i stap bel isi, na bai
mipela tu i ken painim gutpela taim.

Dispela em i tok bilong God

Song bilong Bekim

Song 80:2-3.15-16.18-19

Bekim: God, bringim mipela i kam bek long yu.

Mekim pes bilong yu i lait long mipela na mipela i ken i stap gut.

Wasman bilong Israel, harim mipela,
yu sindaun long sia king antap long ol ensel.
Kam soim yu yet long ol manmeri bilong yu.
Bikpela, soim strong bilong yu; kam na kisim bek mipela.

Bekim:

God I Gat Olgeta Strong, yu tingim mipela gen,
lukadaun long mipela na kam helpim mipela.
Lukautim dispela rop wain yu yet i bin planim,
na han bilong yu i bin mekim em i kamap bikpela.

Bekim:

Putim han bilong yu antap long ol manmeri
yu bin makim bilong yu yet, em lain manmeri yu bin strongim.
Lukautim gut laip bilong mipela,
bai mipela inap litimapim nem bilong yu,
na mipela i no ken lusim yu gen.

Bekim:

Welkamim Gutnius:

Aleluya, Aleluya
Redim rot bilong Bikpela. Stretim ol rot bilong en. Na olgeta manmeri bilong
graun bai i lukim wok God i mekim bilong kisim bek yumi.
Aleluya

Gutnius

Mt 17:10-13

Hettok: Elaija em i kam pinis, na ol manmeri i no bin save long em. Nogat.

Harim Gutnius bilong Jisas Krai Matyu i raitim

Ol disaipel i askim Jisas olsem,
"Bilong wanem ol saveman bilong lo
i save tok long Elaija i mas i kam
pastaim?"
Na Jisas i bekim tok olsem,
"Dispela tok em i tru. Elaija em i mas
i kam na stretim bek olgeta samting.

Tasol mi tokim yupela olsem, Elaija
em i kam pinis, na ol manmeri i no
bin save long em. Nogat.
Ol i bihainim laik bilong ol yet na ol i
mekim ol kain kain pasin long em.
Na long wankain pasin bai ol i mekim
nogut long Pikinini Bilong Man."
Jisas i tok olsem, na ol disaipel i save,
em i toktok long Jon Bilong Baptais.

Em tasol Gutnius bilong Jisas Kraus**Mande (Wik 3)**

Long ol de bilong Desemba 17-24 i gat ol rit bilong ol dispela de yet.
Lukim pes 41

Rit Namba 1***Nam 24:2-7.15-17****Hettok: Wanpela sta bai i kamap long lain bilong Jakob.***Rit i kam long buk bilong Ol Namba**

Taim Balam i lukim ol haus sel bilong ol wan wan lain bilong Israel i stap, spirit bilong God i kam long em na em i autim tok profet olsem, "Harim dispela tok bilong mi. Mi, Balam, pikinini man bilong Beor. Ai bilong mi i klia tru na mi save lukluk gut. Na mi save harim tok God i autim. God I Gat Olgeta Strong i mekim samting olsem driman i kamap long mi, na mi lukluk strong na mi lukim dispela samting klia tumas. Mi lukim ol haus sel bilong ol Israel, na ol i gutpela tru. Ol dispela haus sel i olsem ol longpela lain diwai det, na olsem ol gaden i stap long arere bilong bikpela wara, na olsem ol gutpela diwai Bikpela i bin planim, na olsem ol diwai sida i stap long arere bilong wara. Bai planti ren i kam daun long kantri Israel, na bai ol Israel i planim kaikai bilong ol long gutpela graun.

Strong na biknem bilong king bilong Israel bai i winim strong na biknem bilong King Agak. Na king bilong Israel bai i bosim planti lain manmeri." Na Balam i autim gen tok profet na em i tok olsem, "Harim dispela tok bilong mi, Balam, pikinini man bilong Beor. Ai bilong mi i klia tru na mi save lukluk gut. Na mi save harim tok God i autim, na mi kisim olkain save God Antap Tru i givim mi. God I Gat Olgeta Strong i mekim wanpela samting olsem driman i kamap long mi na mi lukim dispela samting klia tumas. Mi lukim ol samting bai i kamap bihain. Na mi lukim ol Israel i stap. Wanpela sta bai i kamap long lain bilong Jakob na wanpela king i gat biknem na strong bai i kamap long lain bilong Israel.

Dispela em i tok bilong God***Song bilong Bekim******Song 25:4-5.6-7.8-9******Bekim: Bikpela, skulim mi long olgeta rot bilong yu.****Bikpela, skulim mi long stretpela pasin bilong yu.*

Lainim mi long olgeta rot bilong yu.
 Stiaim lek bilong mi, bai mi ken wokabaut long rot i tru.
 Long wanem, yu God bilong kisim bek mi.
 Mi wetim yu oltaim.

Bekim:

Bikpela, yu mas tingim marimari na sori bilong yu,
 yu bin soim long mipela bipo yet.
 Yu no ken tingim ol rong na asua mi bin mekim
 long taim mi yangpela yet.
 Bikpela, oltaim yu save laikim mi.
 Yu ken tingim mi nau,
 long wanem, yu pulap long pasin marimari.

Bekim:

Bikpela em i gutpela na stretpela olgeta.
 Em i skulim ol sinmanmeri long pasin ol i mas bihainim.
 Em i save stiaim ol manmeri i gat daunpasin long stretpela rot
 na em i save skulim ol long gutpela pasin bilong em.

Bekim:**Welkamim Gutnius:**

Aleluya, Aleluya
 Bikpela, soim marimari bilong yu long mipela,
 helpim mipela na kisim bek mipela.
 Aleluya

Gutnius**Mt 21:23-27**

Hettok: Taim Jon i baptaisim ol manmeri, em i kisim dispela pasin we?

Harim Gutnius bilong Jisas Krai Matyu i raitim

Jisas i go insait long banis bilong
 tempel na i skulim ol manmeri.
 Na ol bikpris wantaim ol hetman
 bilong ol Israel ol i kam long em na
 ol i askim em olsem,
 "Yu kisim dispela namba na strong
 we na yu mekim ol dispela samting?
 Husat i givim dispela namba long yu
 na i tokim yu long mekim dispela
 wok?"
 Na Jisas i bekim tok bilong ol olsem,
 "Mi tu mi laik askim yupela long
 wanpela samting.
 Na sapos yupela i bekim stret askim
 bilong mi, orait bai mi tokim yupela

long husat i givim mi namba bilong
 mekim dispela wok.
 Taim Jon i baptaisim ol manmeri, em
 i kisim dispela pasin we?
 Em i samting bilong heven, o em i
 samting bilong ol man tasol?"
 Orait ol i toktok long ol yet olsem,
 "Sapos yumi tok, 'Em i samting
 bilong heven,' em bai i askim yumi
 olsem, 'Orait bilong wanem yupela i
 no bin bilip long em?'
 Na sapos yumi tok, 'Em i samting
 bilong ol man tasol,' orait yumi mas
 pret long ol manmeri, long wanem,
 olgeta i ting Jon em i profet."

Olsem na ol i bekim tok bilong Jisas olsem, "Mipela i no save."
Na Jisas i tokim ol olsem, "Mi tu mi no ken tokim yupela long husat i

givim mi namba na mi mekim dispela wok."

Em tasol Gutnius bilong Jisas Kraus

Tunde

Long ol de bilong Desemba 17-24 i gat ol rit bilong ol dispela de yet.
Lukim pes 41

Rit Namba 1

Sef 3:1-2.9-13

Hettok: God i promis bilong salim Mesaia i kam long ol tarangu.

Rit i kam long buk bilong profet Sefanaia

Bikpela i tok olsem,
„Jerusalem, yu bai bagarap.
Pasin bilong ol manmeri bilong yu i sting tru long ai bilong Bikpela.
Ol i save sakim tok bilong en, na ol i wok long mekim nogut long ol lain bilong ol yet.
Ol i no bin harim tok bilong Bikpela, na ol i no laikim Bikpela i stretim ol.
Na ol i no bilip strong long Bikpela na ol i no askim Bikpela long helpim ol.
Orait, bai mi senisim tingting bilong ol manmeri bilong olgeta kantri.
Tingting bilong ol bai i kamap nupela na bai ol i pre long mi wanpela tasol.
Na bai olgeta i wanbel na bihainim tok bilong mi.
Na olgeta manmeri bilong mi, em mi bin salim ol i go i stap nabaut long Sudan na long ol arapela kantri, ol bai i bringim ol ofa i kam long mi.
Ol manmeri bilong mi, i tru yupela i bin sakim tok bilong mi.

Tasol taim mi mekim ol dispela samting i kamap, bai yupela i no ken sem moa long ol pasin bilong yupela.
Long wanem, bai mi rausim olgeta manmeri bilong yupela i save hambak na bikhet.
Na bai yupela i stap long Jerusalem long dispela maunten bilong mi, na bai yupela i no bikhet moa long mi.
Na ol manmeri bai mi larim ol i stap long Jerusalem, ol bai i no gat planti samting na bai ol i daunim ol yet.
Na bai ol i kam long mi na askim mi long helpim ol.
Ol liklik lain Israel i stap yet, ol bai i no inap mekim pasin nogut long ol arapela manmeri, na ol bai i no inap mekim tok giaman na trikim ol wantok.
Bai ol i gat gutpela sindaun tasol, na i no gat man o meri inap mekim ol i pret."

Dispela em i tok bilong God

Song bilong Bekim**Song 34:2-3.6-7.17-18.19.23****Bekim: Bikpela i harim ol rabismanmeri i singaut long en.**

Bai mi litimapim nem bilong Bikpela oltaim oltaim.

Na maus bilong mi bai i tok amamas long em.

Bai mi tokaut long ol samting, Bikpela i bin mekim long mi,
na ol manmeri bilong daunpasin bai i harim na i amamas.**Bekim:**Yupela mas lukluk i go long Bikpela na ai bilong yupela bai i lait
na pes bilong yupela bai i no ken sem.

Ol rabismanmeri i singaut, na Bikpela i harim ol.

Na em i tekewe olgeta wari bilong ol.

Bekim:Bikpela i save tanim pes, na em i no laik lukim
ol manmeri i mekim pasin nogut.

Olsem na i no gat wampela i tingim ol, taim ol i dai pinis.

Ol stretpela manmeri i singaut long Bikpela na em i harim pre bilong ol.

Em i bringim ol i go longwe long ol hevi bilong ol.

Bekim:Bikpela i save stap klostu long ol manmeri, hevi i daunim ol,
na em i save oraitim ol manmeri, lewa bilong ol i bruk olgeta.

Bikpela i save kisim bek ol wokmanmeri bilong em

na em i no kotim ol manmeri i save kam hait long em.

Bekim: Bikpela i harim ol rabismanmeri i singaut long en.**Welkamim Gutnius:**

Aleluya, Aleluya

Bikpela, yu kam na yu no ken wet.

Lusim ol sin bilong ol manmeri bilong yu.

Aleluya

Gutnius**Mt 21:28-32***Hettok: Jon i bin kamap na ol manmeri bilong sin ol i bin bilip long em.***Harim Gutnius bilong Jisas Krai Matyu i raitim**Jisas i tokim ol bikpris wantaim ol
hetman bilong Israel olsem,

"Orait yupela i ting wanem?"

Wampela man i gat tupela pikinini.

Em i go long namba wan pikinini na i
tokim em olsem, 'Pikinini, nau yu go
wok long gaden wain.'

Na pikinini i tok, 'Mi no laik.'

Tasol bihain em i senisim tingting na
i go.Na papa i go long narapela pikinini
na i mekim wankain tok long em.

Na pikinini i tok, 'Yes, papa.'

Tasol em i no i go.

Orait long dispela tupela pikinini,
husat i bihainim laik bilong papa?"

Na ol i tok, "Namba wan."

Na Jisas i tokim ol olsem,
 "Mi tok tru long yupela, ol man
 bilong kisim takis na ol pamukmeri i
 save go insait long kingdom bilong
 God paslain long yupela.
 Long wanem, Jon i bin kamap long
 yupela na i soim stretpela pasin long
 yupela, na yupela i no bilip long em.

Tasol ol man bilong kisim takis na ol
 pamukmeri ol i bin bilip long em.
 Na yupela i lukim dispela pinis, tasol
 yupela i no senisim tingting na bilip
 long em."

Em tasol Gutnius bilong Jisas Kraus

Trinde

Long ol de bilong Desemba 17-24 i gat ol rit bilong ol dispela de yet.
 Lukim pes 41

Rit Namba 1

Ais 45:6-8.18.21-25

*Hettok: Yu skai, na yupela ol klaut, yupela kapsaitim gutpela taim long ol
 manmeri, olsem ren i pundaun long graun.*

Rit i kam long buk bilong profet Aisaia

Mi wanpela tasol mi Bikpela, na i no
 gat narapela god moa i stap.
 Mi tasol mi bin tok na tulait na tudak
 i kamap.
 Na mi tasol mi save mekim ol
 manmeri i stap gut, na mi save
 mekim ol i painim bikpela hevi.
 Mi Bikpela tasol, mi save mekim ol
 dispela samting i kamap.
 Yu skai, na yupela ol klaut, yupela
 kapsaitim gutpela taim long ol
 manmeri, olsem ren i pundaun long
 graun.
 Na bai ol i ken i stap gut na mekim
 stretpela pasin i kamap strong, olsem
 graun i kisim ren na i mekim ol
 samting i kamap gut long gaden.
 Mi Bikpela yet, mi save mekim ol
 dispela samting i kamap.
 Bikpela tasol em i God.
 Em i bin wokim skai na graun i
 kamap strong tru.
 Em i no wokim graun bilong i stap
 nating. Nogat.

Em i bin wokim bilong olgeta
 samting i ken i stap long en.
 Em i save tok olsem,
 "Mi wanpela tasol mi Bikpela, na i no
 gat narapela god moa i stap.
 Yupela olgeta manmeri, yupela kam
 na autim tok bilong yupela long kot.
 Yupela i mas askim yupela yet na
 traим painimaut, wanem god tru bipo
 i bin tokaut long ol samting i wok
 long kamap nau?
 Mi Bikpela, mi wanpela tasol mi bin
 tokaut long ol dispela samting i
 kamap. Olsem na lukim.
 I no gat narapela god moa i stap.
 Mi God bilong mekim stretpela pasin
 tasol, na mi God bilong kisim bek ol
 manmeri bilong mi, mi wanpela God
 tasol mi stap.
 Yupela ol manmeri bilong olgeta hap
 bilong graun, yupela i mas kam long
 mi, na bai yupela i stap gut, long
 wanem, mi wanpela tasol mi God, na
 i no gat narapela god moa i stap.

Mi Bikipela, mi bin tok tru antap long nem bilong mi yet, na bai mi no inap senisim dispela tok mi bin autim long maus bilong mi.

Mi bin tok olsem, olgeta manmeri bilong graun bai i kam long mi na brukim skru long mi, na olgeta bilong ol bai i promis long ol bai i stap aninit long mi.

Na bai ol i tok olsem,

‘Bikipela tasol i save helpim yumi na strongim yumi na mekim stretpela pasin i win.

Olgeta manmeri bai i kam long em, na ol lain i bin belhat long em bai ol i sem nogut tru.

Tasol ol lain tumbuna bilong Jekop, bai ol i amamas long Bikipela i bin mekim ol i win na ol i gat biknem.’ "

Dispela em i tok bilong God

Song bilong Bekim

Song 85:9-10.11-12.13-14

Bekim: Yupela ol klaut, yupela salim dispela stretpela Man i kam daun olsem ren.

Bai mi harim ol tok Bikipela i autim.

Em i tok long givim bel isi na gutpela taim

long ol pipel na ol pren bilong em,

na long ol manmeri i tanim bel na i bihainim lo bilong em.

Em i save sambai long ol manmeri i lotu long em,

na strong na biknem bilong em bai i stap long kantri bilong mipela.

Bekim: Yupela ol klaut, yupela salim dispela stretpela Man i kam daun olsem ren.

Marimari na promis bilong God i kamap tru,

na stretpela pasin na bel isi bai i bung wantaim.

Gutpela pasin i kamap olsem kru i kamap long graun,

na stretpela pasin bilong Bikipela bai i kamap ples klia long skai.

Bekim:

Bikipela bai i mekim mipela i win,

na graun bilong mipela bai i karim planti kaikai.

Pasin holi bai i go pas long Bikipela, na pasin bel isi i bihainim em.

Bekim:

Welkamim Gutnius:

Aleluya, Aleluya

Yupela mas singaut strong na autim dispela gutnius,

"Lukim, God bilong yupela i kam nau."

Aleluya

Gutnius

Lu 7:18-23

Hettok: Yutupela go tokim Jon long ol samting nau yutupela i lukim na harim.

Harim Gutnius bilong Jisas Kraus Luk i raitim

Ol disaipel bilong Jon i tokim em long olgeta dispela samting Jisas i mekim.

Na Jon i singautim tupela disaipel bilong en, na em i salim tupela i go long Bikpela bilong askim em olsem, "Ating yu dispela man God i bin promis long salim i kam, o mipela i mas wetim narapela?"

Dispela tupela man i kamap pinis long Jisas, na tupela i tok,

"Jon Bilong Baptais em i salim mitupela i kam long yu, na em i laik askim yu olsem, 'Ating yu dispela man God i bin promis long salim i kam, o mipela i mas wetim narapela?'"

Long dispela taim Jisas i wok long mekim orait planti manmeri i gat ol kain kain sik.

Na em i rausim planti spirit nogut i stap long ol.

Na planti aipas, em i mekim ol i lukluk.

Na Jisas i bekim tok bilong tupela disaipel bilong Jon olsem,

"Yutupela go tokim Jon long ol samting nau yutupela i lukim na harim.

Ol aipas ol i lukluk gen, na ol lek nogut ol i wokabaut.

Skin bilong ol manmeri i gat sik lepra, em i kamap klin, na ol yaupas i harim toktok.

Ol manmeri i dai pinis, ol i kirap gen, na ol rabismanmeri i harim gutnius.

Na ol manmeri i lukim mi, na bilip bilong ol i no pundaun, ol i ken amamas."

Em tasol Gutnius bilong Jisas Kraus**Fonde**

Long ol de bilong Desemba 17-24 i gat ol rit bilong ol dispela de yet.
Lukim pes 41

Rit Namba 1***Ais 54:1-10***

Hettok: Bikpela i singautim yu i kam bek olsem wanpela meri i stap nating na i sori.

Rit i kam long buk bilong profet Aisaia

Bikpela i tok olsem,

"Jerusalem, yu olsem tarangu meri i no save karim pikinini, na yu olsem meri i no bin pilim pen bilong karim pikinini.

Tasol nau yu mas singim song na amamas na singaut, long wanem, yu bai gat planti pikinini moa, i winim ol pikinini bilong meri, man bilong en i stap yet wantaim em.

Yu mas makim bikpela hap graun na sanapim haus sel bilong yu.

Na yu mas opim haus sel bilong yu olgeta, na lusim ol rop i go longpela na planim strong ol stik i go daun long graun, na taitim ol rop na pasim strong long ol dispela stik.

Long wanem, mak bilong graun bilong yu bai i op bikpela na i go olsem long han sut na long han kais.

Ol lain pikinini bilong yu bai i daunim ol manmeri bilong ol arapela kantri.

Na bai ol i sindaun long ol taun nau i stap nating.

Jerusalem, yu no ken pret.

Bai yu no sem moa.

Ol manmeri bai i no tok bilas long yu moa.

Bai yu lusim tingting olgeta long sem yu bin kisim long taim yu stap yangpela yet, na bai yu no tingim moa dispela taim yu stap wanpis olsem meri, man bilong en i dai pinis.

Mi God i bin wokim yu, mi bai i stap olsem man bilong yu.

Nem bilong mi, em Bikipela I Gat Olgeta Strong.

Mi God bilong Israel, mi God bilong mekim gutpela na stretpela pasin olgeta, na mi Man bilong sambai long yu na helpim yu, mi tasol mi God bilong bosim olgeta hap bilong graun.

Mi God, Bikipela, mi tok olsem, bai mi singautim yu i kam bek long mi.

Yu olsem yangpela meri i bin marit na man bilong en i lusim em na ranawe pinis, na lewa bilong en i bruk na em i stap wantaim bikipela sori.

Mi Bikipela, mi Man bilong sambai long yu na helpim yu, mi bin lusim yu long sotpela taim tasol, na nau mi gat bikipela sori tumas long yu.

Olsem na bai mi kisim yu i kam bek long mi.

Mi bin kros nogut tru long yu long sotpela taim tasol, na mi bin haitim pes bilong mi.

Tasol oltaim bai mi sori tumas long yu na laikim yu tru na mekim gut long yu.

Long taim bilong Noa mi bin promis olsem bai mi no inap bagarapim graun gen long bikipela tait.

Na nau bai mi mekim wankain promis.

Mi tok tru tumas bai mi no belhat gen long yu na krosim yu na mekim save long yu.

Ol maunten i ken bruk na pundaun, tasol laik bilong mi long yu bai i stap strong oltaim.

Na mi no inap brukim dispela kontrak mi bin wokim wantaim yu long mitupela bai i sindaun gut wantaim na mi bai givim gutpela taim long yu.

Mi Bikipela, mi God bilong sori tumas long yu na laikim yu tru, mi tok pinis long mi bai mekim ol dispela samting long yu."

Dispela em i tok bilong God

Song bilong Bekim

Song 30:2.4.5-6.11-12.13

Bekim: Bikipela, mi laik litimapim nem bilong yu.

Bikipela, mi laik litimapim nem bilong yu, long wanem, yu bin kisim bek mi, na yu no bin larim ol birua i daunim mi na lap nogut long mi. Bikipela, mi bin bungim ol lain bilong ol manmeri i dai pinis, tasol yu givim laip long mi gen.

Bekim:

Yupela ol manmeri i laikim Bikipela, yupela singim ol song bilong litimapim nem bilong em. Tok tenkyu long nem holi bilong em.

Em i save belhat sotpela taim tasol, na em i save belgut long yumi olgeta de yumi stap laip.
Long nait yumi save krai liklik, tasol tulait i kamap na yumi amamas gen.

Bekim:

Bikpela, harim mi na marimari long mi!
Bikpela, yu kam na helpim mi!
Yu bin tanim sori bilong mi i kamap amamas.
Yu bin tekewe klos sori bilong mi
na yu bin bilasim mi wantaim klos bilong amamas.
Olsem na mi mas singsing amamas long yu oltaim, na mi no ken pasim maus.
Bikpela, yu God bilong mi, bai mi tenkyu long yu inap oltaim.

Bekim:**Welkamim Gutnius:**

Aleluya, Aleluya
Redim rot bilong Bikpela. Stretim ol rot bilong en. Na olgeta manmeri bilong graun bai i lukim wok God i mekim bilong kisim bek yumi.
Aleluya

Gutnius**Lu 7:24-30**

Hettok: Jon i bringim tok bilong God na em i redim rot bilong Bikpela.

Harim Gutnius bilong Jisas Krais Luk i raitim

Taim dispela tupela man i bin bringim tok bilong Jon, tupela i go pinis, orait Jisas i tokim ol manmeri long Jon olsem,
"Taim yupela i bin i go long hap i no gat man, yupela i go bilong lukim wanem samting?
Ating yupela i go bilong lukim win i sakim wanpela pitpit? Nogat.
Yupela i go bilong lukim wanem samting?
Ating yupela i go bilong lukim wanpela man i putim ol gutpela gutpela klos? Nogat.
Ol man i putim ol naispela klos na i gat ol gutpela gutpela samting bilong bodi, ol dispela kain man i save stap long haus bilong ol king.
Tasol yupela i go bilong lukim wanem samting?
Yupela i go bilong lukim wanpela profet, a? Em tasol.

Na mi tokim yupela, dispela profet hia, em i winim olgeta arapela profet.
Long dispela man tasol buk bilong God i tok olsem, 'Harim. Bai mi salim wanpela man bilong autim tok bilong mi, na em bai i go paslain long yu. Na em bai i redim rot bilong yu.'
Mi tokim yupela olsem, Jon i winim olgeta manmeri i stap long graun.
Tasol man o meri i stap liklik tru long kingdom bilong God, em i winim Jon."
Ol manmeri wantaim ol man bilong kisim takis ol i harim dispela tok pinis, na ol i tok,
"Pasin bilong God em i stret olgeta."
Ol i tok olsem, long wanem, ol i bin kisim baptais long han bilong Jon.
Tasol ol Farisi na ol saveman bilong lo ol i no bin kisim baptais long Jon.
Olsem na ol i givim baksait long gutpela rot God i soim long ol.

Em tasol Gutnius bilong Jisas Kraus

Fraide

Long ol de bilong Desemba 17-24 i gat ol rit bilong ol dispela de yet.
Lukim pes 41

Rit Namba 1

Ais 56:1-3.6-8

Hettok: Haus bilong mi bai i stap haus bilong ol manmeri bilong olgeta kantri i ken i kam long en na beten long mi.

Rit i kam long buk bilong profet Aisaia

Bikpela i tok olsem,
"Yupela ol manmeri bilong mi, yupela i mas mekim gutpela na stretpela pasin tasol, long wanem, taim bilong mi long helpim yupela na kisim bek yupela, em i kamap klostu pinis.

Ol manmeri i strong long bihainim gutpela pasin na i bihainim gut lo bilong de Sabat na i no save mekim pasin nogut, ol i ken amamas.

Mi bai mekim gut long ol.

Ol manmeri bilong ol arapela kantri i stap wantaim ol manmeri bilong Bikpela, ol i no ken tok long ol yet olsem, "Bikpela bai i no inap larim yumi i stap moa wantaim ol lain manmeri bilong en."

Na ol manmeri bilong ol arapela kantri i stap wantaim ol manmeri bilong mi, na ol i save aninit long mi na laikim mi tru na mekim wok bilong mi, na ol i bihainim ol lo

bilong de Sabat na ol i bihainim olgeta tok bilong kontrak mi bin mekim wantaim ol manmeri bilong mi, ol i ken amamas.

Bai mi bringim ol i go long Saion, dispela maunten bilong mi, na bai ol i amamas long i stap long haus bilong mi.

Na bai ol i mekim ol ofa bilong paia i kukim olgeta na ol arapela kain ofa long alta bilong mi.

Na bai mi laikim ol ofa bilong ol, long wanem, haus bilong mi bai i stap haus bilong ol manmeri bilong olgeta kantri i ken i kam long en na beten long mi.

Mi God, Bikpela, mi God i save bungim gen ol dispela manmeri bilong Israel, em ol birua i bin karim i go kalabus, mi tok olsem.

Bai mi kisim tu ol arapela manmeri na bringim ol i kam i stap wantaim ol dispela lain mi bungim pinis."

Dispela em i tok bilong God

Song bilong Bekim**Song 67:2-3.5.7-8****Bekim: God, olgeta lain manmeri i ken litimapim nem bilong yu.**

God, yu ken marimari long mipela na blesim mipela.

Mekim pes bilong yu i lait long mipela.

Olsem bai olgeta manmeri i ken save long pasin bilong yu,
na olgeta kantri i ken save olsem yu bin kisim bek mipela.**Bekim: God, olgeta lain manmeri i ken litimapim nem bilong yu.**

Olgeta kantri i ken belgut na singsing amamas,

long wanem, yu save mekim stretpela kot.

Yu skelim ol manmeri long stretpela pasin,
na yu save stiaim olgeta kantri bilong graun.**Bekim:**

Graun i karim kaikai bilong em pinis.

God, God bilong yumi, i blesim yumi pinis.

Mi pre bai God i ken blesim yumi moa yet
na bai olgeta manmeri bilong graun i ken lotuim em.**Bekim:****Welkamim Gutnius:**

Aleluya, Aleluya

Bikpela, kam na bringim bel isi bilong yu.

Long ai bilong yu mekim mipela i amamas long pasin i stret.

Aleluya

Gutnius**Jo 5:33-36***Hettok: Jon em i bin i stap olsem lam i lait na i givim lait long ol manmeri.***Harim Gutnius bilong Jisas Krai Jon i raitim**

Jisas i tokim ol Juda olsem,

"Yupela i bin salim ol man i go long
Jon bilong kisim tok bilong en.Na mi laik bai God i ken kisim bek
yupela, olsem na mi laik bai yupela i
tingim tok Jon i bin mekim long wok
na pasin bilong mi, long wanem, Jon i
bin tokaut long tok i tru.Jon em i bin i stap olsem lam i lait na
i givim lait long ol manmeri.Na long sotpela taim bel bilong
yupela i bin amamas long lait bilong
em.Tasol samting i winim Jon, em i
tokaut long mi nau.Em dispela olgeta wok Papa i bin
givim long mi bilong mekim na
pinisim.Ol dispela wok mi save mekim i
tokaut gut long ol manmeri olsem,
Papa i bin salim mi na mi kam."**Em tasol Gutnius bilong Jisas Krai**

Long sampela yia, Sande 3 bilong Atven bai kamap long Desemba 17, na long olgeta yia Sande 4 bilong Atven bai kamap insait long Desemba 18-24. Dispela tupela Sande i gat ol rit bilong tupela yet, na yu mas lusim ol rit i stap long lista *Desemba 17 - 24*, na yusim ol rit bilong Sande 3 o 4 tasol. Sapos yu laik, yu ken yusim ol dispela rit yu bin lusim insait long wanpela wikde, Desemba 17 - 24; nogut ol rit bilong Sande i kamap namba tu taim long wanpela wikde.

Desemba 17***Rit Namba 1******Jen 49:2.8-10***

Hettok: Juda i holim dispela stik i makim strong bilong king, na em bai i stap king oltaim.

Rit i kam long buk bilong Jenesis

Jekop i singautim ol pikinini bilong en i kam na em i tokim ol olsem,
 "Yupela ol pikinini bilong Jekop, yupela kam bung klostu long mi na putim yau gut long tok bilong mi Israel, papa bilong yupela.
 "Juda, ol brata bilong yu bai i litimapim nem bilong yu.
 Bai yu holimpas ol birua bilong yu long nek bilong ol, na bai ol brata bilong yu i daunim het bilong ol na givim biknem long yu.
 Juda i olsem wanpela yangpela laion.

Em i save kilim abus na kaikai, na em i kamap strong tru.
 Em i save sindaun na i stap isi tasol, olsem wanpela laion.
 Na i no gat wanpela man i save hambak long em.
 Em i holim dispela stik i makim strong bilong king, na em bai i stap king oltaim.
 Em bai i holim dispela namba inap em i kamap long taun Silo, na em bai i bosim olgeta lain manmeri."

Dispela em i tok bilong God***Song bilong Bekim******Song 72:1-2.3-4.7-8.17******Bekim: Long taim bilong em bai stretpela pasin na bel isi i stap.***

God, givim gutpela tingting long king,
 na helpim em long skelim gut ol manmeri,
 bai em i ken bosim gut ol manmeri bilong yu
 na mekim stretpela pasin long ol tarangu.

Bekim:

Ol bikpela maunten i ken bringim taim bilong bel isi long ol manmeri
 na ol liklik maunten i ken bringim stretpela pasin.
 Bai king i ken stretim gut ol hevi bilong ol tarangu,
 na helpim ol pikinini bilong ol
 na mekim save long ol manmeri i bagarapim ol arapela.

Bekim: Long taim bilong em bai stretpela pasin na bel isi i stap.

Long olgeta de bilong em bai gutpela taim na stretpela pasin i stap,
 inap lait bilong mun i pinis olgeta.

Em bai i bosim graun i stap namel long tupela solwara,
 stat long Bikpela Riva i go inap long arere bilong graun.

Bekim:

Nem bilong king i ken win inap oltaim
 na i ken i stap inap long de san i pinis.

Na olgeta lain manmeri bai i amamas long stap aninit long em
 na olgeta kantri bai i askim God i blesim em.

Bekim:***Welkamim Gutnius:***

Aleluya, Aleluya

Gutpela na stretpela save bilong God Antap Tru, kam na stiaim ol manmeri
 wantaim strong na pasin sori. Skulim mipela long wokabaut long rot bilong
 gutpela save.

Aleluya

Gutnius***Mt 1:1-17***

Hettok: Ol lain tumbuna bilong Jisas Krai, pikinini bilong Devit.

Harim Gutnius bilong Jisas Krai Matyu i raitim

Dispela em i tok long ol lain tumbuna
 bilong Jisas Krai.

Jisas em i bilong lain bilong Devit na
 Devit em i bilong lain bilong
 Abraham.

Abraham em i papa bilong Aisak.

Na Aisak em i papa bilong Jekop.

Na Jekop em i papa bilong Juda
 wantaim ol brata bilong en.

Juda em i papa bilong Peres wantaim
 Sera. Mama bilong tupela em Tamar.

Na Peres em i papa bilong Hesron.

Na Hesron em i papa bilong Ram.

Na Ram em i papa bilong Aminadap.

Na Aminadap em i papa bilong
 Nason.

Na Nason em i papa bilong Salmon.

Na Salmon em i papa bilong Boas.

Mama bilong en em Rahap.

Na Boas em i papa bilong Obet.

Mama bilong en em Rut.

Na Obet em i papa bilong Jesi.

Na Jesi em i papa bilong King Devit.

Na Devit em i papa bilong Solomon.

Mama bilong Solomon bipo em i bin
 i stap meri bilong Uria.

Na Solomon em i papa bilong
 Rehoboam.

Na Rehoboam em i papa bilong
 Abiya.

Na Abiya em i papa bilong Asa.

Na Asa em i papa bilong Jehosafat.

Na Jehosafat em i papa bilong
 Jehoram.

Na Jehoram em i papa bilong Usia.

Na Usia em i papa bilong Jotam.

Na Jotam em i papa bilong Ahas.

Na Ahas em i papa bilong Hesechia.

Na Hesechia em i papa bilong Manase.

Na Manase em i papa bilong Emon.

Na Emon em i papa bilong Josaia.

Desemba 17 - 24

41

Na Josaia em i papa bilong Jehoiakin wantaim ol brata bilong en.
Long dispela taim ol Israel i go kalabus long Babilon.

Stat long taim ol i go kalabus long Babilon, orait Jehoiakin em i papa bilong Sealtiel.

Na Sealtiel em i papa bilong Serubabel.

Na Serubabel em i papa bilong Abiut.

Na Abiut em i papa bilong Eliakim.

Na Eliakim em i papa bilong Asor.

Na Asor em i papa bilong Sadok.

Na Sadok em i papa bilong Akim.

Na Akim em i papa bilong Eliut.

Na Eliut em i papa bilong Eleasar.

Na Eleasar em i papa bilong Matan.

Na Matan em i papa bilong Jekop.

Na Jekop em i papa bilong Josep.

Na Josep em i man bilong Maria.

Na Maria i karim Jisas, ol i save kolim em Krai, em man God i makim bilong kisim bek ol manmeri bilong en.

Olsem na olgeta lain bilong Abraham, i kam inap long Devit, em i 14 lain.

Na olgeta lain bilong Devit, i kam inap long taim ol i go kalabus long Babilon, em i 14 lain.

Na stat long taim ol i go kalabus long Babilon, inap long taim Krai i kamap, dispela olgeta tu em i 14 lain.

Em tasol Gutnius bilong Jisas Krai

Desemba 18

Rit Namba 1

Jer 23:5-8

Hettok: Wanpela gutpela man tru bai i kamap long lain bilong Devit, olsem nupela kru i kamap long han bilong diwai.

Rit i kam long buk bilong profet Jeremaia

Mi Bikpela, mi tok olsem,
„Mi makim pinis wanpela taim bilong mi ken mekim wanpela gutpela man tru i kamap long lain bilong Devit, olsem nupela kru i kamap long han bilong diwai.

Dispela man bai i stap king na em bai i bihainim gutpela na stretpela tingting.

Na em bai i mekim stretpela pasin tru long olgeta manmeri bilong dispela graun. Na long taim em i stap king, ol Juda na Israel bai i no gat hevi moa.

Bai mi kisim bek ol na bai ol i sindaun gut tasol.

Na bai ol i kolim nem bilong dispela king olsem, Bikpela em i as bilong stretpela pasin bilong yumi.“

Mi Bikpela, mi tok olsem,

„Mi bin rausim ol dispela manmeri, tasol mi makim pinis wanpela taim bilong bringim ol i kam bek long graun bilong ol yet, na bai ol i stap gut long en.

Nau pasin bilong ol bilong strongim tok em i olsem.

Ol i save tok, ‘Tru antap, long nem bilong Bikpela i stap oltaim. Em i bin kisim yumi long Isip na bringim yumi i kam.’

Tasol taim mi bringim ol i kam bek, dispela pasin bai i senis na bai ol i tok

olsem, ‘Tru antap, long nem bilong Bikpela i stap oltaim. Em i bin kisim yumi ol lain bilong Israel long dispela kantri long hap not na long ol

arapela kantri em i bin rausim yumi i go long en, na em i bin bringim yumi i kam bek long as ples.”“

Dispela em i tok bilong God

Song bilong Bekim

Song 72:1-2.12-13.18-19

Bekim: Long taim bilong em bai stretpela pasin na bel isi i stap.

God, givim gutpela tingting long king,
na helpim em long skelim gut ol manmeri,
bai em i ken bosim gut ol manmeri bilong yu
na mekim stretpela pasin long ol tarangu.

Bekim:

Long wanem, em i save helpim ol tarangu i krai long em
na ol manmeri i sot long ol samting.
Em i save marimari long ol manmeri i no gat strong,
na em i save lukautim laip bilong ol tarangu i nogat samting.

Bekim:

Yumi litimapim nem bilong Bikpela, God bilong Israel.
Long wanem, em wanpela tasol i save mekim ol bikpela wok.
Litimapim nem bilong em oltaim oltaim.
Biknem bilong em i ken pulapim olgeta graun.
Amen! Amen!

Bekim:

Welkamim Gutnius:

Aleluya, Aleluya
Lida bilong haus bilong Israel, yu bin givim Lo long Moses long maunten Sainai.
Kam na helpim mipela long bikpela strong bilong yu.
Aleluya

Gutnius

Mt 1:18-24

*Hettok: Mama bilong Jisas, em Maria, ol i makim em pinis bilong maritim Josep,
em i man bilong lain bilong Devit.*

Harim Gutnius bilong Jisas Krai Matyu i raitim

Stori bilong Jisas Krais i kamap, em i olsem.

Mama bilong en, Maria, ol i makim em pinis bilong maritim Josep.

Tasol taim tupela i no i stap wantaim yet, ol i lukim Maria i gat bel.

Holi Spirit tasol i bin mekim na Maria i gat bel.

Man bilong en, Josep, em i stretpela man.

Em i harim olsem Maria i gat bel, na em i laik lusim em.

Tasol em i no laik givim sem long Maria long ai bilong ol manmeri.

Olsem na em i laik lusim em isi tasol.

Josep i tingting yet long dispela, na long driman wanpela ensel bilong Bikpela i kamap long em.

Ensel i tok olsem,

"Josep, yu man bilong lain bilong Devit, yu no ken pret long kisim Maria olsem meri bilong yu.

Harim. Dispela pikinini i stap long bel bilong en, em Holi Spirit i bin givim long em.

Bai em i karim pikinini man, na yu mas kolim nem bilong en Jisas, long wanem, em bai i tekewe sin bilong ol manmeri bilong en na kisim bek ol."

Dispela olgeta samting i kamap bilong inapim wanpela tok Bikpela i bin mekim long maus bilong profet.

Profet i bin tok olsem,

"Harim. Wanpela meri i no bin slip wantaim man, em bai i gat bel na i karim wanpela pikinini man. Na bai ol i kolim nem bilong en Emanuel."

As bilong dispela nem i olsem, God i stap wantaim yumi.

Taim Josep i kirap long slip, orait em i mekim olsem ensel bilong Bikpela i bin tokim em.

Em i kisim meri bilong en.

Em tasol Gutnius bilong Jisas Krais

Desemba 19

Rit Namba 1

Het 13:2-7.24-25

Hettok: Ensel i toksave long kamap bilong Samson.

Rit i kam long buk bilong ol Hetman bilong Israel

Wanpela man i stap long taun Sora, nem bilong en Manoa.

Em i bilong lain bilong Dan.

Meri bilong en i no save karim pikinini.

Wanpela taim ensel bilong Bikpela i kamap long dispela meri na i tokim em olsem,

"Bipo yu no save karim pikinini, tasol bai yu gat bel na bai yu karim pikinini man. Olsem na yu harim gut. Yu no ken dring wain na bia.

Na yu no ken kaikai ol samting mi tambuim ol manmeri long kaikai,

long wanem, bai yu gat bel na bai yu karim wanpela pikinini man.

Na yu no ken katim gras bilong en.

Taim em i stap yet long bel bilong yu, God bai i makim em olsem wokman bilong em yet.

Na taim yu karim em pinis, em i no ken dring wain na ol bia na em i no ken kaikai samting God i tambuim ol manmeri long kaikai.

Na bai em i stat long kisim bek ol Israel long han bilong ol Filistia."

Orait dispela meri i go tokim man bilong en olsem,

"Wanpela man bilong God i kam toktok long mi. Pes bilong en i lait olsem pes bilong ensel bilong God. Mi lukim em na mi pret moa yet, na mi no askim em long em i kam we. Na tu em i no tokim mi long nem bilong en. Tasol em i tokim mi olsem, bai mi gat bel na mi karim wanpela pikinini man. Na em i tok, mi no ken dring wain na bia, na mi no ken kaikai ol samting Bikpela i bin tambuim, long wanem,

taim pikinini i stap long bel bilong mi, God bai i makim em olsem wokman bilong en stret, na em bai i stap olsem i go inap long taim em i dai."

Bihain meri bilong Manoa i karim pikinini man na ol i kolim nem bilong en Samson.

Pikinini i kamap bikpela na Bikpela i mekim gut long em.

Na spirit bilong Bikpela i stat long kirapim tingting bilong Samson.

Dispela em i tok bilong God

Song bilong Bekim

Song 71:3-4.5-6.16-17

Bekim: Olgeta de maus bilong mi i litimapim nem bilong yu.

Bikpela, yu olsem bikpela ston, mi ken ran i kam long yu.
Yu olsem strongpela haus, mi hait long en na yu ken lukautim mi.
Kisim bek mi long han bilong ol manmeri nogut.
Slekim han bilong ol birua, bai ol i lusim mi i go.

Bekim:

God, mi wet na hop long yu tasol.
Bikpela, mi bin bilip long yu long taim mi yangpela yet.
Long taim mama i karim mi inap nau, mi pas long yu.
Long taim mi stap yet long bel bilong mama, yu helpim bilong mi.
Olsem na mi litimapim nem bilong yu oltaim.

Bekim:

Bikpela, mi bai litimapim nem bilong yu
long ol bikpela wok bilong yu,
na mi bai tokaut long stretpela pasin bilong yu tasol.
Long taim mi yangpela yet inap nau, yu bin skulim mi,
na tude yet mi save telimautim ol bikpela wok bilong yu.

Bekim: Olgeta de maus bilong mi i litimapim nem bilong yu.

Welkamim Gutnius:

Aleluya, Aleluya
Plaua bilong diwai Jesi na mak bilong God i laikim olgeta manmeri bilong em,
kam hariap na kisim bek mipela.
Aleluya

Gutnius**Lu 1:5-25***Hettok: Ensel Gebriel i toksave long kamap bilong Jon Bilong Baptais.***Harim Gutnius bilong Jisas Krais Luk i raitim**

Taim Herot i stap king bilong Judia, wanpela pris i stap, nem bilong en Sekaraia.

Em i pris bilong ol lain bilong Abiya. Meri bilong en em i bilong lain bilong Aron, na nem bilong meri em Elisabet.

Tupela i stap stretpela long ai bilong God.

Tupela i save bihainim olgeta lo na olgeta tok bilong Bikpela, na tupela i no gat asua long ai bilong en.

Tasol tupela i no gat pikinini, long wanem, Elisabet i no inap karim pikinini. Na tupela i lapun pinis.

Wanpela taim ol lain bilong Sekaraia i go mekim wok pris, na Sekaraia tu i mekim wok pris long ai bilong God.

Orait ol i pilai satu bilong painimaut wanem pris i mas go insait long haus bilong Bikpela, bilong mekim ofa bilong smok i gat gutpela smel.

Na long dispela pasin ol i makim Sekaraia, na em i go insait bilong mekim ofa.

Long dispela taim bilong mekim ofa, ol bikpela lain manmeri i bung i stap ausait long haus bilong God na ol i beten i stap.

Orait na wanpela ensel bilong Bikpela i kamap long Sekaraia na i sanap i stap long han sut bilong alta bilong ofa bilong smok i gat gutpela smel.

Sekaraia i lukim ensel na em i kirap nogut na i pret.

Tasol ensel i tokim em olsem,

"Sekaraia, yu no ken pret.

God i harim pinis pre bilong yu.

Meri bilong yu Elisabet bai i karim pikinini man.

Na yu mas kolim nem bilong en Jon.

Bai bel bilong yu i stap gutpela, na bai yu amamas.

Na planti manmeri bai i amamas long taim dispela pikinini i kamap, long wanem, em bai i gat biknem long ai bilong Bikpela.

Em bai i no ken dring wain na bia samting.

Taim em i stap yet long bel bilong mama, Holi Spirit bai i pulap long em.

Em bai i mekim planti manmeri bilong Israel i tanim na i go long God, Bikpela bilong ol.

Em bai i kisim pasin na strong bilong Elaija na wokabaut i go pas long Bikpela.

Em bai i mekim ol papa na ol pikinini i kamap wanbel.

Na em bai i stretim tingting bilong ol man bilong sakim tok, na ol bai i kisim gutpela tingting olsem bilong ol stretpela manmeri.

Em bai i redim ol manmeri na ol i stap redi long Bikpela i kam."

Na Sekaraia i tokim ensel olsem,

"Olsem wanem na mi ken save dispela tok bilong yu i tru? Mi lapun pinis, na meri bilong mi em tu i lapun."

Na ensel i bekim tok olsem,

"Mi Gebriel, na mi save sanap long pes bilong God.

God yet i salim mi na mi kam bilong tokim yu, na bilong bringim dispela gutpela nius long yu.

Orait yu harim. Yu no bin bilipim tok bilong mi, olsem na nau maus bilong yu bai i pas na bai yu no inap toktok, inap long taim dispela olgeta samting i kamap pinis.

Dispela tok bilong mi bai i kamap tru long taim God i makim."

Ol manmeri i wet yet long Sekaraia, na ol i tingting planti long wanem samting i kamap na em i stap longpela taim insait long haus bilong God.

Na bihain em i kam ausait na em i no inap mekim toktok long ol.

Olsem na ol i save, em i bin lukim narakain samting insait long haus bilong God.

Em i mekim toktok long ol long han bilong en tasol.

Na maus bilong en i pas i stap.

Bihain, taim bilong wok bilong Sekaraia em i pinis, na em i go bek long ples bilong en.

Na bihain meri bilong en Elisabet em i gat bel.

Na em i hait i stap inap long 5-pela mun.

Elisabet i tok olsem,

"Bikpela i bin marimari long mi.

Em i mekim dispela samting i kamap long mi bilong pinisim sem bilong mi long ai bilong ol manmeri."

Em tasol Gutnius bilong Jisas Kraus

Desemba 20

Rit Namba 1

Ais 7:10-14

Hettok: Wanpela yangpela meri i gat bel, na bai em i karim wanpela pikinini man.

Rit i kam long buk bilong profet Aisaia

Bikpela i mekim narapela tok gen long Ahas.

Em i tokim Aisaia long tokim Ahas olsem,

"Askim God, Bikpela bilong yu, long soim yu wanpela mak.

Yu ken askim em long wanem kain mak yu laik lukim.

Sapos yu laik lukim mak i kam long ples bilong ol man i dai pinis, o mak i kam long skai, o long wanem hap yu laik, yu ken askim tasol na bai God i soim yu."

Tasol Ahas i tok, "Nogat. Bai mi no ken askim long lukim wanpela mak.

Mi no laik traim strong bilong Bikpela."

Orait Aisaia i bekim tok olsem,

"Yupela ol tumbuna bilong King Devit, yupela harim gut.

Pasin bilong yupela i mekim ol manmeri i les pinis long yupela, na nau yupela i laik bai God bilong mi i wet long yupela tu, a?

Bai Bikpela yet i soim wanpela mak long yu. Dispela mak i olsem.

Wanpela yangpela meri i gat bel, na bai em i karim wanpela pikinini man na em i kolim nem bilong en 'Emanuel.'

Mining bilong dispela nem em i olsem, 'God i stap wantaim yumi.' "

Dispela em i tok bilong God

Song bilong Bekim**Song 24:1-2.3-4.5-6*****Bekim: Bikpela i laik kam insait nau. Em i king bilong glori.***

Dispela graun wantaim olgeta samting i stap long en,
 olgeta kantri wantaim ol manmeri i stap long ol,
 ol i bilong Bikpela tasol.

Em yet i sanapim graun antap long solwara.
 Em yet i strongim as bilong graun aninit long wara.

Bekim:

Husat inap go antap long maunten bilong Bikpela?
 Husat inap sanap insait long haus holi bilong em?
 Ol manmeri i gat stretpela pasin na klinpela tingting.
 Ol manmeri i no save lotu long ol god giaman.
 Na ol manmeri i no bin tok tru antap bilong giamanim ol arapela.

Bekim:

Bikpela bai i mekim gut long ol dispela kain manmeri.
 God bai i kisim bek ol, na kolim ol stretpela manmeri.
 Ol dispela kain manmeri i save wok long painim God.
 Ol i laik go klostu long God bilong Jekop.

Bekim:***Welkamim Gutnius:***

Aleluya, Aleluya
 Ki bilong Devit, kam na opim ol dua bilong kingdom bilong God i stap oltaim.
 Mekim ol manmeri i stap long kalabus bilong tudak i kamap fri.
 Aleluya

Gutnius***Lu 1:26-38****Hettok: Maria, yu bai kisim bel na karim wanpela pikinini man.***Harim Gutnius bilong Jisas Krais Luk i raitim**

Long namba 6 mun bilong Elisabet i
 gat bel, God i salim ensel Gabriel i go
 long wanpela taun bilong Galili, nem
 bilong en Nasaret.

Em i go long wanpela yangpela meri
 ol i bin makim bilong maritim
 wanpela man bilong lain bilong King
 Devit, nem bilong en Josep.

Nem bilong dispela yangpela meri em
 Maria.

Orait Gabriel i go long em na i tok
 olsem, "Gude, meri. Bikpela i stap

wantaim yu, na em i bin blesim yu na
 mekim gut long yu."

Maria i harim dispela tok, na em i
 kirap nogut na i ting, "Dispela em i
 wanem kain tok?"

Na ensel i tokim em olsem,

"Maria, yu no ken pret.

God em i belgut tru long yu.

Harim. Yu bai kisim bel na karim
 wanpela pikinini man.

Na yu mas kolim nem bilong en Jisas.

Em bai i stap bikman.

Na bai ol i kolim em Pikinini bilong God Antap Tru.
 Na God bai i putim em i stap king olsem tumbuna bilong en Devit.
 Em bai i stap king bilong ol lain bilong Jekop oltaim.
 Na wok king bilong en bai i no inap pinis."
 Na Maria i askim ensel olsem,
 "Dispela samting bai i kamap olsem wanem? Mi no marit yet long wanpela man."
 Na ensel i bekim tok bilong en olsem,
 "Holi Spirit bai i kam long yu, na strong bilong God Antap Tru bai i karamapim yu.
 Olsem na dispela pikinini bihain bai yu karim, em bai i stap gutpela na

stretpela man bilong God, na ol bai i kolim em Pikinini Bilong God.
 "Harim. Kandere bilong yu Elisabet em i lapun pinis, tasol em i gat bel na em bai i karim pikinini man.
 Bipo ol i save tok em i no inap karim pikinini.
 Tasol nau em i gat bel, na 6-pela mun bilong en i go pinis.
 I no gat wanpela samting God i no inap mekim."
 Na Maria i tok olsem,
 "Harim. Mi wokmeri bilong Bikpela. Em i ken mekim long mi olsem yu tok."
 Orait ensel i lusim em na i go.

Em tasol Gutnius bilong Jisas Kraus

Desemba 21

Ol i makim tupela rit olsem Rit Namba 1. Tasol yu ken yusim wanpela rit tasol. Wanem rit yu makim, em i laik bilong yu.

Rit Namba 1

Sol 2:8-14

*Hettok: Mi harim pren bilong mi.
 Em i kalap kalap na i ran i kam antap long ol maunten.*

Rit i kam long Song bilong Solomon

Yangpela meri i singim song olsem,
 „Pren bilong mi i kam long mi.
 Em i kalap kalap na i ran i kam antap long ol maunten na mi harim nek bilong en.
 Em i spit tumas olsem wanpela strongpela wel abus.

Em i kam pinis na sanap ausait long haus, na i lukluk i kam insait long windo.
 Na em i toktok long mi.“

Yangpela man i singim song olsem,
 „Naispela pren bilong mi, yu kam ausait, na yu kam wantaim mi.

Yu no ken pret long ren.
 Taim bilong ren i pinis.
 Nau ol plaua i kamap pinis long
 olgeta hap, na em i taim bilong
 singsing.
 Ol pisin i wok long singsing nabaut
 long bus.
 Ol diwai fik i stat long karim kaikai.
 Na olgeta rop bilong bus i putim
 plaua, na ol plaua i gat gutpela smel.

Naispela pren bilong mi, yu kam
 ausait, na yu kam wantaim mi.
 Yu stap insait long haus bilong yu
 olsem pisin i save hait insait long
 liklik hul long ples nogut bilong
 maunten.
 Kam ausait na mi lukim naispela pes
 bilong yu na mi harim gutpela nek
 bilong yu."

Dispela em i tok bilong God

Rit Namba 1

Sef 3:14-18

Hettok: Bikpela i stap namel long lain manmeri bilong em.

Rit i kam long buk bilong profet Sefanaia

Pikinini meri bilong Saion, yu singaut
 na mekim song bilong amamas.
 Israel, yu singaut strong.
 Pikinini meri bilong Jerusalem, yu
 belgut na amamas moa yet.
 Bikpela i bin tok long em bai i mekim
 save long yupela, tasol nau em i
 lusim dispela tok.
 Em i bin rausim olgeta birua bilong
 yupela.
 Bikpela, em i king bilong Israel, na
 em i stap wantaim yupela.
 Olsem na yupela i no ken pret long
 wanpela samting.

Bihain wanpela De bai i kamap na
 long dispela De ol bai i tokim ol
 Jerusalem olsem,
 "Yupela manmeri bilong Saion,
 yupela i no ken pret long wanpela
 samting. Na yupela i no ken seksek
 nating.
 God, Bikpela bilong yupela i stap
 wantaim yupela.
 Strong bilong en i helpim yupela na
 yupela i winim pait.
 Bikpela bai i amamas long yupela na
 mekim song olsem ol manmeri i
 amamas long bikpela de bilong lotu.
 Em i laikim yupela tumas, na em i no
 mekim wanpela tok."

Dispela em i tok bilong God

Song bilong Bekim

Song 33:2-3.11-12.20-21

***Bekim: Yupela ol stretpela manmeri, yupela mas amamas.
 Singim wanpela nupela song long Bikpela.***

Mekim musik long kulele bilong tenkim em
 na paitim gita i gat 10-pela string.
 Singim wanpela nupela song long em,
 paitim gita strong na mekim gutpela musik.

Bekim:

Tasol plen bilong Bikpela bai i win
 na tingting bilong em i stap inap oltaim.
 Ol lain manmeri God i lukautim, ol i ken amamas.
 Ol lain manmeri Bikpela i makim bilong em yet,
 ol tu i ken amamas.

Bekim:

Mipela i wetim Bikpela. Em i helpim bilong mipela,
 na em i olsem plang bilong pait i haitim mipela.
 Mipela i amamas long mekim wok bilong em.
 Mipela i bilip tru long nem holi bilong em.

Bekim:**Welkamim Gutnius:**

Aleluya, Aleluya
 Emanuel, yu God i stap namel long mipela.
 Kam na kisim bek mipela.
 Aleluya

Gutnius**Lu 1:39-45**

Hettok: Mi husat na mama bilong Bikpela bilong mi em i kam long mi?

Harim Gutnius bilong Jisas Krais Luk i raitim

Long dispela taim Maria i kirap na i hariap i go long ples maunten, long wanpela taun bilong distrik Judia.
 Na em i go insait long haus bilong Sekaraia na i givim gude long Elisabet.
 Elisabet i harim gude bilong Maria, na pikinini i stap long bel bilong Elisabet em i kalap.
 Na Holi Spirit i pulap long Elisabet, na em i singaut strong tumas, na i tok, "God i bin mekim gut tru long yu na givim yu blesing i winim blesing em i givim long ol arapela meri.

Na dispela pikinini i stap long bel bilong yu, em tu i kisim blesing bilong God.
 Mi husat na mama bilong Bikpela bilong mi em i kam long mi?
 Harim. Taim yau bilong mi i harim gude bilong yu, orait pikinini i stap long bel bilong mi em i amamas na i kalap.
 Yu bin bilip olsem Bikpela bai i mekim olsem em i bin tokim yu, olsem na yu ken amamas tru."

Em tasol Gutnius bilong Jisas Krais

Desemba 22

Rit Namba 1

1 Sml 1:24-28

Hettok: Hana i givim tenkyu long God, long wanem, Hana i karim pikikini man Samuel.

Rit i kam long namba wan buk bilong Samuel

Hana i kisim Samuel i go long Bikpela long taim pikinini i lusim susu pinis.

Hana i kisim ol ofa olsem, tripela bulmakau man na 10-pela kilogram plaua na wanpela bek ol i wokim long skin meme na ol i pulapim wain long en.

Samuel i yangpela yet na mama i kisim em i go long haus bilong Bikpela long Silo.

Ol i kamap pinis, orait ol i kilim wanpela bulmakau pastaim na bihain ol i kisim pikinini Samuel i go long Eli.

Na Hana i tokim Eli olsem,
"Bikman, yu tingim mi yet, o nogat?
Tru tumas, mi dispela meri i bin sanap hia bipo na pre long Bikpela.
Mi bin askim Bikpela long givim mi wanpela pikinini man, na em i harim beten bilong mi na givim mi dispela pikinini.

Olsem na nau mi laik givim em long Bikpela.

Na bai em i mekim wok bilong Bikpela oltaim."

Mama i tok pinis, orait Samuel i daunim het long pes bilong Bikpela.

Dispela em i tok bilong God

Song bilong Bekim

1 Sml 2:1.4-5.6-7.8

Bekim: Mi amamas moa yet long Bikpela, em i kisim bek mi.

"Bikpela, yu mekim mi i amamas moa yet.

Na mi amamas tru long yu bin givim biknem long mi.

Olsem na mi lap nogut long ol birua bilong mi.

God, yu bin helpim mi, olsem na mi belgut tru.

Bekim:

God i save brukim banara bilong ol strongpela soldia na ol i no gat strong moa bilong pait.

Tasol ol man i no gat strong, em i save mekim ol i kamap strong.

Ol man bipo i gat planti kaikai,

nau God i mekim ol i hangre na ol i mas wok

na ol i kisim kaikai tasol olsem pe bilong ol.

Na ol manmeri bipo ol i sot long kaikai na i stap hangre,

nau God i givim planti kaikai long ol na ol i no ken wok moa.

Na ol meri i no save karim pikinini bipo,

nau God i helpim ol na ol i karim inap 7-pela pikinini.

Na meri i bin karim planti pikinini bipo,

nau ol dispela pikinini i lus pinis na God i larim dispela meri i stap wanpis stret.

Bekim:

Bikpela i save kilim man i dai na i save givim laip long ol man i dai pinis.
Na em i save salim ol manmeri i go long ples bilong ol man i dai pinis,
na em i save kisim ol man i dai pinis, na bringim ol i kam bek gen na ol i gat laip.
Na Bikpela i save mekim sampela manmeri i kamap rabis
na em i save mekim sampela i gat planti mani samting.
Em i save daunim sampela na givim biknem long sampela.

Bekim:

Em i save helpim ol manmeri i rabis na i sot long ol samting, na ol i stap gut.
Na em i mekim ol i kamap bikman bilong kantri bilong ol,
na ol manmeri i givim biknem long ol.
Em inap mekim olsem, long wanem,
ol strongpela samting bilong holim dispela graun ol i bilong Bikpela yet,
na em yet i bin wokim graun antap long ol dispela samting.

Bekim:***Welkamim Gutnius:***

Aleluya, Aleluya

King bilong olgeta lain manmeri, yu tasol yu kamapim pasin bilong bung wantaim na yu kirapim bilip long sios bilong yu.

Kam na kisim bek olgeta manmeri yu yet yu bin wokim i kamap.

Aleluya

Gutnius***Lu 1:46-56***

Hettok: God i bin mekim bikpela samting long mi.

Harim Gutnius bilong Jisas Kraus Luk i raitim

Maria i tok olsem,

"Bel bilong mi em i litimapim nem bilong Bikpela.

Na spirit bilong mi em i amamas long God, em i Helpim bilong mi na em i save mekim mi i stap gut tru.

Mi wokmeri bilong en, mi samting nating, tasol em i lukim mi na em i marimari long mi.

Nau na bihain tu bai olgeta lain manmeri i tok long God i bin givim bikpela amamas long mi.

God i gat bikpela strong, em i bin mekim narakain samting tru bilong

helpim mi, na nem bilong en i stap holi.

Em i save marimari long ol manmeri i aninit long em.

Em bai i mekim olsem tasol long ol manmeri i stap nau, na long ol manmeri i kamap bihain inap oltaim oltaim.

Han bilong en i bin mekim strongpela wok.

Ol manmeri i save ting ol i nambawan tru na i litimapim nem bilong ol yet, em i bin rausim ol i go nabaut.

Em i daunim ol strongpela king, na em i litimapim ol manmeri i no gat nem.

Em i givim planti gutpela samting long ol manmeri i hangre, na bel bilong ol i pulap tru.

Tasol ol manmeri i gat planti samting, em i rausim ol i go nating.

Em i helpim wokman bilong en, Israel, na em i tingim yet promis em i bin mekim long Abraham na long ol tumbuna bilong yumi, long em bai i marimari oltaim long ol lain bilong ol i kamap bihain."

Maria i stap wantaim Elisabet inap tripela mun samting, na bihain em i go bek long ples bilong en.

Em tasol Gutnius bilong Jisas Kraus

Desemba 23**Rit Namba 1****Mal 3:1-4.23-24**

*Hettok: Bai mi salim profet Elaija i kam long yupela olsem mak bilong dispela
De bilong Bikpela i kam klostu.*

Rit i kam long buk bilong profet Malakai

Bikpela I Gat Olgeta Strong i tok olsem,
"Harim. Bai mi salim wanpela man bilong autim tok bilong mi na em bai i go pas bilong redim rot bilong mi. Yupela i wok long painim mi. Orait wantu bai mi kam na mi stap long haus bilong mi. Yupela i laikim tumas long lukim dispela ensel bilong autim tok bilong kontrak bilong mi. Orait em bai i kam. Tasol taim Bikpela i kam, husat inap winim kot? Taim em i kamap ples klia, husat bai i no inap lus? Em bai i kam olsem paia i hat tru na i save kukim silva na gol bilong rausim pipia bilong en. Na em i olsem strongpela sop bilong wasim laplap samting i doti tru.

Bai em i kam bilong skelim pasin bilong olgeta manmeri olsem man i save kukim silva long paia na rausim pipia bilong en. Olsem tasol wokman bilong Bikpela bai i rausim pasin doti bilong ol pris, em ol pikinini man bilong Livai, na bai ol inap bringim ol gutpela ofa long Bikpela. Na bihain ol manmeri bilong Jerusalem na bilong ol arapela hap bilong Juda bai i bringim ol gutpela ofa long Bikpela olsem bipo ol i save mekim, na Bikpela bai i amamas gen long ol ofa bilong ol. Harim. Pastaim bai mi salim profet Elaija i kam long yupela na bihain dispela De bilong mi em i bikpela De bai i kamap. Na bai Elaija i mekim ol papa na ol pikinini i kamap wanbel, na bai mi no ken bagarapim kantri bilong yupela."

Dispela em i tok bilong God**Song bilong Bekim****Song 25:4-5.8-9.10.14**

***Bekim: Yupela i mas sanap na litimapim het bilong yupela,
taim bilong God i kisim bek yupela em i kam klostu pinis.***

Bikpela, skulim mi long stretpela pasin bilong yu.
Lainim mi long olgeta rot bilong yu.
Stiaim lek bilong mi, bai mi ken wokabaut long rot i tru.
Long wanem, yu God bilong kisim bek mi.
Mi wetim yu oltaim.

***Bekim: Yupela i mas sanap na litimapim het bilong yupela,
taim bilong God i kisim bek yupela em i kam klostu pinis.***

Bikpela em i gutpela na stretpela olgeta.

Em i skulim ol sinmanmeri long pasin ol i mas bihainim.
Em i save stiaim ol manmeri i gat daunpasin long stretpela rot
na em i save skulim ol long gutpela pasin bilong em.

Bekim:

Bikpela i save laikim ol manmeri i holim kontrak bilong em
na em i poromanim ol manmeri i bihainim ol laik bilong em.
Bikpela em i pren tru bilong ol manmeri i bihainim laik bilong em.
Na em i save skulim ol long kontrak bilong em.

Bekim:**Welkamim Gutnius:**

Aleluya, Aleluya
King bilong olgeta lain manmeri, yu tasol yu kamapim pasin bilong bung
wantaim na yu kirapim bilip long sios bilong yu.
Kam na kisim bek olgeta manmeri yu yet yu bin wokim i kamap.
Aleluya

Gutnius**Lu 1:57-66***Hettok: Elisabet i karim Jon Bilong Baptais.***Harim Gutnius bilong Jisas Krai Luk i raitim**

Taim i kamap bilong Elisabet i karim pikinini, na em i karim pikinini man.
Ol wanples na ol wanlain bilong Elisabet ol i harim nius long Bikpela i bin marimari tru long em, na ol i amamas wantaim em.
Long de namba 8 ol i kam bilong katim skin bilong pikinini.
Ol i laik givim nem Sekaraia long em, olsem nem bilong papa.
Tasol mama bilong pikinini i tok,
"Nogat. Yumi mas kolim nem bilong en Jon."
Na ol i tokim em, "I no gat wanpela bilong ol wanlain bilong yupela i gat dispela nem."
Na ol i mekim toktok long han, na ol i askim papa, em i laik givim wanem nem long pikinini.
Em i tokim ol long bringim wanpela samting bilong em i ken raitim tok

long en, na em i raitim tok olsem,
"Nem bilong en Jon."
Na ol i tingting planti.
Na wantu tasol maus bilong Sekaraia i no pas moa, na em inap toktok gen.
Orait na em i toktok, na i litimapim nem bilong God.
Na olgeta wanples bilong em, ol i lukim dispela narakain samting i bin kamap na ol i pret.
Na nius bilong dispela olgeta samting i go nabaut long olgeta ples i stap long ples maunten bilong Judia.
Olgeta manmeri i harim dispela nius, ol i tingting planti na ol i askim olsem, "Bihain dispela pikinini bai i kamap wanem kain man?"
Ol i save, strong bilong Bikpela i stap wantaim em.

Em tasol Gutnius bilong Jisas Krai

Desemba 24***Rit Namba 1******2 Sml 7:1-5.8-11.16****Hettok: Kingdom bilong Devit bai i stap oltaim long ai bilong Bikpela.***Rit i kam long namba tu buk bilong Samuel**

King Devit i stap long haus bilong en na em i sindaun gut, long wanem, Bikpela i no larim ol birua i kam pait long Israel.

Na king i tokim profet Natan olsem, "Mi stap long wanpela gutpela haus ol i wokim long diwai sida, tasol Bokis Kontrak bilong God i stap long haus sel. Ating dispela i no stret."

Orait profet Natan i tokim king olsem, "Bikpela i stap wantaim yu, olsem na sapos yu laik mekim wanpela samting, yu mekim tasol."

Tasol long dispela nait Bikpela i tokim Natan olsem,

"Yu go long Devit, wokman bilong mi, na givim dispela tok bilong mi long em.

Devit, yu i no dispela man mi bin makim bilong wokim haus bilong mi. Tokim wokman bilong mi, Devit, olsem.

Mi Bikpela I Gat Olgeta Strong, mi bin kisim yu taim yu stap wasman bilong sipsip na mi makim yu long kamap hetman bilong ol manmeri bilong mi, ol Israel.

Mi bin i stap wantaim yu long olgeta hap yu bin i go long en.

Na mi bin daunim ol birua bilong yu na yu bin winim ol.

Na bai mi givim biknem long yu i wankain olsem biknem bilong ol strongpela lida bilong ol arapela kantri.

Mi makim pinis wanpela graun bilong yupela Israel, ol manmeri bilong mi, na mi mekim yupela i sindaun gut long dispela graun bilong yupela.

Na bai ol man nogut i no inap mekim nogut long yupela moa.

Bipo yet ol birua i wok long bagarapim yupela.

Stat long taim ol tumbuna i kisim dispela graun na long taim bilong ol hetman mi bin makim bilong yupela, ol birua i wok yet long bagarapim yupela.

Tasol nau bai mi pasim ol na bai ol i no inap mekim nogut long yu na long kantri bilong yu.

Na bai mi larim lain bilong yu i stap, na ol i ken kamapim ol tumbuna pikinini bilong yu.

Lain bilong yu bai i no inap pinis.

Na bai mi mekim ol man long lain bilong yu i kamap king oltaim."

Song bilong Bekim**Dispela em i tok bilong God**
Song 89:2-3.4-5.27.29***Bekim: Oltaim bai mi singsing amamas long marimari bilong Bikpela.***

Bikpela, inap oltaim bai mi singsing amamas long bikpela marimari bilong yu.

Inap long de bihain tru bai maus bilong mi i telimautim stretpela pasin bilong yu.

Mi save, yu laikim mipela oltaim,

na tok tru bilong yu i sanap strong oltaim olsem skai antap.

Bekim:

Yu yet yu tok,
 "Mi wokim kontrak wantaim dispela man mi makim pinis.
 Mi tok tru antap long Devit, wokman bilong mi.
 Na mi promis, 'Bai mi mekim lain bilong yu i gat namba inap oltaim,
 na wanpela tumbuna pikinini bilong yu bai i stap king oltaim.'"

Bekim:

Em bai i tokim mi olsem,
 'Yu papa bilong mi na God bilong mi.'
 Yu save lukautim mi, na mekim gut long mi oltaim.
 Bai mi laikim em tumas oltaim na kontrak bilong mi i no inap pinis.

Bekim:**Welkamim Gutnius:**

Aleluya, Aleluya
 Yu olsem san i kamap na i lait strong.
 Yu olsem bilas bilong lait i stap oltaim na olsem san i soim stretpela pasin.
 Kam na givim lait long ol manmeri i lus na i stap long tudak bilong dai.
 Aleluya

Gutnius**Lu 1:67-79**

Hettok: Bai em i salim tulait bilong heven i kam long yumi.

Harim Gutnius bilong Jisas Kraus Luk i raitim

Holi Spirit i pulap long Sekaraia,
 papa bilong Jon, na em i mekim tok
 profet olsem,
 "Yumi litimapim nem bilong God,
 Bikpela bilong Israel.
 Em i kam na i helpim yumi manmeri
 bilong en, na em i kisim bek yumi.
 Long lain bilong wokboi bilong en
 Devit, Bikpela i kamapim wanpela
 strongpela man bilong kisim bek
 yumi, olsem bipo yet em i bin tok
 long maus bilong ol profet bilong en.
 Em i tok bai em i kisim bek yumi
 long han bilong ol birua bilong yumi,
 na long han bilong ol manmeri i bel
 nogut tru long yumi.
 Em i marimari long ol tumbuna
 bilong yumi na i helpim ol.
 Na em i tingim yet dispela kontrak
 bipo em yet i mekim.

Em i tok tru antap long tumbuna
 bilong yumi Abraham.
 Na nau em i laik mekim long yumi
 olsem bipo em i tok.
 Em i laik kisim bek yumi long han
 bilong ol birua, na yumi ken holim
 wok bilong em, na yumi no ken pret.
 Olsem na olgeta taim yumi stap laip,
 yumi ken wokabaut long ol pasin i
 stret long ai bilong em, na yumi ken
 pulap long ol gutpela gutpela pasin
 em i laikim.
 Na yu, pikinini, bihain bai ol i kolim
 yu profet bilong God Antap Tru.
 Bai yu go pas long Bikpela, bilong
 redim rot bilong en.
 Bai yu lainim ol manmeri bilong en
 na bai ol i save, long bikpela
 marimari bilong en, God i laik tekewe
 sin bilong ol na kisim bek ol.

Bai em i salim tulait bilong heven
i kam long yumi, bilong givim lait
long ol manmeri i stap long ples
tudak.

Bai em i stiaim lek bilong yumi, na
bai yumi wokabaut long rot bilong
bel isi."

Em tasol Gutnius bilong Jisas Krai

Taim bilong Krismas



Pestode bilong SANTU FAMILI i kamap long Sande bihain long Krismas. Sapos i no gat Sande namel long Desemba 26-31, orait pestode bilong Santu Famili i kamap long Desemba 30. Pestode bilong SANTU FAMILI i gat ol rit bilong em yet!!

Desemba 26 (Santu Stiven, martir)

Rit Namba 1

Ap 6:8-10; 7:54-59

Hettok: Mi lukim heven i op.

Rit i kam long Wok bilong ol Aposel

God i helpim tru Stiven na i givim strong long em, olsem na Stiven i save wokim ol kain kain bikpela mirakel namel long ol manmeri. Tasol sampela man i kirap na ol i pait long toktok wantaim Stiven. Ol i man bilong wanpela haus lotu bilong ol Juda, ol i kolim haus lotu bilong ol friman. Ol i man bilong taun Sairini na taun Aleksandria na bilong tupela provins Silisia na Esia. Na Holi Spirit i givim gutpela save tru long Stiven, olsem na ol dispela man i no inap winim tok bilong em. Ol kaunsil i harim tok bilong Stiven, na ol i belhat nogut tru long em na ol i kaikaim tit bilong ol. Tasol Holi Spirit i pulap long Stiven, na em i lukluk i go antap long heven. Em i lukim gutpela lait na bilas bilong God long heven, na em i lukim

Jisas i sanap i stap long han sut bilong God.

Na Stiven i tok olsem,

"Harim. Mi lukim heven i op, na Pikinini Bilong Man em i sanap i stap long han sut bilong God."

Ol i harim dispela tok na ol i singaut strong moa, na ol i pasim yau bilong ol.

Na ol i kirap wantaim na ol i ran i go holimpas Stiven.

Na ol i rausim em i go ausait long taun, na ol i tromoi ston long em bilong kilim em i dai.

Ol man pastaim i bin sutim tok long em, ol i rausim longpela klos bilong ol na putim i stap klostu long lek bilong wanpela yangpela man, nem bilong en Sol.

Taim ol i wok long tromoi ston long Stiven, Stiven i pre olsem, "Bikpela Jisas, yu kisim spirit bilong mi."

Dispela em i tok bilong God

Song bilong Bekim

Song 31:3-4.6.8.17.21

Bekim: Bikpela, mi putim spirit bilong mi long han bilong yu.

Sanap olsem draipela maunten ston i haitim mi, olsem wanpela strongpela ples hait i sevim mi.

Long wanem, yu maunten ston na strongpela haus bilong mi.

Soim rot long mi na stiaim mi, olsem yu bin promis bipo.

Bekim: *Bikpela, mi putim spirit bilong mi long han bilong yu.*

Bikpela, mi putim spirit bilong mi long han bilong yu.

Yu tasol yu bin kisim bek mi.

God, yu save inapim ol promis bilong yu.

Tasol mi bilip tru long yu na bai mi amamas,
long wanem, yu laikim mi oltaim.

Bekim:

Pes bilong yu i ken lait long mi.

Marimari long mi na kisim bek mi.

Yu save was gut long ol na yu haitim ol,

bai ol manmeri nogut i no ken bagarapim ol.

Haitim ol insait long haus sel bilong yu

longwe long tok pait bilong ol tang nogut.

Bekim:

Welkamim Gutnius:

Aleluya, Aleluya

Litimapim nem bilong em i kam long nem bilong Lord.

Bikpela em i God na em i lukautim mipela gut.

Aleluya

Gutnius

Mt 10:17-22

*Hettok: I no yupela yet bai i autim tok. Nogat. Spirit bilong Papa bilong yupela,
em bai i autim tok long maus bilong yupela.*

Harim Gutnius bilong Jisas Kraus Matyu i raitim

Jisas i tokim ol aposel olsem,

„Yupela lukaut long ol manmeri.

Ol bai i kotim yupela long ol kaunsil

bilong ol, na ol bai i wipim yupela
insait long ol haus lotu bilong ol.

Ol bai i ting long daunim mi, na
pulim yupela i go long ol gavman na
ol king.

Olsem na bai yupela i ken autim
gutnius long ol dispela bikman, na
long ol arapela haiden tu.

Taim ol i bringim yupela i go long
kot, yupela i no ken pret na ting,
‘Mipela bai i mekim wanem kain
tok?

Na mipela bai i bekim wanem tok?’

Nogat. Long dispela taim stret God
bai i soim yupela long tok yupela i
mas autim.

Long wanem, i no yupela yet bai i
autim tok. Nogat.

Spirit bilong Papa bilong yupela, em
bai i autim tok long maus bilong
yupela.

Man bai i kotim brata bilong en, na
tokim ol long kilim dispela brata i
dai.

Na ol papa bai i mekim wankain
pasin long ol pikinini bilong ol.

Na ol pikinini bai i birua long
papamama bilong ol na tokim ol
manmeri long kilim ol i dai.

Na olgeta manmeri bai i bel nogut tru long yupela, long wanem, nem bilong mi em i stap long yupela.

Tasol ol manmeri i stap strong inap long las de, God bai i kisim bek ol.“

Em tasol Gutnius bilong Jisas Krai

Desemba 27 (Santu Jon, aposel na evangelis)

Rit Namba 1

1 Jo 1:1-4

Hettok: Dispela Tok i bin i stap bipo tru, na mipela i harim, na mipela i lukim long ai. Mipela i save autim tok long en.

Rit i kam long namba wan pas Jon i raitim

Mipela i save autim tok bilong Tok i gat laip.

Dispela Tok i bin i stap bipo tru, na mipela i harim, na mipela i lukim long ai.

Mipela i bin lukluk long en na putim han long en.

Dispela laip em i bin kamap ples klia, na mipela i bin lukim, na mipela i save autim tok long en.

Na mipela i tokaut long yupela long dispela laip i stap gut oltaim oltaim.

Bipo em i stap wantaim Papa, na em i kamap ples klia na mipela i lukim.

Mipela i lukim na harim pinis, na mipela i save tokaut long yupela tu, bai yupela inap long i stap wanbel wantaim mipela.

Na yumi stap wanbel wantaim Papa, na wantaim Pikinini bilong en Jisas Krai.

Na mipela i raitim dispela tok, bai amamas bilong yumi i ken pulap tru.

Dispela em i tok bilong God

Song bilong Bekim

Song 97:1-2.5-6.11-12

Bekim: Yupela ol stretpela manmeri, yupela i mas litimapim nem bilong Bikpela.

Bikpela em i king ! Graun, yu mas amamas.

Ol ailan bilong solwara, yupela i mas amamas.

Tudak na ol klaut i save karamapim Bikpela.

Gutpela na stretpela pasin em i lek bilong sia king bilong em.

Bekim:

Ol maunten i kamap olsem wara, olsem gris bilong kendel, long ai bilong bikpela king bilong graun.

Ol skai i tokaut long stretpela pasin bilong em

na olgeta manmeri i lukim bikpela bilas bilong em.

Bekim: Yupela ol stretpela manmeri, yupela i mas litimapim nem bilong Bikpela.

God i givim lait long ol stretpela manmeri,

na em i givim amamas long ol manmeri i mekim gutpela pasin.
Yupela ol stretpela manmeri, yupela i mas amamas long Bikpela
na litimapim nem bilong em.

Bekim:

Welkamim Gutnius:

Aleluya, Aleluya
God bilong mipela, mipela i litimapim nem bilong yu.
Yu Bikpela bilong mipela, mipela i amamas moa yet long yu.
Ol aposel i amamas long litimapim nem bilong yu.
Aleluya

Gutnius

Jo 20:2-8

Hettok: Dispela arapela disaipel em i winim Pita, na em i kamap pastaim long matmat.

Harim Gutnius bilong Jisas Krai Jon i raitim

Long namba wan de bilong wik,
Maria bilong Makdala em i ran i go
long Saimon Pita na long dispela
arapela disaipel, Jisas i bin laikim em
tumas, na Maria i tokim tupela olsem,
"Ol i rausim Bikpela pinis long
matmat, na mipela i no save, wanem
hap ol i putim em."

Olsem na Pita wantaim dispela
arapela disaipel, tupela i lusim ples na
i go long matmat.

Tupela i ran i go wantaim, tasol
dispela arapela disaipel em i winim
Pita, na em i kamap pastaim long
matmat.

Em i lindaun na i lukluk i go insait
long matmat, na em i lukim ol dispela

gutpela laplap ol i bin karamapim
bodi bilong Jisas long en.

Tasol em i no i go insait.

Saimon Pita i kam bihain long em, na
em i go insait long matmat.

Na em i lukim ol laplap i stap, na em
i lukim narapela laplap tu, em laplap
ol i bin pasim het bilong Jisas long
en.

Dispela laplap i no i stap wantaim ol
arapela laplap. Nogat.

I luk olsem wanpela man i bin raunim
na putim i stap long narapela hap.

Orait dispela arapela disaipel i bin
kamap pastaim long matmat, em tu i
go insait.

Na em i lukim ol dispela samting na
em i bilip.

Em tasol Gutnius bilong Jisas Krai

Desemba 28 (Ol liklik Pikinini, Herot i bin kilim ol i dai)

Rit Namba 1

1 Jo 1:5-2:2

*Hettok: Blut bilong Jisas, Pikinini Bilong God, em i save rausim olgeta sin
bilong yumi na yumi kamap klin.*

Rit i kam long namba wan pas Jon i raitim

Ol bratasusa, mipela i harim Jisas Krai i autim tok, na mipela i autim long yupela.

Dispela tok i olsem, God em i lait, na i no gat liklik hap tudak i stap long em.

Sapos yumi tok, "Mi wanbel wantaim em," tasol yumi wokabaut long tudak, orait dispela tok bilong yumi em i tok giaman, na yumi no wokabaut long pasin i tru.

Tasol sapos yumi wokabaut long lait, long wankain pasin olsem em i stap long lait, orait yumi stap wanbel wantaim ol arapela manmeri bilong God.

Na blut bilong Jisas, Pikinini Bilong God, em i save rausim olgeta sin bilong yumi na yumi kamap klin.

Sapos yumi tok, "Mi no gat sin," orait yumi giamanim bel bilong yumi yet, na tok tru i no i stap long bel bilong yumi.

Tasol sapos yumi autim sin bilong yumi, orait God bai i mekim olsem em i bin tok.

Em bai i mekim stretpela pasin na lusim sin bilong yumi.

Na em bai i rausim olgeta pasin nogut i stap long yumi na mekim yumi i kamap klin.

Sapos yumi tok, "Mi no bin mekim sin," orait long dispela tok yumi kolim God em i man bilong giaman.

Olsem na tok bilong God i no i stap long bel bilong yumi.

Ol liklik pikinini bilong mi, mi raitim dispela tok long yupela, bai yupela i no ken mekim sin.

Na sapos wanpela man o meri i mekim sin, orait yumi gat Helpim bilong yumi, em i stap wantaim Papa.

Em Jisas Krai, dispela man bilong mekim stretpela pasin olgeta.

Em yet i bin mekim wok bilong tekewe sin bilong yumi.

Na em i no mekim dispela wok bilong helpim yumi tasol. Nogat.

Em i mekim bilong helpim olgeta manmeri i stap long graun.

Dispela em i tok bilong God

Song bilong Bekim**Song 124:2-3.4-5.7-8**

Bekim: Helpim bilong yumi i kam long nem blong Bikpela.

Sapos Bikpela i no bin helpim yumi, bai olsem wanem?
Ol Israel, i ken tokaut olsem, "Sapos Bikpela i no bin helpim yumi,
long taim ol birua i kam pait wantaim yumi,
ating ol inap bagarapim yumi olgeta,
long taim ol i belhat tru long yumi.

Bekim: Helpim bilong yumi i kam long nem blong Bikpela.

Yumi inap lus olgeta olsem tait i karim yumi i go na wara i karamapim yumi.
Na dispela strongpela tait inap kisim yumi na yumi i dai. Tasol nogat."

Bekim:

Yumi ranawe long ol olsem pisin i lusim umben,
wanpela sutman i bin putim bilong kalabusim em.
Umben i bruk pinis na yumi ranawe.

Helpim bilong yumi i kam long nem blong Bikpela,
em i bin mekim kamap heven na graun.

Bekim:

Welkamim Gutnius:

Aleluya, Aleluya

God bilong mipela, mipela i litimapim nem bilong yu.

Yu Bikpela bilong mipela, mipela i amamas moa yet long yu.

Ol lain martir i litimapim nem bilong yu.

Aleluya

Gutnius

Mt 2:13-18

Hettok: Herot i kilim i dai olgeta pikinini man i stap long Betlehem.

Harim Gutnius bilong Jisas Krai Matyu i raitim

Ol saveman i go pinis, na ensel
bilong Bikpela i kamap long Josep
long driman.

Ensel i tok olsem,

"Yu kirap na kisim pikinini wantaim
mama bilong en, na yu ranawe i go
long Isip. Na yu mas i stap long Isip
inap long taim mi givim tok gen long
yu, long wanem, Herot i laik painim
pikinini na kilim em i dai."

Orait Josep i kirap na i kisim pikinini
wantaim mama bilong en long nait
yet, na em i bringim ol i go long Isip.
Na Josep i stap long Isip inap long
Herot i dai pinis.

Dispela samting i kamap bilong
inapim wampela tok Bikpela i bin
mekim long maus bilong profet.

Em i bin tok olsem,

"Pikinini man bilong mi em i
stap long Isip, na mi singautim
em long lusim Isip na em i
kam."

Taim Herot i save olsem, ol saveman
bilong hap sankamap i bin giamanim
em, orait bel bilong en i hat moa.

Na em i salim sampela man i go long
taun Betlehem na long ol ples i stap
klostu long taun, na ol i kilim i dai
olgeta pikinini man i no winim tupela
krismas yet.

Herot i bin askim gut ol saveman
wanem taim tru dispela sta i bin
kamap, long wanem, em i gat tingting
bilong kilim i dai ol pikinini ol mama
i bin karim long dispela taim.

Ol dispela samting inapim wampela
tok God i bin mekim pinis long maus
bilong profet Jeremaia.

Em i tok olsem,

"Bikpela krai na singsing sori i
kamap long taun Rama.

Em Resel i krai sori long ol
pikinini bilong en i dai pinis.

Na em i no laik bai ol manmeri i
mekim gut bel bilong en, long
wanem, olgeta pikinini bilong
en i no moa i stap."

Em tasol Gutnius bilong Jisas Krai

Desemba 29**Rit Namba 1****1 Jo 2:3-11***Hettok: Man i save givim bel bilong en long brata, em i stap long lait.***Rit i kam long namba wan pas Jon i raitim**

Ol bratasusa, sapos yumi bihainim ol lo bilong God, orait yumi ken save tru

olsem, yumi save gut long em.

Sapos wangepela man i tok,

"Mi save gut long God," tasol em i no bihainim ol lo bilong God, orait dispela man em i man bilong giaman, na tok tru i no i stap long bel bilong em.

Na sapos wangepela man i bihainim tok bilong God, orait em i save tru long givim bel bilong en long God, na long dispela pasin yumi save olsem, yumi pas wantaim God.

Sapos wangepela man i tok, "Mi pas wantaim God," orait dispela man i mas wokabaut olsem Krai i bin wokabaut.

Ol pren, dispela lo mi raitim long yupela em i no nupela lo. Nogat.

Em i olupela lo, yupela i bin kisim bipo tru.

Dispela olupela lo, em i dispela tok yupela i harim pinis.

Tasol dispela lo mi raitim long yupela, em i nupela lo tu, na em i tru long laip bilong Krai na long laip bilong yupela tu, long wanem, tudak i laik pinis, na lait tru i kamap pinis na i stap.

Sapos wangepela man i tok, "Mi stap long lait," tasol em i save bel nogut long wangepela Kristen brata, orait dispela man i stap yet long tudak.

Man i save givim bel bilong en long brata, em i stap long lait.

Na long lait i no gat wangepela samting i stap bilong mekim em i pundaun.

Tasol man i save bel nogut long wangepela Kristen brata, em i stap long tudak.

Em i wokabaut long tudak, na em i no save long wanem rot em i bihainim.

Tudak i pasim pinis ai bilong en.

Dispela em i tok bilong God**Song bilong Bekim****Song 96:1-2.2-3.5-6*****Bekim: Olgeta hap bilong graun i mas singim song long Bikpela.***

Singim nupela song bilong litimapim nem bilong Bikpela.

Olgeta hap bilong graun i mas singim song long Bikpela.

Opim maus na singsing amamas long nem bilong em.

Bekim:

Long olgeta de telimautim dispela gutpela nius,

Bikpela i bin kisim bek yumi.

Autim stori bilong biknem bilong em long olgeta kantri,

na tokaut long ol bikpela wok bilong em namel long olgeta lain manmeri.

Bekim:

Bikpela i bin wokim skai, wantaim olgeta samting i stap long skai.
 Bikpela i gat biknem na em i stap king.
 Na olgeta samting i stap long haus holi bilong em
 i soim strong na bikpela bilas bilong em.

Bekim:**Welkamim Gutnius:**

Aleluya, Aleluya
 Em i wanpela lait, na em bai i givim lait long ol manmeri bilong ol arapela lain,
 na em bai i givim biknem long ol Israel.
 Aleluya

Gutnius**Lu 2:22-35**

*Hettok: Ai bilong mi i lukim pinis olsem yu givim biknem long ol Israel, em ol
 lain manmeri bilong yu.*

Harim Gutnius bilong Jisas Krai Luk i raitim

Taim i kamap pinis bilong Josep wantaim Maria i bihainim pasin bilong kamap klin long ai bilong God olsem lo bilong Moses i tok, orait tupela i kisim pikinini i go long Jerusalem bilong givim em long Bikpela.

Tupela i laik bihainim tok i stap long lo bilong Bikpela olsem, "Ol namba wan pikinini man mama i karim, ol dispela yupela i mas givim long Bikpela."

Tupela i bringim tu ol pisin bilong mekim ofa, olsem lo bilong Bikpela i tok, "Tupela namba wan balus, o tupela yangpela namba 2 balus."

Long dispela taim i gat wanpela man i stap long Jerusalem, nem bilong en Simeon.

Em i man bilong mekim stretpela pasin na em i man bilong lotu long God.

Em i wetim dispela man God i bin makim bilong mekim gut bel bilong ol Israel.

Na Holi Spirit i stap long Simeon.

Holi Spirit i tokim em pinis olsem, em bai i no inap i dai kwik. Nogat.

Pastaim em i mas lukim dispela Krai Bikpela i bin promis long salim i kam.

Orait Holi Spirit i kirapim em na em i go insait long tempel.

Na papamama i bringim pikinini Jisas i kam bilong mekim pasin long em olsem lo i tok.

Na Simeon i kisim em long han bilong en na i holim em.

Na Simeon i litimapim nem bilong God olsem,

"Bikpela, mi wokboi bilong yu, na nau yu ken larim mi i go, na bel bilong mi i ken i stap isi, olsem bipo yu tok.

Ai bilong mi i lukim pinis samting yu mekim bilong kisim bek mipela.

Yu bin redim dispela long ai bilong olgeta lain manmeri.

Em i wanpela lait, na em bai i givim lait long ol manmeri bilong ol arapela lain, na em bai i givim biknem long

ol Israel, em ol lain manmeri bilong yu."

Papa wantaim mama bilong Jisas tupela i harim dispela tok Simeon i mekim long em, na tupela i tingting planti.

Na Simeon i givim blesing long ol, na em i tokim Maria, mama bilong pikinini, olsem,

"Harim. God i makim dispela pikinini bilong mekim planti Israel i pundaun, na bilong mekim planti i kirap gen.

Em bai i stap olsem wanpela mak, na planti manmeri bai i tok nogut long em.

Olsem na tingting hait bilong planti manmeri bai i kamap ples klia.

Na yu bai i stap olsem wanpela bainat i sutim lewa bilong yu tu."

Em tasol Gutnius bilong Jisas Krais

Desemba 30

Rit Namba 1

1 Jo 2:12-17

Hettok: Ol manmeri i bihainim tok bilong God, ol bai i stap oltaim.

Rit i kam long namba wan pas Jon i raitim

Yupela liklik pikinini bilong mi, long nem bilong Krais God i lusim pinis ol sin bilong yupela.

Olsem na mi raitim dispela tok long yupela.

Yupela ol papa, yupela i save gut long dispela man i stap bipo tru na i stap yet.

Olsem na mi raitim dispela tok long yupela.

Yupela yangpela man, yupela i winim Satan pinis.

Olsem na mi raitim dispela tok long yupela.

Yupela ol pikinini, yupela i save gut long Papa.

Olsem na mi raitim dispela tok long yupela.

Yupela ol papa, yupela i save gut long dispela man i stap bipo tru na i stap yet.

Olsem na mi raitim dispela tok long yupela.

Yupela yangpela man, yupela i gat strong, na tok bilong God i stap strong insait long yupela, na yupela i winim Satan pinis.

Olsem na mi raitim dispela tok long yupela.

Yupela i no ken laikim ol pasin bilong graun na olgeta samting bilong graun.

Sapos wanpela man i laikim ol pasin bilong graun, orait em i no save laikim tru Papa.

Yumi save, olgeta pasin bilong ol man bilong graun, em pasin bilong bel kirap na aigris na bikhet, ol dispela pasin i no kam long Papa.

Nogat. Ol i pasin bilong graun tasol.

Na dispela graun bai i pinis, na olgeta pasin bilong dispela graun, em ol pasin bilong bel i kirap na aigris, ol tu bai i pinis wantaim.

Tasol man i bihainim tok bilong God, em bai i stap oltaim.

Dispela em i tok bilong God

Song bilong Bekim**Song 96:7-8.8-9.10****Bekim: Skai na graun, yupela i mas amamas.**

Yupela olgeta lain manmeri bilong graun, litimapim nem long Bikpela.

Tok amamas long biknem na strong bilong em.

Litimapim biknem bilong Bikpela.

Bekim:

Karim ofa i kam na bringim i go insait long haus bilong em.

Pasim naispela klos na lotu long em.

Yupela olgeta lain manmeri bilong graun,

yupela i mas guria na pret long em.

Bekim:

Yupela i mas tokaut olsem, "Bikpela em wanpela i king."

Em yet i sanapim graun na graun i no inap surik liklik.

Em bai i skelim ol manmeri long stretpela pasin.

Bekim:**Welkamim Gutnius:**

Aleluya, Aleluya

Wanpela de holi i kamap pinis olsem san i winim tudak long moning tru.

Yupela olgeta lain manmeri bilong graun, yupela kam na adorim nem bilong

Bikpela, long wanem, wanpela bikpela lait i kamap ples klia long graun.

Aleluya

Gutnius**Lu 2:36-40***Hettok: Em i autim tok bilong dispela pikinini long olgeta manmeri i wet long God i kisim bek ol manmeri bilong Jerusalem.***Harim Gutnius bilong Jisas Kraus Luk i raitim**

Wanpela profet meri i stap, nem bilong en Ana.

Em i pikinini bilong Fanuel bilong lain bilong Aser.

Em i lapun tru.

Bipo em i marit, na i stap 7-pela yia wantaim man bilong en.

Na bihain man bilong en i dai, na em i stap nating.

Na nau em i gat 84 krismas bilong en.

Ana i no save lusim tempel.

Em i save tambu long kaikai na i beten i stap, na em i holim wok bilong God long san na long nait.

Long dispela taim em tu i kam klostu long pikinini na i tenkyu long God.

Na em i autim tok bilong dispela pikinini long olgeta manmeri i wet long God i kisim bek ol manmeri bilong Jerusalem.

Ol i mekim pinis olgeta samting olsem lo bilong Bikpela i tok, orait ol i go bek long Galili long Nasaret, em taun bilong ol.

Na pikinini em i kamap bikpela na i kamap strong.

Em i gat planti gutpela save, na marimari bilong God i stap long em.

Em tasol Gutnius bilong Jisas Krai

Desemba 31

Rit Namba 1

1 Jo 2:18-21

Hettok: Yupela i kisim Holi Spirit pinis, na yupela olgeta i gat save.

Rit i kam long namba wan pas Jon i raitim

Ol pikinini bilong mi, yumi kamap pinis long taim bilong las de. Bipo yupela i harim tok long birua bilong Krai bai i kamap. Nau planti birua bilong Krai ol i kamap pinis. Olsem na yumi save, yumi kamap pinis long taim bilong las de. Pastaim ol dispela manmeri i bin i stap wantaim yumi, na ol i lusim yumi na i go. Tasol ol i no bin i stap lain bilong yumi tru. Sapos ol i bilong yumi tru, orait ol bai i stap yet wantaim yumi.

Tasol ol i lusim yumi pinis, olsem na yumi save gut, dispela olgeta manmeri ol i no bilong yumi tru. Yupela i kisim Holi Spirit pinis, na yupela olgeta i gat save. Olsem na mi no ting yupela i no save long tok tru, na mi raitim dispela tok long yupela. Nogat. Mi rait, long wanem, yupela i save pinis long tok tru, na yupela i save, tok tru i no inap kamapim tok giaman.

Song bilong Bekim

**Dispela em i tok bilong God
Song 96:1-2.11-12.13**

Bekim: Skai na graun, yupela i mas amamas.

Singim nupela song bilong litimapim nem bilong Bikpela. Olgeta hap bilong graun i mas singim song long Bikpela. Opim maus na singsing amamas long nem bilong em. Long olgeta de telimautim dispela gutpela nius, Bikpela i bin kisim bek yumi.

Bekim:

Skai na graun, yupela i mas amamas. Biksolwara wantaim ol samting i stap insait long solwara, yupela i mas pairap na singsing amamas. Ol gaden wantaim ol kaikai i stap long gaden, yupela i mas amamas tru. Olgeta diwai bilong bus, yupela i mas belgut na singsing.

Bekim:

Long wanem, Bikpela i kam nau. Em i kam bilong bosim graun. Em bai i bosim olgeta kantri long stretpela pasin, na skelim ol manmeri long tok tru.

Bekim:***Welkamim Gutnius:***

Aleluya, Aleluya

Tok em i bin kamap man, na em i kam i stap namel long mipela.

Na em i givim namba long ol manmeri i bilip long nem bilong em.

Aleluya

Gutnius***Jo 1:1-18****Hettok: Tok em i bin kamap man. Na em i givim namba long ol manmeri bai ol i ken kamap pikinini bilong God.***Harim Gutnius bilong Jisas Krai Jon i raitim**

Bipo bipo tru, taim olgeta
samting i no kamap yet,
Tok i stap.

Tok i stap wantaim God
na Tok em yet i God.

Bipo bipo tru Tok i stap
wantaim God.

Long dispela Tok tasol God i
mekim kamap olgeta samting.

Na i no gat wanpela samting i
kamap long narapela rot. Nogat.

Olgeta samting i kamap, em
Tok yet i mekim kamap.

Laip i stap long em, na dispela
laip em i lait bilong ol manmeri.
Dispela lait i save lait i stap long
tudak, na tudak i no bin daunim
em.

Wanpela man i kamap, nem bilong en
Jon. God i bin salim em ikam.

Em i kam bilong autim tok.

Em i autim tok bilong dispela lait, bai
olgeta manmeri i ken harim tok
bilong em, na ol i ken bilip.

Em yet em i no dispela lait. Nogat.

Em i kam bilong autim tok tasol
bilong dispela lait.

Dispela lait em i lait tru na i
save givim lait long olgeta
manmeri, em i laik i kam long
graun.

Orait Tok em i stap long graun.

Long dispela Tok tasol God i
bin wokim graun, tasol ol
manmeri bilong graun ol i no
luksave long em.

Em i go long as ples bilong em
yet, tasol ol lain bilong en ol i
no kisim em.

Tasol sampela manmeri i kisim
em, em ol lain i bilip long nem
bilong em.

Na em i givim namba long ol
bai ol i ken kamap pikinini
bilong God.

Ol i no kamap pikinini bilong
God long blut bilong
papamama, o long laik bilong
bodi, o long laik bilong man.
Nogat. God yet i mekim ol i
kamap pikinini bilong em.

Tok em i bin kamap man, na em
i kam i stap namel long mipela.

Mipela i lukim pinis bikpela
namba na strong bilong em.

Em i namba bilong dispela
wanpela Pikinini tasol, Papa i
salim em i kam.

Marimari na pasin i tru i pulap
long em.

Jon i tokim ol manmeri long em na i
singaut olsem, "Em dispela man, bipo
mi tokim yupela pinis long em. Mi
bin tok olsem, 'Man i kam bihain

long mi, em i namba wan bilong mi.
Long wanem, em i stap bipo, taim mi
no kamap yet.' "

Marimari i pulap moa yet long
dispela man, na long marimari
bilong em, em i save mekim gut
tru long yumi olgeta.

I tru, God i givim lo long yumi
long han bilong Moses.

Tasol long Jisas Krai yumi
kisim marimari wantaim pasin i
tru.

I no gat wanpela man o meri i
bin lukim God. Nogat tru.

Dispela wanpela Pikinini Bilong
God, em yet i God na em i stap
klostu tru long Papa, em
wanpela tasol i bin soim God
long yumi.

Em tasol Gutnius bilong Jisas Krai

Long PNG na SI pestode bilong Ipifani bai kamap long namba wan Sande bihain long Janueri 1. Yu mas yusim ol rit long lista bilong *ol wikde Janueri 2 - 7 inap long Sande bilong Ipifani i kamap.*

Na yu mas lusim ol rit bilong *ol wikde Janueri 2 - 7 i kamap bihain long Sande bilong Ipifani na yusim tasol ol rit bilong ol wikde Mande bihain long Ipifani inap long Sarere bihain long Ipifani. Lukim pes 87.*

Janueri 2

Rit Namba 1

1 Jo 2:22-28

Hettok: Ol dispela tok bipo yupela i harim, em yupela i mas holim strong.

Rit i kam long namba wan pas Jon i raitim

Ol bratasusa, man bilong tok giaman em husat?

Em i dispela man i save tok, "Jisas em i no Krai."

Man i mekim dispela kain tok, em i save givim baksait long Papa wantaim Pikinini, olsem na em i birua bilong Krai.

Man i givim baksait long Pikinini, em i givim baksait long Papa tu.

Man i bilip long Pikinini, em i bilip long Papa tu.

Ol dispela tok bipo yupela i harim, em yupela i mas holim strong.

Sapos yupela i holim strong dispela tok bipo yupela i harim, orait Pikinini wantaim Papa tupela bai i stap wantaim yupela oltaim.

Na Krai i bin givim promis long yumi olsem, em bai i givim yumi laip bilong i stap gut oltaim.

Mi raitim dispela tok long yupela bilong tokim yupela long pasin bilong dispela ol manmeri i laik giamanim yupela.

Tasol yupela i bin kisim Holi Spirit long Krai, na em i stap yet wantaim yupela.

Olsem na yupela i no sot long save, na bai mi skulim yupela. Nogat.

Holi Spirit yet i save skulim yupela long olgeta samting, na dispela tok bilong Spirit em i tru.

Em i no giaman. Olsem na yupela i mas pas wantaim Krai, olsem Spirit i bin skulim yupela.

Yes, ol pikinini bilong mi, yupela i mas i pas wantaim Krai.

Olsem na taim em i kamap ples klia, bai yumi ken sanap strong, na yumi no ken sem long sanap long ai bilong em.

Dispela em i tok bilong God

Song bilong Bekim

Song 98:1.2-3.3-4

Bekim: Olgeta hap bilong graun i lukim pinis God bilong yumi i win.

Singim nupela song bilong litimapim nem bilong Bikpela, long wanem, em i bin mekim planti strongpela wok.

Raithan na pasin holi bilong em i mekim em i win.

Bekim: *Olgeta hap bilong graun i lukim pinis God bilong yumi i win.*

Bikpela i tokaut long em i win pinis.

Em i soim stretpela pasin bilong em long olgeta lain manmeri.

Em inapim promis bilong em, em i sambai oltaim long lain Israel, long wanem, em i laikim ol tumas.

Bekim:

Olgeta manmeri bilong olgeta hap bilong graun

i lukim pinis God bilong yumi i win.

Olgeta kantri bilong graun, yupela singaut strong long Bikpela.

Yupela tok amamas long em wantaim singsing na musik.

Bekim:

Welkamim Gutnius:

Aleluya, Aleluya

God i bin givim tok long ol tumbuna bilong yumi long maus bilong ol profet.

Tasol long dispela taim nau, God i bin autim tok long yumi long maus bilong Pikinini Man bilong em.

Aleluya

Gutnius

Jo 1:19-28

Hettok: Wanpela man i kam bihain long mi.

Em i stap bipo, taim mi no kamap yet.

Harim Gutnius bilong Jisas Kraus Jon i raitim

Ol Juda i salim ol pris na Livai na ol i lusim Jerusalem na i kam askim Jon olsem, "Yu husat tru?"

Orait Jon i autim tok olsem.

Em i tokaut klia na i no haitim tok.

Em i tokaut olsem, "Mi no dispela Mesaia."

Na ol i askim em, "Olsem wanem? Ating yu Elaija, a?"

Na em i tok, "Nogat."

Ol i tok, "Ating yu dispela profet mipela i wetim?"

Na em i bekim tok, "Nogat."

Olsem na ol i askim em gen,

"Yu husat tru? Mipela i mas bekim wanpela tok long ol man i bin salim mipela i kam. Yu tok wanem long yu yet?"

Orait na Jon i tok olsem,

„Mi dispela ‘maus bilong wanpela man i stap long ples i no gat man na i singaut olsem, "Stretim rot bilong Bikpela." ’ Em i olsem bipo profet Aisaia i bin tok.“

Ol Farisi i bin salim ol dispela man i kam.

Na ol i askim Jon olsem, "Sapos yu no dispela Mesaia, na yu no Elaija, na yu no dispela profet, orait watpo yu save givim baptais long ol manmeri?"

Jon i bekim tok bilong ol olsem,

"Mi save baptaisim ol long wara.

Tasol i gat wanpela man i stap namel long yupela, na yupela i no save long em.

Em i dispela man i kam bihain long mi.

Mi yet mi no gutpela man inap long mi lusim string i pasim su bilong en."

Jon i bin mekim dispela tok long ples Betani, long hapsait bilong wara Jordan.

Long dispela ples Jon i save givim baptais long ol manmeri.

Em tasol Gutnius bilong Jisas Krai

Janueri 3

Rit Namba 1

1 Jo 2:29-3:6

Hettok: Man o meri i pas wantaim Krai, em i no save bihainim pasin bilong sin.

Rit i kam long namba wan pas Jon i raitim

Ol bratasusa, sapos yupela i save olsem, pasin bilong Krai em i stretpela olgeta, orait yupela i ken save tu olsem, olgeta manmeri i mekim stretpela pasin, ol i bin kamap pikinini bilong God.

Olanan, Papa i bin laikim yumi na givim bel bilong em moa yet long yumi!

Em i kolim yumi ol pikinini bilong God.

Na tru tumas, yumi stap pikinini bilong God.

Ol manmeri bilong graun i no bin save long God, olsem na ol i no save long yumi tu.

Ol pren, nau yumi stap pikinini bilong God.

Na bihain yumi bai i stap olsem wanem, dispela em i no klia yet.

Tasol yumi save, taim Krai i kamap ples klia, yumi bai lukim em tru, na yumi bai kamap wankain olsem em yet.

Na olgeta manmeri i save wetim em, ol i save mekim ol yet i kamap klin long ai bilong God, na ol i stap klin olsem Krai i stap klin.

Man o meri i save mekim sin, em i sakim lo bilong God.

Sin em i pasin bilong sakim lo.

Yupela i save, Krai i bin kamap bilong tekewe sin, na i no gat sin i stap long em.

Man o meri i pas wantaim Krai, em i no save bihainim pasin bilong sin.

Sapos wanpela man o meri i bihainim pasin bilong sin, orait yumi ken save, em i no bin lukim Krai, na em i no save long Krai.

Dispela em i tok bilong God

Song bilong Bekim

Song 98:1.3-4.5-6

Bekim: Olgeta hap bilong graun i lukim pinis God bilong yumi i win.

Singim nupela song bilong litimapim nem bilong Bikpela, long wanem, em i bin mekim planti strongpela wok.

Raithan na pasin holi bilong em i mekim em i win.

Bekim:

Em inapim promis bilong em, em i sambai oltaim long lain Israel, long wanem, em i laikim ol tumas.

Olgeta manmeri bilong olgeta hap bilong graun
 i lukim pinis God bilong yumi i win.
 Olgeta kantri bilong graun, yupela singaut strong long Bikpela.
 Yupela tok amamas long em wantaim singsing na musik.

Bekim:

Singim ol song bilong litimapim nem bilong God.
 Paitim gita na kundu.
 Winim biugel na mambu.
 Yupela singaut strong na litimapim nem bilong Bikpela, king bilong yumi.

Bekim:**Welkamim Gutnius:**

Aleluya, Aleluya
 Tok em i bin kamap man, na em i kam i stap namel long mipela. Na em i givim
 namba long ol manmeri i bilip long nem bilong em bai ol i ken kamap pikinini
 bilong God.
 Aleluya

Gutnius**Jo 1:29-34***Hettok: Lukim. Em i Pikinini Sipsip Bilong God.***Harim Gutnius bilong Jisas Krai Jon i raitim**

Long de bihain, Jon i lukim Jisas i
 wokabaut i kam long em.
 Na Jon i tok,
 "Lukim. Em i Pikinini Sipsip Bilong
 God. Em i kam bilong tekewe sin
 bilong olgeta manmeri bilong graun.
 Em dispela man tasol bipo mi bin tok
 long en olsem, 'Man i kam bihain
 long mi, em i namba wan bilong mi.
 Long wanem, em i stap bipo, taim mi
 no kamap yet.'
 Mi yet mi no bin save long em i husat
 tru. Tasol mi kam baptaisim ol
 manmeri long wara bai ol manmeri
 bilong Israel i ken save long dispela
 man."
 Na Jon i tokaut moa olsem,

"Mi lukim pinis Holi Spirit i lusim
 heven na i kam daun olsem wanpela
 bilong ol dispela pisin ol i kolim
 balus, na em i go i stap antap long
 em.
 Mi yet mi no bin save long em.
 Tasol God i bin salim mi na mi kam
 bilong baptaisim ol manmeri long
 wara, bipo em i bin tokim mi olsem,
 'Taim yu lukim Holi Spirit i kam
 daun na i stap long wanpela man,
 orait em dispela man tasol i kam
 bilong baptaisim ol manmeri long
 Holi Spirit.'
 Na mi yet mi lukim na mi autim tok
 pinis olsem, dispela em i Pikinini
 Bilong God."

Em tasol Gutnius bilong Jisas Krai

Janueri 4**Rit Namba 1****1 Jo 3:7-10**

Hettok: Sapos wanpela man i kamap pikinini bilong God, orait em i no save bihainim pasin bilong sin.

Rit i kam long namba wan pas Jon i raitim

Ol liklik pikinini bilong mi, yupela lukaut, nogut wanpela man i giamanim yupela.

Man i mekim stretpela pasin, em i stretpela man, olsem Krai em i stretpela man.

Stat long bipo tru, Satan i save mekim sin oltaim, olsem na man i save mekim sin, em i man bilong Satan.

Na Pikinini Bilong God i bin kamap ples klia bilong bagarapim na rausim wok bilong Satan.

Sapos wanpela man i kamap pikinini bilong God, orait em i no save bihainim pasin bilong sin.

Laip bilong God yet em i stap long dispela man, olsem na em i no inap long bihainim pasin bilong sin.

Nogat. Em i stap pikinini bilong God. Sapos yumi laik save husat em i pikinini bilong God, na husat em i pikinini bilong Satan, orait yumi ken save olsem, man i no mekim stretpela pasin, em i no bilong God.

Na man i no save laikim tru ol arapela pikinini bilong God, em tu i no bilong God.

Yumi wan wan i mas laikim tru ol arapela.

Dispela em i tok bilong God**Song bilong Bekim****Song 98:1.7-8.9**

Bekim: Olgeta hap bilong graun i lukim pinis God bilong yumi i win.

Singim nupela song bilong litimapim nem bilong Bikpela, long wanem, em i bin mekim planti strongpela wok.

Raithan na pasin holi bilong em i mekim em i win.

Bekim:

Solwara na olgeta samting i stap insait long en i mas pairap.

Graun na olgeta manmeri i stap long en i mas singsing.

Ol riva i mas paitim han.

Ol maunten i mas bung wantaim na singsing amamas.

Bekim: Olgeta hap bilong graun i lukim pinis God bilong yumi i win.

Olgeta ol i mas singsing welkam long Bikpela,

long wanem, em i kam nau bilong bosim graun.

Em bai i bosim olgeta manmeri long gutpela lo na em bai i skelim ol long stretpela pasin.

Bekim:

Welkamim Gutnius:

Aleluya, Aleluya

God i bin givim tok long ol tumbuna bilong yumi long maus bilong ol profet.
Tasol long dispela taim nau, God i bin autim tok long yumi long maus bilong
Pikinini Man bilong em.

Aleluya

Gutnius

Jo 1:35-42

Hettok: Mipela i lukim pinis Mesaia.

Harim Gutnius bilong Jisas Krai Jon i raitim

Long de bihain, Jon i sanap i stap gen
na tupela disaipel bilong en i sanap
wantaim em.

Na em i lukim Jisas i wokabaut i go.
Na Jon i tok, "Lukim. Em i Pikinini
Sipsip Bilong God."

Dispela tupela disaipel i harim em i
mekim dispela tok, na tupela i go
bihainim Jisas.

Jisas i tanim na i lukim tupela i
bihainim em i kam, na em i askim
tupela olsem, "Yutupela i painim
wanem samting?"

Na tupela i askim em, "Rabai, yu stap
long wanem haus?"

Dispela nem "Rabai" em i olsem,
"Tisa."

Orait Jisas i tokim tupela olsem,
"Yutupela kam lukim."

Orait tupela i go na i lukim haus em i
stap long en.

Na long dispela de tupela i stap
wantaim em.

Long wanem, em i olsem 4 klok long
apinun.

Andru, em brata bilong Saimon Pita,
em i wanpela bilong dispela tupela
man i harim tok bilong Jon na i go
bihainim Jisas.

Em i lusim Jisas pinis, orait em i go
stret na painim brata bilong en
Saimon, na em i tokim Saimon
olsem, "Mipela i lukim pinis Mesaia."
Dispela nem "Mesaia" em i olsem,
"Man God i makim bilong kisim bek
ol manmeri bilong en."

Na Andru i bringim Saimon i go long
Jisas.

Jisas i lukim em na i tok,
"Yu Saimon, pikinini bilong Jon.

Bihain bai ol i kolim yu long nem
Sifas."

Dispela nem "Sifas" em i wankain
olsem "Pita."

Mining bilong en i olsem, "Ston."

Em tasol Gutnius bilong Jisas Krai

Janueri 5**Rit Namba 1****1 Jo 3:11-21**

Hettok: Yumi save givim bel bilong yumi long ol arapela manmeri bilong God, olsem na yumi save, yumi lusim pinis pasin bilong i dai, na yumi stap long pasin bilong laip.

Rit i kam long namba wan pas Jon i raitim

Bipo tru yupela i bin harim tok olsem, yumi wan wan i mas laikim tru ol arapela.

Yumi no ken i stap olsem Kein.

Em i man bilong Satan, na em i kilim i dai brata bilong en.

Na bilong wanem em i kilim i dai brata bilong en?

Em i kilim em, long wanem, pasin bilong en em i nogut, na pasin bilong brata bilong en em i stretpela.

Ol bratasusa, sapos ol manmeri bilong graun i birua long yupela, orait yupela i no ken kirap nogut long dispela.

Yumi save givim bel bilong yumi long ol arapela manmeri bilong God, olsem na yumi save, yumi lusim pinis pasin bilong i dai, na yumi stap long pasin bilong laip.

Man i no save givim bel bilong en long ol bratasusa, em i stap yet long pasin bilong i dai.

Man i no laikim tru brata o susa bilong en na i bel nogut long em, i olsem em i kilim man i dai.

Na yupela i save, man i kilim narapela man i dai, em i no kisim laip bilong i stap gut oltaim oltaim.

Jisas i lusim laip bilong em yet na i dai bilong helpim yumi, na dispela pasin bilong en i soim yumi pinis

long pasin bilong laikim tru ol arapela.

Na yumi tu yumi mas lusim laip bilong yumi bilong helpim ol Kristen bratasusa.

Tasol sapos wanpela man i gat ol samting bilong dispela graun, na em i lukim narapela brata o susa i sot long ol samting, na sapos em i no sori long em, orait yumi save, pasin bilong God bilong laikim tru ol arapela, em i no i stap long dispela man.

Ol liklik pikinini bilong mi, yumi no ken laikim ol bratasusa long tok tasol o long maus tasol. Nogat.

Yumi mas givim bel bilong yumi tru long ol na mekim gutpela pasin long ol.

Sapos yumi laikim tru ol arapela, orait yumi ken save, yumi bihainim tok tru.

Na maski sapos bel bilong yumi i kotim yumi long wanpela samting, yumi ken i stap bel isi long ai bilong God.

Long wanem, God em i save long olgeta samting, na save bilong en i winim tru save i stap long bel bilong yumi.

Ol pren, sapos bel bilong yumi i no kotim yumi, orait yumi save sanap strong long ai bilong God.

Dispela em i tok bilong God

Song bilong Bekim

Song 100:1-2.3.4.5

Bekim: Yupela ol manmeri, yupela i singim ol song bilong amamas.

Yupela ol manmeri bilong olgeta graun, yupela i go klostu long em,
na Yupela ol manmeri singim ol song bilong amamas.

Yupela i mas amamas tru, na lotu long Bikpela.

Yupela i go klostu long em na singim ol song bilong amamas.

Bekim:

Yupela i mas save, Bikpela em i God.

Em i bin wokim yumi; yumi bilong em stret.

Yumi ol manmeri bilong em; yumi ol sipsip bilong banis bilong em.

Bekim:

Yupela i go insait long ol bikpela dua bilong haus holi bilong em
na yupela i givim tenkyu long em.

Wokabaut insait long banis bilong em wantaim singsing amamas.

Tok tenkyu long em na litimapim nem bilong em.

Bekim:

Tru tumas, Bikpela em i save mekim gutpela pasin long yumi.

Em i save laikim yumi tru, na marimari bilong em i no save pinis.

Bekim:

Welkamim Gutnius:

Aleluya, Aleluya

Wanpela de holi i kamap pinis olsem san i winim tudak long moning tru.

Yupela olgeta lain manmeri bilong graun, yupela kam na adorim nem bilong

Bikpela, long wanem, wanpela bikpela lait i kamap ples klia long graun.

Aleluya

Gutnius

Jo 1:43-51

Hettok: Yu Pikinini Bilong God. Yu King bilong Israel.

Harim Gutnius bilong Jisas Krai Jon i raitim

Long de bihain, Jisas i laik i go long Galili.

Na em i go painim Filip, na i tokim em olsem, "Yu kam bihainim mi."

Filip em i man bilong taun Betsaida, em as ples bilong Andru tupela Pita.

Orait Filip i go painim Nataniel na i tokim em olsem,

"Mipela i lukim pinis dispela man bipo Moses i bin raitim tok bilong em long buk bilong lo, na ol profet tu i bin raitim tok bilong em.

Em Jisas bilong taun Nasaret, em pikinini bilong Josep."

Na Nataniel i askim em olsem, "Ating wanpela gutpela samting em inap kamap long Nasaret, a?"

Na Filip i tokim em, "Yu kam lukim." Jisas i lukim Nataniel i kam long em, na em i tok olsem,

"Lukim. Dispela man i kam, em i man tru bilong Israel.

I no gat wanpela giaman tok o giaman pasin i stap long em."

Na Nataniel i askim Jisas olsem,
 "Olsem wanem na yu save long mi?"
 Na Jisas i bekim tok bilong em
 olsem,
 "Taim Filip i no singautim yu yet, mi
 lukim yu i stap long as bilong diwai
 fik."
 Nataniel i harim dispela tok na em i
 tok olsem, "Tisa, yu Pikinini Bilong
 God. Yu King bilong Israel."
 Na Jisas i bekim tok olsem,

Janueri 2 inap long long Ipifani

"Mi tokim yu olsem mi lukim yu i
 stap long as bilong diwai fik, na long
 dispela as tasol yu bilip long mi.
 Bihain bai yu lukim ol bikpela
 samting i winim tru dispela."
 Na Jisas i tokim em moa olsem,
 "Tru tumas mi tokim yupela, bihain
 bai yupela i lukim heven i op, na bai
 yupela i lukim ol ensel bilong God i
 go antap na i kam daun long Pikinini
 Bilong Man."

Em tasol Gutnius bilong Jisas Krai

Janueri 6

Rit Namba 1

1 Jo 5:5-13

Hettok: I gat tripela i autim tok long pasin bilong en, em Holi Spirit na wara na blut. Na tripela i mekim wanpela tok tasol.

Rit i kam long namba wan pas Jon i raitim

Ol bratasusa, husat i save winim
 strong bilong dispela graun?
 Man i bilip long Jisas em i Pikinini
 Bilong God, dispela man i save win.
 Jisas Krai i bin i kam long pasin
 bilong kisim baptais long wara, na
 long pasin bilong kapsaitim blut
 bilong en long diwai kros.
 Em i no i kam long pasin bilong wara
 tasol. Nogat.
 Em i kam long pasin bilong wara
 wantaim blut.
 Holi Spirit em i as bilong tok tru, na
 Holi Spirit i save autim tok long pasin
 bilong Jisas Krai.
 I gat tripela i autim tok long pasin
 bilong en, em Holi Spirit na wara na
 blut. Na tripela i mekim wanpela tok
 tasol.
 Yumi save bilipim tok ol manmeri i
 autim. Tasol tok God i autim, em i
 winim tru tok bilong ol manmeri.
 Na dispela tok God i autim pinis, em i
 tok long Pikinini bilong en.

Man i save bilip long Pikinini Bilong
 God, em i kisim pinis dispela tok God
 i bin autim, na em i stap long bel
 bilong en.
 Tasol man i no bilipim tok bilong
 God, i olsem em i kolim God em i
 man bilong giaman, long wanem, em
 i no bilipim tok God i bin autim long
 pasin bilong Pikinini bilong en.
 Na long dispela pasin God i soim
 olsem tok bilong en i tru.
 God i bin givim yumi laip bilong i
 stap gut oltaim oltaim, na as bilong
 dispela laip em i stap long Pikinini
 bilong em.
 Man i pas wantaim Pikinini Bilong
 God, em i gat dispela laip.
 Na man i no pas wantaim Pikinini
 Bilong God, em i no gat dispela laip.
 Mi raitim dispela tok long yupela ol
 manmeri i save bilip long nem bilong
 Pikinini Bilong God, bai yupela inap
 save, yupela i kisim pinis laip bilong i
 stap gut oltaim oltaim.

Dispela em i tok bilong God

Song bilong Bekim

Song 147:12-13.14-15.19-20

Bekim: Jerusalem, litimapim nem bilong Bikpela.

Jerusalem, litimapim nem bilong Bikpela.
Saion, givim ona long God bilong yu.
Long wanem, em i strongim ol dua bilong yu
na i blesim ol manmeri i stap insait long yu.

Bekim:

Em i givim bel isi long ol manmeri i stap long graun bilong yu
na em i givim gutpela kaikai tru long yu.
Em i salim wanpela tok, na wantu dispela tok i kam daun long graun.

Bekim:

Em i givim tok blong em long Jekop
na i givim lo na skul bilong em long Israel.
Em i no bin mekim olsem long ol arapela lain. Nogat.
Ol i no save long ol lo bilong em.

Bekim:

Welkamim Gutnius:

Aleluya, Aleluya
Ol heven i op, na wanpela maus i tok olsem, "Dispela em i Pikinini bilong mi, mi laikim em tumas. Yupela harim tok bilong em."
Aleluya

Gutnius

Mk 1:7-11

Hettok: Yu Pikinini bilong mi. Mi laikim yu tumas. Bel bilong mi em i amamas long yu.

Harim Gutnius bilong Jisas Krais Mak i raitim

Jon i autim tok olsem,
"Wanpela man i kam bihain long mi,
na strong bilong en i winim strong bilong mi.
Mi no gutpela man inap long mi brukim skru na lusim string i pasim su bilong em.
Mi save baptaisim yupela long wara.
Tasol em bai i baptaisim yupela long Holi Spirit."

Long dispela taim Jisas i lusim taun Nasaret long distrik Galili na i kam.
Na Jon i baptaisim em long wara Jordan.
Na Jisas i lusim wara na i kam antap, na wantu em i lukim heven i op, na Holi Spirit i kam daun long em olsem wanpela bilong ol dispela pisin ol i kolim balus.
Na long heven wanpela maus i singaut olsem,

"Yu Pikinini bilong mi. Mi laikim

yu tumas. Bel bilong mi em i amamas long yu."

Em tasol Gutnius bilong Jisas Krai

Janueri 7

Rit Namba 1

1 Jo 5:14-21

Hettok: Sapos yumi bihainim laik bilong God yet na yumi beten na askim em long wanpela samting, orait em i save harim beten bilong yumi.

Rit i kam long namba wan pas Jon i raitim

Ol bratasusa, sapos yumi bihainim laik bilong God yet na yumi beten na askim em long wanpela samting, orait em i save harim beten bilong yumi.

Olsem na yumi no save pret long God. Nogat.

Yumi save go klostu long em.

Yumi save, em i save harim olgeta beten bilong yumi.

Olsem na taim yumi askim em long givim wanpela samting long yumi, yumi save olsem yumi kisim tru dispela samting.

Sapos wanpela man i lukim narapela Kristen brata i mekim sin, na sapos dispela sin em i no inap long mekim dispela brata i dai, orait dispela man i ken beten long God, na God bai i givim laip long dispela brata.

Mi tok long ol manmeri i mekim kain sin em i no inap long mekim ol i dai.

I gat kain sin em inap mekim man i dai, na mi no tok long yupela i mas beten long dispela.

Olgeta pasin i no stret, em i sin. Tasol i gat kain sin i no save mekim man i dai.

Yumi save, olgeta manmeri i stap pikinini bilong God, ol i no save bihainim pasin bilong sin. Nogat.

God i save lukautim gut man o meri i stap pikinini bilong em, na Satan i no inap putim han long em.

Yumi save, yumi stap pikinini bilong God, tasol dispela graun olgeta em i stap aninit long strong bilong Satan.

Yumi save, Pikinini Bilong God i kam pinis, na em i givim tingting long yumi, bai yumi ken save long God tru. Yumi pas wantaim God tru na wantaim Pikinini bilong en Jisas Krai.

Jisas Krai em i God tru, na em i as bilong laip bilong i stap gut oltaim oltaim.

Ol liklik pikinini bilong mi, yupela i mas i stap longwe long olgeta giaman god.

Dispela em i tok bilong God

Song bilong Bekim

Song 149:1-2.3-4.5.6.9

Bekim: Bikpela i save laikim ol manmeri bilong em.

Kirapim nupela song long Bikpela.

Yupela ol manmeri i bilip tru long em,

yupela bung na litimapim nem bilong em.

Yupela ol Israel, yupela amamas long God i bin wokim yupela.
Yupela ol pikinini bilong Saion, yupela amamas moa yet long God,
em i king bilong yupela.

Bekim:

Yupela danis na singsing, yupela paitim gita na kundu
na litimapim nem bilong em.
Bikpela i save laikim ol manmeri bilong em,
em i apim nem bilong ol manmeri i save daunim ol yet na mekim ol i win.

Bekim:

Ol manmeri bilong God i ken singim ol song bilong amamas.
Ol i ken litimapim nem bilong Bikpela na singsing strong.
Ol i ken mekim save long ol dispela lain olsem God i tok.
Olsem tasol ol manmeri bilong God bai i win.

Bekim:

Welkamim Gutnius:

Aleluya, Aleluya
Wanpela bikpela profet i kamap pinis namel long yumi.
God i kam pinis bilong helpim ol manmeri bilong en.
Aleluya

Gutnius**Jo 2:1-12**

*Hettok: Dispela em i namba wan mirakel Jisas i wokim.
Em i wokim long taun Kana long distrik Galili.*

Harim Gutnius bilong Jisas Krai Jon i raitim

Wanpela man i marit long taun Kana long distrik Galili.

Na mama bilong Jisas i go lukim dispela marit.

Ol i bin singautim tu Jisas wantaim ol disaipel bilong en, na ol tu i kam i stap long dispela marit.

Taim wain i pinis, na mama bilong Jisas i tokim em olsem,

"Ol i no gat wain."

Na Jisas i tokim em olsem,

"Meri, tingting bilong yu em i no tingting bilong mi. Taim bilong mi em i no yet."

Orait mama bilong en i tokim ol wokman olsem, "Sapos em i tokim yupela long mekim wanpela samting, orait yupela i mas mekim."

Long dispela haus i gat 6-pela bikpela sospen ston i stap, bilong ol Juda i ken waswas long pasin bilong ol.

Wanpela wanpela inap holim samting olsem 100 lita wara.

Orait Jisas i tokim ol wokman olsem, "Pulimapim wara long ol sospen."

Na ol i pulapim ol tru.

Na em i tokim ol, "Kisim sampela nau na karim i go long man i bosim kaikai."

Orait ol wokman i kisim sampela na karim i go.

Dispela wara i kamap pinis olsem wain na man i bosim kaikai i traim, tasol em i no save, ol i kisim dispela wain we.

Ol wokman i bin pulimapim wara, ol tasol i save.

Orait man i bosim kaikai em i singautim dispela man i marit, na em i tokim em olsem,

"Olgeta man i save tilim gutpela wain pastaim.

Na taim ol man i dring planti pinis, orait ol i save tilim wain i nogut liklik.

Tasol yu, yu bin pasim gutpela wain, na nau tasol yu kisim i kam."

Dispela em i namba wan mirakel Jisas i wokim.

Em i wokim long taun Kana long distrik Galili.

Dispela mirakel em i olsem mak bilong soim bikpela namba na strong bilong en.

Na ol disaipel bilong en ol i lukim na ol i bilip long em.

Em tasol Gutnius bilong Jisas Krai

Mande bihain long Ipifani**Rit Namba 1****1 Jo 3:22-4:6***Hettok: Yumi inap save long Spirit bilong tok tru, na long spirit bilong giaman.***Rit i kam long namba wan pas Jon i raitim**

Ol bratasusa, sapos yumi beten na askim God long wanpela samting, orait em i save givim long yumi, long wanem, yumi save bihainim lo bilong en, na yumi save mekim pasin em i laikim.

Na lo bilong en i olsem.

Yumi mas bilip long nem bilong Pikinini bilong en Jisas Krai, na yumi wan wan i mas laikim tru ol arapela, olsem em i bin tokim yumi.

Sapos wanpela man i bihainim lo bilong God, orait em i pas wantaim God, na God i pas wantaim em.

God i givim Holi Spirit long yumi, na dispela Spirit i soim yumi olsem, God i stap wantaim yumi.

Ol pren, planti giaman profet i save raun nabaut long graun.

Olsem na yupela i no ken bilip long olgeta manmeri i kam long yupela na i tok, "Spirit bilong God i givim tok long mi." Nogat.

Yupela i mas traim olgeta spirit, bai yupela i ken save, ol i kam long God, o nogat.

Na pasin bilong yupela i ken save long Spirit bilong God, em i olsem.

Sapos man i save tok, "Jisas Krai i bin kamap man tru," orait Spirit bilong God i stap long dispela man.

Na sapos man i no mekim dispela kain tok long Jisas, orait dispela man i gat narapela spirit, em i no kam long God.

Em i spirit bilong birua bilong Krai, bipo yupela i harim tok long em bai i kam. Na nau em i kam pinis na i stap long graun.

Ol liklik pikinini bilong mi, yupela i bilong God, na yupela i daunim pinis ol dispela giaman profet, long wanem, dispela Spirit i stap insait long yupela em i winim spirit i stap insait long ol man bilong graun.

Ol dispela manmeri ol i bilong graun. Olsem na tok bilong ol em i bilong graun tasol, na ol manmeri bilong graun ol i save harim tok bilong ol.

Tasol yumi bilong God, na ol manmeri i save long God, ol i save harim tok bilong yumi.

Tasol man o meri i no bilong God, em i no save harim tok bilong yumi.

Long dispela pasin yumi inap save long Spirit bilong tok tru, na long spirit bilong giaman.

Dispela em i tok bilong God**Song bilong Bekim****Song 2:7-8.10-11*****Bekim: Bai mi putim olgeta hap bilong graun long han bilong yu.***

(Dispela king i tok olsem,)

"Harim. Nau mi laik autim tok, Bikpela i bin givim mi.

Em i tokim mi olsem,

‘Yu pikinini bilong mi. Tude mi kamap papa bilong yu.’

Askim mi tasol na mi bai givim olgeta kantri long yu.
Mi bai putim olgeta hap bilong graun long han bilong yu.

Bekim: Bai mi putim olgeta hap bilong graun long han bilong yu.

Olsem nau yupela ol king, yupela i mas tingting gut.
Yupela olgeta hetman bilong graun, yupela i mas harim tok na lukaut!
Yupela mas pret long Bikpela na mekim wok bilong em.
Yupela mas lindaun na aninit tru long em."

Bekim:

Welkamim Gutnius:

Aleluya, Aleluya
Jisas i autim gutnius bilong kingdom bilong God, na em i mekim orait olgeta sik
na olgeta samting i bagarapim bodi bilong ol manmeri.
Aleluya

Gutnius

Mt 4:12-17.23-25

Hettok: Kingdom bilong heven em i kam klostu pinis.

Harim Gutnius bilong Jisas Krai Matyu i raitim

Taim Jisas i harim tok olsem, ol i
putim Jon pinis long kalabus, orait
em i go long distrik Galili.

Na em i lusim taun Nasaret na i go
sindaun long taun Kaperneam.

Kaperneam em i stap arere long
raunwara Galili, long graun bilong ol
lain Sebulun na Naptali.

Long dispela pasin Jisas inapim
wanpela tok God i bin mekim long
maus bilong profet Aisaia olsem,

"Ol manmeri bilong graun
bilong Sebulun na graun bilong
Naptali, em graun i stap klostu
long bikrot i go long solwara na
graun i stap long hapsait bilong
wara Jordan, em graun bilong
distrik Galili, dispela distrik i
gat planti manmeri bilong ol
arapela kantri tu i stap long en,
ol dispela manmeri i bin sindaun
long bikpela tudak, ol i lukim
pinis bikpela lait.

Ol manmeri i bin stap long ples
tudak, lait i kamap pinis long
ol."

Long dispela taim Jisas i stat long
autim tok long ol manmeri.

Em i tok olsem, "Yupela i mas tanim
bel, long wanem, kingdom bilong
heven em i kam klostu pinis."

Jisas i go raun long olgeta hap bilong
distrik Galili.

Em i save go insait long ol haus lotu
bilong ol na skulim ol manmeri.

Em i autim gutnius bilong kingdom
bilong God, na em i mekim orait
olgeta sik na olgeta samting i
bagarapim bodi bilong ol manmeri.

Ol i stori long em long olgeta hap
bilong provins Siria.

Olsem na ol manmeri i bringim
olgeta manmeri ol kain kain sik i
bagarapim ol na ol i karim pen nogut,
na ol manmeri i gat spirit nogut, na ol
manmeri i gat dispela kain sik i save
mekim ol i pundaun na guria nogut,
na ol manmeri bun bilong ol i dai
olgeta.

Na Jisas i mekim ol i kamap orait.

Na planti bikpela lain manmeri bilong
Galili na bilong hap bilong distrik

Dekapolis, na bilong Jerusalem na Judia na bilong graun i stap long

hapsait bilong wara Jordan, ol i save bihainim em i go.

Em tasol Gutnius bilong Jisas Kraus

Tunde bihain long Ipifani

Rit Namba 1

1 Jo 4:7-10

Hettok: God yet em i as bilong dispela pasin bilong laikim ol arapela.

Rit i kam long namba wan pas Jon i raitim

Ol pren, yumi wan wan i mas laikim tru ol arapela, long wanem, pasin bilong laikim ol arapela em i pasin bilong God.

Na man o meri i laikim tru ol arapela, em i pikinini bilong God, na em i save tru long God.

God yet em i as bilong dispela pasin bilong laikim ol arapela.

Olsem na man o meri i no save laikim ol arapela, em i no save long God.

God i gat wanpela Pikinini tasol, na em i salim dispela Pikinini i kam long graun, bai yumi kisim laip long em.

Long dispela pasin God i soim yumi olsem em i laikim yumi tru.

Pasin bilong laikim ol arapela, em i pasin bilong God.

Yumi no ken ting, yumi bin laikim God pastaim. Nogat.

God i laikim yumi pastaim.

Olsem na em i bin salim Pikinini Man bilong en i kam long graun bilong lusim ol sin bilong yumi.

Dispela em i tok bilong God

Song bilong Bekim

Song 72:1-2.3-4.7-8

Bekim: Olgeta kantri bai i nildaun na givim biknem long Bikpela.

God, givim gutpela tingting long king, na helpim em long skelim gut ol manmeri, bai em i ken bosim gut ol manmeri bilong yu na mekim stretpela pasin long ol tarangu.

Bekim:

Ol bikpela maunten i ken bringim taim bilong bel isi long ol manmeri na ol liklik maunten i ken bringim stretpela pasin.

Bai king i ken stretim gut ol hevi bilong ol tarangu, na helpim ol pikinini bilong ol

na mekim save long ol manmeri i bagarapim ol arapela.

Bekim: Olgeta kantri bai i nildaun na givim biknem long Bikpela.

Long olgeta de bilong em bai gutpela taim na stretpela pasin i stap, inap lait bilong mun i pinis olgeta.

Em bai i bosim graun i stap namel long tupela solwara,
stat long Bikpela Riva i go inap long arere bilong graun.

Bekim:

Welkamim Gutnius:

Aleluya, Aleluya

Bikpela yet i makim mi bilong bringim gutpela tok bilong en long ol
rabismanmeri. Na em i salim mi i kam long tokaut long ol manmeri i stap long
kalabus long ol i ken lusim kalabus na i go fri.

Aleluya

Gutnius

Mk 6:34-44

*Hettok: Em i brukim ol bret na i givim long ol disaipel, bai ol i tilim i go long ol
manmeri.*

Harim Gutnius bilong Jisas Krai Mak i raitim

Taim Jisas i go sua em i lukim
bikpela lain manmeri i stap.

Na em i sori tru long ol, long wanem,
ol i olsem ol sipsip i no gat wasman.

Na em i stat long givim planti tok
long ol.

Na bihain, taim san i laik i go daun,
ol disaipel bilong Jisas i kam long em
na tokim em olsem,

"Dispela hap i no gat man, na san i
laik i go daun.

Mobeta yu salim ol manmeri i go.

Ol i ken i go long ol hap nabaut na
long ol ples, na baim kaikai bilong
ol."

Tasol Jisas i bekim tok bilong ol
disaipel olsem, "Yupela yet givim
kaikai long ol."

Na ol i askim em, "Ating yu laik bai
mipela i go baim bret long 200 kina
na givim long ol, a?"

Na em i askim ol, "Yupela i gat
hamas bret i stap? Yupela go lukim."

Ol i lukim pinis, orait ol i kam tok
Jisas olsem, "Mipela i gat 5-pela bret
na tupela pis."

Na Jisas i tokim ol olsem, "Olgeta
manmeri i mas bung bung na sindaun
long gutpela gras."

Orait ol i sindaun, na sampela lain
inap long 100 man, na sampela inap
long 50.

Na Jisas i kisim dispela 5-pela bret
wantaim tupela pis.

Na em i lukluk i go long heven, na i
givim tenkyu long God.

Na em i brukim ol bret na i givim
long ol disaipel, bai ol i tilim i go
long ol manmeri.

Na tupela pis tu em i brukim na tilim
i go long olgeta manmeri.

Na olgeta i kaikai, na ol i pulap.

Na olgeta hap bret na pis i stap yet,
em ol i bungim na pulapim 12-pela
basket.

Ol manmeri i kaikai dispela bret, ol
inap 5,000 manmeri.

Em tasol Gutnius bilong Jisas Krai

Trinde bihain long Ipifani

Rit Namba 1

1 Jo 4:11-18

Hettok: Sapos yumi laikim tru ol arapela, orait God i stap wantaim yumi.

Rit i kam long namba wan pas Jon i raitim

Ol pren, long dispela pasin bilong en God i soim yumi olsem em i laikim yumi tru.

Olsem na yumi wan wan i mas laikim tru ol arapela. I no gat wanpela man i bin lukim God.

Tasol sapos yumi laikim tru ol arapela, orait God i stap wantaim yumi, na dispela pasin bilong en bilong laikim ol arapela, em i kamap strong pinis insait long laip bilong yumi.

Olsem wanem na yumi inap save, God i pas wantaim yumi na yumi pas wantaim em?

Yumi save long dispela, long wanem, em i bin givim Spirit bilong em yet long yumi.

Yumi lukim pinis samting Papa i bin mekim.

Em i bin salim Pikinini bilong en i kam bilong kisim bek olgeta manmeri bilong graun, na yumi save autim tok long ol dispela samting.

Sapos wanpela man i tok, "Jisas em i Pikinini Bilong God," orait God i pas wantaim dispela man, na em i pas wantaim God.

Olsem na yumi save na bilip strong olsem, God i laikim yumi tru, na

dispela pasin bilong en i stap long laip bilong yumi.

God yet em i as bilong pasin bilong laikim tru ol arapela.

Na man i save laikim tru ol arapela em i pas wantaim God, na God i pas wantaim em.

Sapos yumi stap olsem, orait dispela pasin bilong laikim ol arapela em i kamap strong pinis insait long laip bilong yumi.

Na bai yumi no pret long de bilong bikpela kot bilong God.

Tru, yumi stap long dispela graun, tasol yumi stap wankain olsem Krais yet, olsem na yumi no ken pret.

Man i save laikim ol arapela, em i no save pret.

Sapos pasin bilong laikim ol arapela i kamap strong pinis insait long laip bilong wanpela man, orait dispela i save rausim pasin bilong pret.

As bilong pret em i olsem.

Man i save, em bai i kisim pe nogut, na dispela i mekim em i pret.

Sapos wanpela man i pret, orait yumi ken save, pasin bilong laikim ol arapela i no kamap strong yet long laip bilong em.

Song bilong Bekim

**Dispela em i tok bilong God
Song 72:1-2.10.12-13**

Bekim: Olgeta kantri bai i nildaun na givim biknem long Bikpela.

God, givim gutpela tingting long king,
na helpim em long skelim gut ol manmeri,
bai em i ken bosim gut ol manmeri bilong yu
na mekim stretpela pasin long ol tarangu.

Bekim:

Ol king bilong Tarsis na ol ailan bai i bringim ol presen i kam long em.
Na ol king bilong Arebia na Saba bai i peim takis long em.

Bekim:

Long wanem, em i save helpim ol tarangu i krai long em
na ol manmeri i sot long ol samting.
Em i save marimari long ol manmeri i no gat strong,
na em i save lukautim laip bilong ol tarangu i nogat samting.

Bekim:***Welkamim Gutnius:***

Aleluya, Aleluya
God i bringim Krais i go antap na em i kisim biknem tru.
Ol manmeri bilong graun i bilip long Krais bai ol tu i mas litimapim biknem
bilong en.
Aleluya

Gutnius***Mk 6:45-52****Hettok: Ol disaipel i lukim Jisas i wokabaut antap long raunwara.***Harim Gutnius bilong Jisas Krais Mak i raitim**

Ol 5,000 manmeri i kaikai pinis, orait
Jisas i hariapim ol disaipel bilong en,
na i tokim ol long ol i mas kalap long
bot na i go paslain long em long
hapsait bilong raunwara, long ples
Betsaida.
Em yet i laik i stap na salim ol
manmeri i go pastaim.
Em i salim ol manmeri i go pinis,
orait em i go antap long maunten,
bilong em i ken beten.
Long apinun tru bot i stap namel long
raunwara, na Jisas wanpela em i stap
long nambis.
Na em i lukim win i kam long pore
bilong bot na i sakim ol, na ol i
hatwok tru long pul.

Klostu long tulait, orait Jisas i
wokabaut antap long raunwara na i
go long ol.
Em i laik abrusim ol, tasol ol disaipel
i lukim em i wokabaut antap long
raunwara, na ol i ting em i wanpela
masalai. Na ol i singaut nogut.
Olgeta i lukim em, na ol i pret tumas.
Tasol kwiktaim Jisas i tokim ol
olsem, "Yupela stap strong. Em mi
tasol. Yupela i no ken pret."
Na em i go insait long bot, na i stap
wantaim ol, na win i dai.
Na ol i kirap nogut tru, long wanem,
ol i no klia gut long as bilong dispela
samting Jisas i bin mekim taim em i
tilim bret long ol manmeri. Nogat.
Tingting bilong ol i pas yet.

Em tasol Gutnius bilong Jisas Krais

Fonde bihain long Ipifani

Rit Namba 1

1 Jo 4:19-5:4

Hettok: Man i save laikim tru God, em i mas laikim tru ol arapela manmeri bilong God.

Rit i kam long namba wan pas Jon i raitim

Ol bratasusa, yumi save laikim ol arapela, long wanem, God i bin laikim yumi pastaim.

Sapos wanpela man i tok, "Mi laikim tru God," tasol em i no laikim wanpela bilong ol arapela manmeri bilong God, orait dispela man em i man bilong giaman.

I no gat wanpela man i bin lukim God.

Olsem na man i no save laikim ol arapela, em ol manmeri em i lukim pinis, em i no inap laikim God em i no bin lukim.

Dispela lo yumi kisim long Krai, em i olsem.

Man i save laikim tru God, em i mas laikim tru ol arapela manmeri bilong God.

Olgeta manmeri i bilip long Jisas em Krai, ol i stap pikinini bilong God.

Na olgeta man i save laikim wanpela papa, ol i save laikim ol pikinini bilong en tu.

Sapos yumi laikim tru God na yumi bihainim ol lo bilong em, orait long dispela pasin yumi ken save, yumi laikim tru ol pikinini bilong God.

Sapos yumi laikim tru God, orait yumi save bihainim ol lo bilong en.

Na ol lo bilong en i no givim hevi long yumi.

Olgeta manmeri i stap pikinini bilong God, ol i winim strong bilong dispela graun.

Yumi bilip long God, na long dispela pasin yumi save winim pait na daunim strong bilong dispela graun.

Dispela em i tok bilong God

Song bilong Bekim

Song 72:1-2.14-15.17

Bekim: Olgeta kantri bai i nildaun na givim biknem long Bikpela.

God, givim gutpela tingting long king,
na helpim em long skelim gut ol manmeri,
bai em i ken bosim gut ol manmeri bilong yu
na mekim stretpela pasin long ol tarangu.

Bekim: Olgeta kantri bai i nildaun na givim biknem long Bikpela.

Em bai i kisim bek ol manmeri
ol birua i save daunim ol na putim hevi long ol,
long wanem, laip bilong ol i dia tumas long ai bilong em.
King i ken i stap longpela taim moa,
na ol i ken givim olgeta golmani bilong Seba long em.
Ol manmeri i ken beten long helpim king oltaim
na God i ken blesim em olgeta de.

Bekim:

Nem bilong king i ken win inap oltaim
 na i ken i stap inap long de san i pinis.
 Na olgeta lain manmeri bai i amamas
 long stap aninit long em
 na olgeta kantri bai i askim God i blesim em.

Bekim:***Welkamim Gutnius:***

Aleluya, Aleluya

Bikpela yet i makim mi bilong bringim gutpela tok bilong en long ol
 rabismanmeri. Na em i salim mi i kam long tokaut long ol manmeri i stap long
 kalabus long ol i ken lusim kalabus na i go fri.

Aleluya

Gutnius***Lu 4:14-22***

*Hettok: Dispela tok bilong buk bilong God yupela i harim pinis,
 nau tasol em i kamap tru.*

Harim Gutnius bilong Jisas Krai Luk i raitim

Long strong bilong Holi Spirit, Jisas i
 go bek long distrik Galili.

Na ol manmeri i stap long olgeta
 dispela hap, ol i harim tok olsem Jisas
 i kam i stap long Galili.

Oltaim em i wok long skulim ol
 manmeri long ol haus lotu bilong ol.

Na olgeta manmeri i litimapim nem
 bilong em.

Jisas i go long Nasaret.

Taim em i pikinini yet, em i stap long
 dispela taun, na em i bin kamap
 bikpela long en.

Long de Sabat em i go insait long
 haus lotu, olsem em i save mekim
 oltaim.

Em i sanap bilong ritim tok bilong
 God, na ol i givim buk bilong profet
 Aisaia long em.

Em i opim buk, na em i painim
 dispela hap i gat tok olsem,

"Spirit bilong Bikpela i kam i
 stap long mi, long wanem,
 Bikpela yet i kapsaitim wel long
 het bilong mi bilong makim mi

bilong i go bringim gutpela tok
 bilong en long ol rabismanmeri.

Na em i salim mi i kam long
 tokaut long ol manmeri i stap
 long kalabus long ol i ken lusim
 kalabus na i go fri, na long
 tokaut long ol manmeri i aipas
 long ol i ken lukluk gen.

Em i salim mi i kam long
 pinisim hevi bilong ol manmeri,
 ol arapela i wok long daunim na
 mekim nogut long ol.

Na em i salim mi long tokaut
 olsem, taim i kamap pinis

bilong Bikpela i laik mekim
 gut long ol manmeri bilong en."

Jisas i pasim buk na i givim bek long
 man i gat wok bilong lukautim ol
 buk, na em i sindaun.

Na olgeta manmeri i stap long haus
 lotu ol i lukluk long Jisas tasol.

Orait na em i tokim ol olsem,

"Dispela tok bilong buk bilong God
 yupela i harim pinis, nau tasol em i
 kamap tru."

Na ol i litimapim nem bilong em, na ol i tingting planti long ol gutpela tok em i autim.

Tasol ol i tok, "Yumi save, dispela man em i pikinini bilong Josep. Olsem wanem na em inap mekim olkain tok olsem?"

Em tasol Gutnius bilong Jisas Kraais

Fraide bihain long Ipifani

Rit Namba 1

1 Jo 5:5-13

*Hettok: I gat tripela i autim tok long pasin bilong en,
em Holi Spirit na wara na blut.*

Rit i kam long namba wan pas Jon i raitim

Ol bratasusa, husat i save winim strong bilong dispela graun?

Man i bilip long Jisas em i Pikinini Bilong God, dispela man i save win.

Jisas Kraais i bin i kam long pasin bilong kisim baptais long wara, na long pasin bilong kapsaitim blut bilong en long diwai kros.

Em i no i kam long pasin bilong wara tasol. Nogat.

Em i kam long pasin bilong wara wantaim blut.

Holi Spirit em i as bilong tok tru, na Holi Spirit i save autim tok long pasin bilong Jisas Kraais.

I gat tripela i autim tok long pasin bilong en, em Holi Spirit na wara na blut.

Na tripela i mekim wanpela tok tasol. Yumi save bilipim tok ol man i autim.

Tasol tok God i autim, em i winim tru tok bilong ol man.

Na dispela tok God i autim pinis, em i tok long Pikinini bilong en.

Man i save bilip long Pikinini Bilong God, em i kisim pinis dispela tok God i bin autim, na em i stap long bel bilong en.

Tasol man i no bilipim tok bilong God, i olsem em i kolim God em i man bilong giaman, long wanem, em i no bilipim tok God i bin autim long pasin bilong Pikinini bilong en.

Na long dispela pasin God i soim olsem tok bilong en i tru.

God i bin givim yumi laip bilong i stap gut oltaim oltaim, na as bilong dispela laip em i stap long Pikinini bilong en.

Man i pas wantaim Pikinini Bilong God, em i gat dispela laip.

Na man i no pas wantaim Pikinini Bilong God, em i no gat dispela laip.

Mi raitim dispela tok long yupela ol manmeri i save bilip long nem bilong Pikinini Bilong God, bai yupela inap save, yupela i kisim pinis laip bilong i stap gut oltaim oltaim.

Dispela em i tok bilong God

Song bilong Bekim**Song 147:12-13.14-15.19-20*****Bekim: Jerusalem, litimapim nem bilong Bikpela.***

Jerusalem, litimapim nem bilong Bikpela.

Saion, givim ona long God bilong yu.

Long wanem, em i strongim ol dua bilong yu
na i blesim ol manmeri i stap insait long yu.

Bekim:

Em i givim bel isi long ol manmeri i stap long graun bilong yu
na em i givim gutpela kaikai tru long yu.

Em i salim wanpela tok, na wantu dispela tok i kam daun long graun.

Bekim:

Em i givim tok blong em long Jekop

na i givim lo na skul bilong em long Israel.

Em i no bin mekim olsem long ol arapela lain. Nogat.

Ol i no save long ol lo bilong em.

Bekim:***Welkamim Gutnius:***

Aleluya, Aleluya

Jisas i autim gutnius bilong kingdom bilong God, na em i mekim orait olgeta sik
na olgeta samting i bagarapim bodi bilong ol manmeri.

Aleluya

Gutnius***Lu 5:12-16***

Hettok: Wanpela man i gat sik lepra i pulap tru long bodi bilong em.

Em i lukim Jisas, na em i brukim skru na putim pes i go daun long graun.

Harim Gutnius bilong Jisas Krai Luk i raitim

Wanpela taim Jisas i stap long
wanpela taun, na wanpela man i stap,
em i gat sik lepra i pulap tru long
bodi bilong em.

Em i lukim Jisas, na em i brukim skru
na putim pes i go daun long graun na
i tokim Jisas olsem, "Bikpela, sapos
yu laik, yu inap long mekim mi i
kamap klin long ai bilong God."

Na Jisas i putim han long em na i
tokim em olsem, "Mi laik. Yu kamap
klin."

Na wantu sik lepra i lusim dispela
man, na em i kamap klin.

Na Jisas i tok strong long em olsem,
"Yu no ken tokim wanpela man long
dispela samting i bin kamap long yu.
Nogat. Yu go soim skin bilong yu
long pris, na mekim ofa bilong soim

olsem skin bilong yu i kamap klin pinis, olsem Moses i bin tok. Na bai ol manmeri i ken save, sik bilong yu i pinis."

Tasol stori bilong ol samting Jisas i mekim em i raun i go moa yet.

Olsem na planti manmeri moa ol i kam bilong harim tok bilong em, na bilong em i mekim orait ol sik bilong ol.

Tasol planti taim em i save lusim ol manmeri na i go long hap i no gat man, na em i save beten.

Em tasol Gutnius bilong Jisas Kraais

Sarere bihain long Ipifani

Rit Namba 1

1 Jo 5:14-21

Hettok: Sapos yumi bihainim laik bilong God yet na yumi beten na askim em long wanpela samting, orait em i save harim beten bilong yumi.

Rit i kam long namba wan pas Jon i raitim

Ol bratasusa, sapos yumi bihainim laik bilong God yet na yumi beten na askim em long wanpela samting, orait em i save harim beten bilong yumi.

Olsem na yumi no save pret long God. Nogat.

Yumi save go klostu long em.

Yumi save, em i save harim olgeta beten bilong yumi.

Olsem na taim yumi askim em long givim wanpela samting long yumi, yumi save olsem yumi kisim tru dispela samting.

Sapos wanpela man i lukim narapela Kristen brata i mekim sin, na sapos dispela sin em i no inap long mekim dispela brata i dai, orait dispela man i ken beten long God, na God bai i givim laip long dispela brata.

Mi tok long ol manmeri i mekim kain sin em i no inap long mekim ol i dai.

I gat kain sin em inap mekim man i dai, na mi no tok long yupela i mas beten long dispela.

Olgeta pasin i no stret, em i sin.

Tasol i gat kain sin i no save mekim man i dai.

Yumi save, olgeta manmeri i stap pikinini bilong God, ol i no save bihainim pasin bilong sin. Nogat.

God i save lukautim gut man i stap pikinini bilong em, na Satan i no inap putim han long em.

Yumi save, yumi stap pikinini bilong God, tasol dispela graun olgeta em i stap aninit long strong bilong Satan.

Yumi save, Pikinini Bilong God i kam pinis, na em i givim tingting long yumi, bai yumi ken save long God tru.

Yumi pas wantaim God tru na wantaim Pikinini bilong en Jisas Kraais.

Jisas Kraais em i God tru, na em i as bilong laip bilong i stap gut oltaim oltaim.

Ol liklik pikinini bilong mi, yupela i mas i stap longwe long olgeta giaman god.

Dispela em i tok bilong God

Song bilong Bekim**Song 149:1-2.3-4.5-6.9*****Bekim: Bikpela i save laikim ol manmeri bilong em.***

Kirapim nupela song long Bikpela.

Yupela ol manmeri i bilip tru long em,

yupela bung na litimapim nem bilong em.

Yupela ol Israel, yupela amamas long God i bin wokim yupela.

Yupela ol pikinini bilong Saion, yupela amamas moa yet long God,
em i king bilong yupela.***Bekim:***Yupela danis na singsing, yupela paitim gita na kundu
na litimapim nem bilong em.

Bikpela i save laikim ol manmeri bilong em,

em i apim nem bilong ol manmeri i save daunim ol yet na mekim ol i win.

Bekim:

Ol manmeri bilong God i ken singim ol song bilong amamas.

Ol i ken litimapim nem bilong Bikpela na singsing strong.

Ol i ken mekim save long ol dispela lain olsem God i tok.

Olsem tasol ol manmeri bilong God bai i win.

Bekim:***Welkamim Gutnius:***

Aleluya, Aleluya

Ol dispela manmeri i bin sindaun long bikpela tudak, ol i lukim pinis bikpela lait.

Ol manmeri i bin stap long ples tudak, lait i kamap pinis long ol.

Aleluya

Gutnius***Jo 3:22-30****Hettok: Poroman bilong dispela man em i save sanap na putim yau na amamas
tru long harim tok bilong dispela man i marit.***Harim Gutnius bilong Jisas Kraus Jon i raitim**Jisas wantaim ol disaipel bilong en i
go long hap bilong Judia.Em i stap wantaim ol long dispela
hap na i givim baptais long ol
manmeri.Jon tu i givim baptais long ol
manmeri long ples Ainon klostu long
ples Salim.Plantia wara i stap long dispela ples,
na ol manmeri i kam long em bilong
kismus baptais.Long dispela taim Herot i no bin
putim Jon long kalabus yet.Wanpela tok pait i kirap namel long
ol disaipel bilong Jon na wanpela
Juda.

Ol i toktok long wanem pasin bilong waswas ol i mas bihainim long kamap klin long ai bilong God.

Na ol disaipel i go long Jon, na ol i tokim em olsem,

"Tisa, dispela man bipo em i stap wantaim yu long hapsait bilong wara Jordan na yu bin autim tok bilong em, dispela man nau em i givim baptais long ol manmeri, na olgeta ol i go long em."

Orait Jon i bekim tok olsem,

"Sapos God long heven i no givim samting long wanpela man, orait dispela man i no inap kisim.

Yupela yet i harim pinis dispela tok mi mekim bipo, 'Mi no dispela Mesaia, tasol God i salim mi na mi kam paslain long em.'

Sapos wanpela man i maritim meri, orait dispela meri em i bilong dispela man i maritim em. Na poroman bilong dispela man em i save sanap na putim yau na amamas tru long harim tok bilong dispela man i marit.

Olsem tasol nau amamas i pulap long bel bilong mi.

Nem bilong em i mas kamap bikpela, na nem bilong mi i mas i go daun."

Em tasol Gutnius bilong Jisas Kraus